

EL SANTO EVANGELIO

SEGÚN SAN MATEO

Genealogía de Jesucristo

1 Nan huin 'ngo lista xi'í ni xi Jesucristo huin sí' da'níj xí' David tsínj gane asij ná. Ni xi David huin Abraham tsínj gane asij ná. ²Ni Abraham huin chrej tsínj gu'naj Isaac. Ni Isaac huin chrej tsínj gu'naj Jacob. Ni Jacob huin chrej ni jnajan tsínj gu'naj Judá. ³Ni Judá huin chrej Fares nga tsínj gu'naj Zara. Ni nni nungüej sí' huin Tamar. Ni Fares huin chrej tsínj gu'naj Esrom. Ni Esrom huin chrej tsínj gu'naj Aram. ⁴Ni Aram huin chrej tsínj gu'naj Aminadab. Ni Aminadab huin chrej tsínj gu'naj Naasón. Ni Naasón huin chrej tsínj gu'naj Salmón. ⁵Ni Salmón huin chrej tsínj gu'naj Booz. Ni nni sí' huin yun'unj gu'naj Rahab. Ni Booz huin chrej tsínj gu'naj Obed. Ni nni sí' huin yun'unj gu'naj Rut. Ni Obed huin chrej tsínj gu'naj Isaí. ⁶Ni Isaí huin chrej tsínj gu'naj David.

Ni David huin chrej tsínj gu'naj Salomón. Ni nni Salomón huin nica tsínj gu'naj Urías. ⁷Ni Salomón huin chrej tsínj gu'naj Roboam. Ni Roboam huin chrej tsínj gu'naj Abías. Ni Abías huin chrej tsínj

gu'naj Asa. ⁸Ni Asa huin chrej tsínj gu'naj Josafat. Ni Josafat huin chrej tsínj gu'naj Joram. Ni Joram huin chrej tsínj gu'naj Uzías. ⁹Ni Uzías huin chrej tsínj gu'naj Jotam. Ni Jotam huin chrej tsínj gu'naj Acaz. Ni Acaz huin chrej tsínj gu'naj Ezequías. ¹⁰Ni Ezequías huin chrej tsínj gu'naj Manasés. Ni Manasés huin chrej tsínj gu'naj Amón. Ni Amón huin chrej tsínj gu'naj Josías. ¹¹Ni Josías huin chrej ni jnajan tsínj gu'naj Jeconías ngaa gan'anj xacaj ni tsínj mān xuman' Babilonia ni ngüi israelita gan'anj ni sij xánj ni sij.

¹²Ni ngaa nan' ni ngüi israelita xánj ni sij ni Jeconías huin chrej tsínj gu'naj Salatiel. Ni Salatiel huin chrej tsínj gu'naj Zorobabel. ¹³Ni Zorobabel huin chrej tsínj gu'naj Abiud. Ni Abiud huin chrej tsínj gu'naj Eliaquim. Ni Eliaquim huin chrej tsínj gu'naj Azor. ¹⁴Ni Azor huin chrej tsínj gu'naj Sadoc. Ni Sadoc huin chrej tsínj gu'naj Aquim. Ni Aquim huin chrej tsínj gu'naj Eliud. ¹⁵Ni Eliud huin chrej tsínj gu'naj Eleazar. Ni Eleazar huin chrej tsínj gu'naj Matán. Ni Matán huin chrej tsínj gu'naj Jacob. ¹⁶Ni

Jacob huin chrej tsínj gu'naj José. Ni José huin nica yun'unj gu'naj María. Ni María huin nni Jesús gu'naj s'i Cristo.

¹⁷Hué dan ni asij tsínj gu'naj Abraham da ga'nga tsínj gu'naj David, ni guisíj xigan'anj xi Jesucristo. Ni asij tsínj gu'naj David da nicaj ni tsínj mān xuman' Babilonia ni ngüi israelita gan'anj ni sij xánj ni sij, ni guisíj ango xigan'anj xi Jesucristo. Ni asij nān' ni ngüi israelita xánj ni sij da ga'nga man'an Jesucristo, ni guisíj ango xigan'anj ni xi Jesucristo nej aj.

Nacimiento de Jesucristo

¹⁸Ni naanj gahuin ngaa achin doj ga'nga Jesucristo. Ni hua gahuin yya ruhua José nga María xacaj nungüej nej dugüi' nej. Sani ngaa achin gane nuguana'n nungüej nej, ni xacaj María cuenta sisi hua guiri' unj lij, guiyaj Espíritu Santo. ¹⁹Ni hua nica niman José huin sij nica María. Ni rian na'uej ruhua José ga'mi gaquin' sij xi'l'i si gahuin nga María rian ni tsínj nicaj sun, ni gani ruhua sij si duna hui sij unj. ²⁰Ni ngaa hué daj gani ruhua sij, ni ne' ni gurugüi' ngo ángel ga'nij Yan'anj ngaa ga'nin' sij. Ngaa ni gataj ángel daj gunun José: —Gunun so' si ga'mi José huin so' da'nij David. Si guxu'u'i so' xacaj dugüi' so' nga María si Espíritu Santo guiyaj si guiri' unj ngo lij. ²¹Ni guruj María ngo lij sno'o. Ni dugu'naj so' si-xugüi lij daj Jesús. Ni hué daj gu'naj sij si hué sij gahuin tsínj guiyaj si ganani ni ngüi rian si-gaquin' ni sij. —Daj gataj ángel gunun José.

²²Ni hué daj gahuin daran' nuguana' nan si guisij gahuin yya si nata' tsínj ga'mi si-nuguana' Señor rian ni ngüi asij ná. ²³Ni gataj s'i:

Guini'i a ni é re' sisi guiri' ngo yun'unj xana yan ngo lij.
Ni ga'nga ngo lij sno'o.
Ni dugu'naj ni sij si-xugüi Emanuel.

Daj gataj tsínj ga'mi si-nuguana' Señor daj. Ni Emanuel huin ruhuaj gata sisi nne Yan'anj nga né!

²⁴Ni ngaa gananun ruhua José ga'nin' sij ni guiyaj sij daj rún' gataj si-ángel Señor gunun sij. Ni xacaj sij María gahuin unj nica sij. ²⁵Sani nun gatoj nuguana'n nungüej nica sij asij da' ga'nga da'nij María. Ni dugu'naj José si-xugüi-i' gahuin JESÚS.

La visita de los magos

2 Ni ga'nga Jesús xuman' Belén ngaa nicaj sun rey Herodes estado Judea. Ni mān ni tsínj digui'yun daj hua mán yati' xata' ga'nā' ni s'i rian sij güi. Ni guisíj ni s'i xuman' Jerusalén. ²Ni nachínj snan'anj ni s'i ni tsínj mān xuman' Jerusalén. Ni gataj ni sij:

—Ni a ga'nga si-rey ni tsínj israelita únij. Daj si guini'i ni únij digyán yati' ne' rian sij güi sisi ga'nga sij. Ni ga'na' únij ganquin' ráj dacoj únij rian lij ga'nga daj. —Daj gataj ni sij.

³Ni ngaa gunun rey Herodes nuguana' daj, ni nin' ruhua gahuin ruhua sij. Ni hué daj gahuin ruhua daran' ni tsínj mān xuman' Jerusalén nej. ⁴Ngaa ni gaquinj rey daj ga'na' daran' chrej a'nin' nga ni tsínj digyán ley rian ni ngüi nej. Ni

nachínj snan'anj sij ni sí' ni a ga'nga Cristo huin tsínj ga'na' nácaj ni ngüi, gui'yaj Yan'anj xangá!. ⁵Ngaa ni gataj ni sí' gunun sij:

—Ga'nga Cristo xuman' Belén xuman' ngaj ne' estado Judea si hué daj garun tsínj ga'mi si-nuguan' Yan'anj rian ni ngüi asij ná:

⁶ Gunun man'án so' xuman' Belén huin xuman' ngaj do'oj Judá.

Sé 'ngo xuman' le'ej huín so'
scanij ni xuman' ngaj estado Judea.

Daj si gahui 'ngo tsínj ga'nin'
xánj so'.

Ní dugumi sa' sí' ni ngüi
israelita huin ni ngüi nico'
man'ānj.

Daj gataj tsínj daj. —Daj gataj ni sij gunun Herodes.

⁷ Ngaa ni gaquínj hui' Herodes ga'na' ni tsínj digui'yun yati!. Ni nachínj snan'anj sij ni sí' un güi yya gurugüi' yati' daj. ⁸ Ngaa ni ga'níj Herodes gan'anj ni sí' xuman' Belén. Ni gataj sij:

—Gan'anj a ni é re' yu'uj daj. Ni nachinj snan'anj 'ueé a ni é re' xi'i lij daj. Ni ngaa nari' a ni é re', ni ganata' ni é re' gununj. Ni gan'ān guiniquin' ráj daco rian ngaj lij daj nej. —Daj gataj Herodes gunun ni tsínj daj.

⁹ Ni ngaa gunun ni sij si gataj rey, ni gan'anj ni sij. Ni hué yati' guini'i sini ni sij rian sij güi, ni digýán-án' chrej huaj ni sij. Ni 'ngo ganiquin' yati' daj digýán-án' rian ngaj lij daj ga'nga. ¹⁰ Ni ngaa guini'i ni tsínj daj yati', ni nín' ruhua gahuin nia' ruhua ni sij. ¹¹ Ni ngaa gatúj ni sij chruhua hue!, ni guini'i ni sij lij daj ngá nni María. Ni ganiquin'

ráj dacoj ni sij rian lij daj. Ngaa ni na'nij ni sij rian chrúnj nicaj ni sij huaj ni sij. Ni go' ni sij gaga' oro nga siquíj sa' nej ngá 'ngo si guin' daj nej rian lij. ¹² Ni rian gataj nnej rian ni sij sisi si nanicaj ni sij rian nne rey Herodes, ngaa ni nanicaj ni sij ango chrej nān' ni sij xánj ni sij.

Matanza de los niños

¹³ Ni ngaa guisíj nan' ni tsínj daj, ngaa ni gurugüi' 'ngo si-ángel Yan'anj rian José ngaa ga'nin' sij ngaj sij atoj sij. Ni gataj ángel daj:

—Nachica so' nácaj so' nungüej nni lij aj. Ni gunánj so' gan'anj so' yu'uj gu'naj Egipto yu'uj daj guna so' da gatā gunun re'. Daj si rey Herodes nāno' dagahui' lij da aj. —Daj gataj ángel gunun José.

¹⁴ Ngaa ni nachica José nacaj sij nungüej nni lij. Ni gahui sij ne' ni gan'anj sij Egipto. ¹⁵ Ni gane sij yu'uj daj da' gahui' rey Herodes. Ni hué nānaj gahuin sisi gahuin yya daj rún' gataj 'ngo tsínj ga'mi si-nuguan' Yan'anj rian ni ngüi asij ná. Ni gataj sí': "Gauquín da'ní gahui sij Egipto ga'na' sij." Daj gataj Yan'anj, gataj tsínj daj.

¹⁶ Ni ngaa xacaj cuenta Herodes sisi digya' yun'unj ni tsínj digui'yun daj hua ni yati' man'an sij, ni nín' ruhua ga'man ruhua sij. Ni ga'nin' sij sun sisi dagahui' ni snado daran' ni lij sno'o da a'nga ngá ni lij guisíj huij yo' xuman' Belén ngá daran' ni xuman' ngaj nichrun' nej. Ni daj gui'yaj sij sisi gahui' lij huin lij xi'i nata' ni tsínj digui'yun daj hua yati' rian sij.

¹⁷ Ni hué daj gahuin yya sayun daj rún' gataj tsínj gu'naj Jeremías

huin sí' 'ngo tsínj ga'mi si-nuguan'
Yan'anj asij ná. Ni gataj sí':

¹⁸ Gunun ni ngüi sisi aco 'ngo
yun'unj xána riqui xuman'
Ramá.
Ni nin' ruhua nani ruhua ún'.
Ni aco nin' ruhua ún' nej.
Yun'unj xána gu'naj Raquel huin
si aco xi'lí da'níj ún'.
Ni na'ue nahuin nia' ruhua ún'
nga xi'lí aco ún'.
Daj si hua guisíj gahui' ni da'níj
ún'.

Daj gataj Jeremías asij ná.

¹⁹ Saní ngaa guisíj gahui' Herodes,
ngaa ni gurugüi' 'ngo si-ángel Señor
rian José ne' ni ngaa ga'nin' sij ngaj
sij gane sij yu'u'j gu'naj Egipto. ²⁰ Ni
gataj ángel daj:

—Nächica so', ni nacaj so' nungüej
nni lij, ni nanicaj so' gan'anj so'
yu'u'j gu'naj Israel. Daj si hua guisíj
gahui' ni tsínj ataj sisi dagahui' ni
sij lij da aj. —Daj gataj ángel gunun
José.

²¹ Ngaa ni nachica José nacaj sij
nungüej nni lij, ni nan' sij Israel.
²² Saní ngaa gunun José nuguan'
sisi guinicaj sun Arquelaño
estado Judea natuj sí' rian chrej sí', ngaa
ni guxu'ui' sij gan'anj sij yu'u'j daj. Ni
ne' ni ga'nin' ruhua' yún sij. Ni gataj
Yan'anj si gui'yaj sij. Ngaa ni gan'anj
sij estado Galilea. ²³ Ni ngaa guisíj
sij yu'u'j daj, ni gan'anj gane sij
xuman' Nazaret. Ni hué daj gahuin
sisi gahuin daj rún' gataj ni tsínj
ga'mi si-nuguan' Yan'anj asij ná sisi
gu'naj Jesús 'ngo tsínj 'na' Nazaret.

Predicación de Juan el Bautista

3 Ni ngaa daj, ni ga'na' Juan
qui'yanj naco ruhua

estado Judea. Ni nata' sij si-nuguan'
Yan'anj rian ni ngüi. ² Ni gataj sij:

—Ganani ruhua ni é re' xi'lí si-
gaquin' ni é re'. Daj si 'na' gahuin
nichrun' güi guinicaj sun Yan'anj
xánga' rian ni ngüi aj. —Daj gataj
Juan gunun ni ngüi.

³ Ni asij ná ga'mi Isaías tsínj ga'mi
si-nuguan' Yan'anj xi'lí Juan. Ni
gataj sí':

Unun né' si-nane 'ngo tsínj a'mi
nucuaj riqui qui'yanj naco
aj.

Ni ataj sí' sisi gui'yaj xugüi né'
si-chrej man'an Señor.

Daj si daj rún' nagui'yaj sa' né'
chrej ga'na' 'ngo tsínj huin
achij nico, ni da'nga' daj
nagui'yaj né' niman né' aj.

Hué daj gataj Isaías asij ná.

⁴ Ni si-gan' Juan huin to xucu
gu'naj camello. Ni nnij cinchru 'nij
gatin sij. Ni si xa sij huin xiriquíj nga
gatsi' man riqui qui'j. ⁵ Ni gahui ni
ngüi man xuman' Jerusalén nga ni
ngüi 'na' nin' gachra' estado Judea
nga ni ngüi 'na' nungüej du'ua xinéj
nnee gu'naj Jordán 'na' ni sij rian
nne Juan. ⁶ Ni duguata' nne Juan ni
sij chruhua xinéj nnee daj. Ni nata'
ni sij si-gaquin' ni sij. Ngaa ni gata'
nnee ni sij.

⁷ Saní ngaa guini'i Juan sisi 'na'
nico ni tsínj fariseo nga ni tsínj
saduceo gata' nnee ni sij, ruhua ni
sij, ni gataj sij gunun ni sí':

—Da'níj xucuáj huin ni é re' aj.
Ni un tsínj gataj chrun rian ni é
re' sisi ganani ni é re' rian castigo
nico gui'yaj Yan'anj únj. ⁸ Ga 'ueé
gui'yaj ni é re' aj. Hué dan ni ga'ue
guini'i ni ngüi sisi hua yya nani
ruhua ni é re' xi'lí si-gaquin' ni é

re' aj. ⁹Ni si gani ruhua man'an ni é re': "Da'níj Abraham huin ni únij." Sé daj gani ruhua ni é re' mánj. Daj si atá gunun a ni é re' sisi yej ngaj nan, ni ga'ue gui'yaj Yan'anj da'níj Abraham.

¹⁰Ni a hua chrun gaga' hacha ga'nij ya'q siú ni chrun. Ni daj rún' yaj 'ngo tsínj nga gaga' hacha, ni da'nga' daj gui'yaj Yan'anj nga daran' chrun nitaj si ayu chruj sa' chra. Ni ga'nij Yan'anj ni chrun daj gaca-á' rian yan'an anj. Ni daj rún' yaj ni chrun daj, ni da'nga' daj 'yaj ni tsínj nun unun rian Yan'anj anj.

¹¹'Xanga' yya duguata' nnee man'ánj nga nnee a ni é re' aj. Daj si nani ruhua ni é re' xi'í si-gaquin' a ni é re'. Sani ne' rucúj ga'na' 'ngo tsínj nucuaj daj nga man'ánj. Ni na'aj yáñj nicá gan'án dacánj sí' aj. Daj si huin achij sí' daj nga man'ánj. Ni duguata' nnee sí' a ni é re' nga Espíritu Santo nga yan'an nej. ¹²Ni hua guida'a tsínj daj si-pala sij si nagui'yaj sa' sij riqui strigo. Ni gahui coj riqui strigo daj. Ni nara sa' sij strigo chruhua guru_. Sani gari yan'an sij coj gahui riqui strigo gaca-á' niganj nin!. Ni daj rún' hua strigo hua ni tsínj unun si ataj Yan'anj. Ni daj rún' hua coj hua ni tsínj nun unun rian Yan'anj anj. —Daj gataj Juan gunun ni sij.

El bautismo de Jesús

¹³Hué dan ni gahui Jesús estado Galilea gan'anj sij du'ua xinéj nnee gu'naj Jordán rian nne Juan. Ni huin ruhua sij sisí duguata' nnee Juan man'an sij. ¹⁴Sani na'uej ruhua Juan, ni gataj sí':

—Hua niqan sisí duguata' nnee man'án re' man'ánj. Ni sé si sa' si

duguata' nnéj man'án re' mánj. —Daj gataj Juan gunun Jesús.

¹⁵Sani gataj Jesús gunun Juan: —Ga'nin' ruhuá re' yyaj aj. Daj si hua niqan si gahuin yya daran' nuguan' niça ga'nin' Yan'anj sun riun!. —Daj gataj Jesús.

Ngaa ni garáj xiná Juan.

¹⁶Ni ngaa guisíj gata' nnee Jesús, ni 'ngo hora gahui sij chruhua nnee. Hué dan ni naxi'nij xata!. Ni guini'i Jesús sisi 'na' guinij Espíritu Santo rian sij. Ni daj rún' hua 'ngo xu'man hua Espíritu Santo ga'na' rian sij.

¹⁷Ni gunun ni ngüi 'ngo nane 'na' xata' gataj man'an Yan'anj xanga':

—Nan huin da'níj li ruhuáj. Ni hua niqan ruhuáj ni'yá sij aj. —Daj gataj Yan'anj gunun ni sij.

Tentación de Jesús

4 Hué dan niqaj Espíritu Santo Jesú gan'anj-án' riqui quij qui'yanj naco sisi gui'yaj fuerza sichre Satanás si gui'yaj Jesús gaquin!. ²Ni da' guisíj huij xia güi, ni nun xa Jesú nugüi nigan!. Ni ngaa guisíj daj achin xi'na' riqui sij. ³Ngaa ni ga'na' sichre Satanás digya' yun'unj-ún' man'an Jesús. Ni gataj sichre:

—Sisi xanga' re' huín re' da'níj Yan'anj, ngaa ni nagui'yaj so' si ganahuin yej ngaj nan chrachrúnj xa so' stoj. —Daj gataj sichre gunun Jesús.

⁴Sani gataj Jesús:

—Gataj si-nuguan' Yan'anj: "Sé urin chrachrúnj gui'yaj si ga ni'na' ni ngüi mánj. Sani ga ni'na' xanga' ni ngüi gui'yaj daran' ni nuguan' 'na' rian Yan'anj anj." Daj gataj Yan'anj. —Daj gataj Jesús gunun sichre.

5 Ngaa ní nicaj sichre Satanás Jesús gan'anj-án' xuman' hua sá' gu'naj Jerusalén. Ní gahui Jesús chra' nuhui nico, gui'yaj sichre.

Ngaa ní gataj sichre gunun Jesús:

6 —Sisi yya huín re' da'níj Yan'anj, ngaa ní güej re' níca' nánj. Daj si gataj si-nuguan' Yan'anj:

Ga'nin' Yan'anj sun rian ni ángel sisi ga'na' dugumi ni sí' man'án so' aj.

Ngaa ní guinij so' rian ra'a ni ángel sisi si garij so' dacój so' gui'yaj yej mánj.

Da'nga' daj gataj si-nuguan' Yan'anj. —Gataj sichre gunun Jesús.

7 Ngaa ní gataj Jesús gunun sichre: —Ní hué daj hua níca si-nuguan' Yan'anj nej: “Sí xacaj so' cuenta sisi xanga' si-nuguan' Señor huin Dan'anj so' mánj.” Hué daj gataj si-nuguan' Yan'anj anj. —Daj gataj Jesús gunun sichre.

8 Hué dan ní nicaj sichre Satanás Jesús gan'anj-án' 'ngo quij xacan. Ní digyán sichre daran' xuman' man chruhua xungüi rian Jesús. Ní digyán sichre daj hua 'ueé daran'anj. **9** Ngaa ní gataj sichre gunun Jesús:

—Riquij daran' nan rián re' sisi guiniquin' ráj dacoj re' riánj. Ní ga'mi sa' re' riánj anj. —Daj gataj sichre gunun Jesús.

10 Ngaa ní gataj ruhua' yún Jesús gunun sichre Satanás:

—Guxun so' man'án so' riánj huin so' Satanás. Daj si gataj si-nuguan' Yan'anj: “Ganiquin' ráj dacoj né' rian Señor huin Dan'anj né'. Ni dagahuin né' rian urin Yan'anj anj.” Hué daj gataj Yan'anj. —Daj gataj Jesús gunun sichre.

11 Ngaa ní gahuin anéj sichre rian Jesús. Ní ga'ná' chraquij yun'unj ni ángel Jesús.

Jesús principia su ministerio

12 Ní ngaa gunun Jesús sisi garij ni sij ducuaga' Juan, ngaa ní nán' sij estado Galilea. **13** Ngaa ní gahui sij xuman' Nazaret gan'anj sij gane sij xuman' Capernaum huin 'ngo xuman' ngaj du'ua laguna huin do'ój ni da'níj nungüej tsínj gu'naj Zabulón nga Neftalí.

14 Ní hué daj gui'yaj Jesús sisi gahuin yya daj rún' ga'mi Isaías huin sí' tsínj ga'mi si-nuguan' Yan'anj asij ná. **15** Ní gataj sí':

Nan huin do'ój Zabulón nga do'ój Neftalí.

Ní hué yu'uj nan gache né' guisij né' du'ua laguna xxi.

Ní yu'uj nan huin anéj chrej du'ua xinéj nnee gu'naj Jordán.

Ní gu'naj yu'uj nan estado Galilea rian man ni ngüi 'na' anéj chrej aj.

16 Ní ngüi man rian hua rumi', ní guini'i ni sij 'ngo yan'an xxi.

Ní guixiguin yan'an daj rian ni ngüi ruhua gahui', gui'yaj Yan'anj.

Hué daj garun Isaías asij ná.

17 Ní asij güi daj, ni gaxili' Jesús ga'mi sij rian ni ngüi. Ní gataj sij:

—Ganani ruhua a ni é re' xi'lí si-gaquin' a ni é re'. Daj si 'na' gahuin nichrun' güi guinicaj sun Yan'anj nne xata' rian án re'. —Daj gataj Jesús gunun ni sij.

18 Ni ngaa gachéj Jesús du'ua laguna xxi gu'naj Galilea, ní guini'i sij nungüej jnanj tsínj daj. Ní 'ngo

tsínj daj gu'naj Simón. Ni hué daj gu'naj sij Pedro nej. Ni jnánj sij gu'naj Andrés. Ni a'níj nungüej sij nnánj chruhua nnee. Daj si tsínj ri' xucuaj huin nungüej sij. ¹⁹Ni gataj Jesús gunun nungüej sij:

—Guinico' nungüej é re' man'ānj anj. Ngaa ni daj rún' gui'yā sisí ri' ni é re' xucuaj, da'nga' daj guíri' a ni é re' ni tsínj guxuman ruhua ni'yaj man'ānj. —Daj gataj Jesús gunun nungüej sij.

²⁰Hué dan ni 'ngo hora, ni duna nungüej sij xinánj sij. Ni guinico' nungüej sij Jesús.

²¹Ni ngaa huaj Jesús doj, ni guini'lí sij yahuij jnanj tsínj daj. Ni 'ngo sij huin Jacobo da'níj Zebedeo. Ni jnánj sij huin Juan. Ni mān anin' da'níj Zebedeo chruhua 'ngo río achéj rian nnee. Ni nagui'yaj sa' anin' sij nnánj ri xucuaj. Ngaa ni gaquíñ Jesús ga'na' nungüej jnanj sij. ²²Ngaa ni 'ngo hora, ni duna nungüej sij río nga chrej nungüej sij. Ni guinico' nungüej sij Jesús gan'anj nungüej sij.

²³Hué dan ni gachéj Jesús nin' gachra' estado Galilea. Ni digyán sij nuguan' sa' chruhua si-nuhui ni tsínj mān ni xuman' daj. Ni ga'mi sij nuguan' sa' xi'í si nicaj sun Yan'anj rian né!. Ni gui'yaj sij sisí ganahuin daran' ni ngüi ran' xi'í nga ni ngüi a'nan' nej. ²⁴Ngaa ni nin' gachra' estado Siria ga'mi ni ngüi xi'í si gui'yaj Jesús. Ngaa ni nicaj ni sij daran' ni ngüi a'nan' ga'i rian xi'í ga'na' ni sij rian Jesús. Ni ga'na' ni ngüi a'ngaj nga ni ngüi nūn sichre niman nej, ni ngüi sinúnj nej nga ni ngüi nare' dacój nej. Ni nahuin daran' ni sij, gui'yaj Jesús. ²⁵Ni

nico ni ngüi 'na' estado Galilea nga ni ngüi 'na' estado Decápolis nej, ni ngüi mān xuman' Jerusalén nga ni ngüi 'na' estado Judea nej, ni ngüi 'na' anéj chrej xinéj nnee gu'naj Jordán nico' ni sij Jesús ga'na' ni sij.

El Sermón del monte: Las bienaventuranzas

5 Ni ngaa guini'i Jesús sisi 'na' nico ni ngüi rian sij, ngaa ni gahui sij chra 'ngo quij gan'anj gane sij. Ni ga'na' ni tsínj nico' sij rian sij. ²Ngaa ni gaxi'lí sij digyán sij nuguan' sa' rian ni sij. ³Ni gataj Jesús:

—Hua 'ueé rian ni tsínj ni'lí sisí achin gahuin sa' ni sij rian Yan'anj. Daj si guíman xāngā' ni sij xata' rian nicaj sun Yan'anj anj.

⁴'Ni hua 'ueé rian ni tsínj a'mi naj. Daj si nahuin ra'a ni sij xungüi, gui'yaj Yan'anj anj.

⁵'Ni hua 'ueé rian ni tsínj a'mi naj. Daj si nahuin ra'a ni sij xungüi, gui'yaj Yan'anj anj.

⁶'Ni hua 'ueé rian ni tsínj huin ruhua gui'yaj nica. Ni daj rún' huin ró' ngaa achin xi'nā riquí', así ngaa nago'ó' nnee, ni da'nga' daj huin ruhua ni sij gui'yaj nica ni sij. Ni hua 'ueé rian ni sij. Daj si gahuin sa' niman ni sij, gui'yaj Yan'anj.

⁷'Ni hua 'ueé rian ni tsínj ani yaco ruhua ni'yaj ango dugüi' ni sij. Daj si gáni yaco ruhua Yan'anj ni'ya ni sij aj.

⁸'Ni hua 'ueé rian ni tsínj hua sa' niman. Daj si guini'i ni sij man'an Yan'anj anj.

⁹'Ni hua 'ueé rian ni tsínj 'yaj sisi na'mi ni dugüi' ni sij huin ni ngüi unun'. Daj si gu'naj ni sij da'níj Yan'anj anj.

10'Ní hua 'ueé rian ni tsínj ran' sayun xi'í si 'yaj nicá ni sij rian Yan'anj. Daj si guiman xanga' ni sij xata' rian nicaj sun Yan'anj anj.

11'Ní hua 'ueé rian a ni é re' ngaa ga'mi quij ni ngüi rian án re' xi'ij. Ni chran' yun'unj ni sij ni é re' nej. Ni ga'mi yya ni sij daran' nuguan' quij hua rian ni é re' xi'í si nicaj dugüi' a ni é re' ngäj. **12**Gahuin nia! ruhua ni é re'. Nin' ruhua gahuin nia! ruhua ni é re' aj. Daj si nahuin ra'a ni é re' premio xata!. Ni hué daj chran' yun'unj ni sij ni tsínj ga'mi si-nuguan' Yan'anj asij ná ngaa achin guiman a ni é re'.

La sal de la tierra

13'Rún' huin yan huin a ni é re' chruhua xungüi nan. Sanj sisi nitaj si 'nin' yan daj, ni nitaj daj gui'yaj né' sisi nahuin 'nin' mánj. Nitaj si n'yan mánj. Maan si guere'ej né' ne' chrej xe' sisi gurun ni ngüi yan guere' da aj.

La luz del mundo

14'Hué a ni é re' huin yan'an xiguin chruhua xungüi nan. Ni si ga'ue guixij hui 'ngo xuman' ngaj chra' quij xacan mánj. **15**Ní ngaa arún' yan'an chra' 'ngo candil, ni si gune' hui' candil riqui chrúnj ganun yan'an da mánj. Sanj guto' xata' sisi guixiguin yan'an daj rian daran' ni ngüi man chruhua hue', gui'yaj candil daj aj. **16**Ní hué ducuánj daj gui'yaj ni é re' sisi gahuin ni é re' 'ngo si xiguin rian ni ngüi. Ni ngaa guini'i ni sij si 'yaj sa' a ni é re', ni ga'mi sa' ni sij rian chrej a ni é re' nne xata!.

Jesús y la ley

17'Si gani ruhua ni é re' sisi ga'náj ga'né si-ley Yan'anj ngá si digyán ni

tsínj ga'mi si-nuguan' Yan'anj asij ná. Sé daj huin mánj. Sanj ga'náj sisi xacaj ni ngüi cuenta daj ataj yya ni nuguan' daj. **18**Xanga' yya atá gunun a ni é re' sisi da ganahuij xata' nga yo'ój, ni a 'ngo letra le, ni a 'ngo punto le si guere' rian si-ley Yan'anj mánj. Daj si hua niqan sisi gahuin yya daran'anj daj rún' ataj rian si-ley Yan'anj anj. **19**Hué dan ni un tsínj na'uej ruhua dagahuin 'ngo nuguan' le'ej a'nin' Yan'anj sun riun', ni hué daj digyán sij si gui'yaj ni dugüi' sij, ngaa ni gahuin sij 'ngo tsínj guinico' da rucu rian nicaj sun Yan'anj. Sanj tsínj dagahuin nuguan' daj, ni hué daj digyán sij rian ni ngüi, ni gahuin achij sij rian nicaj sun Yan'anj anj.

20'Daj si ataj snan'án gunun ni é re' sisi 'yaj nica ni tsínj digyán si-ley Yan'anj ngá ni tsínj fariseo, ruhua ni sij. Sanj sisi si gui'yaj nica ni é re' doj rian ni ngüi daj rún' 'yaj ni tsínj daj, ngaa ni nitaj aman gatu a ni é re' rian nicaj sun Yan'anj mánj.

Jesús y la ira

21'Hua gunun a ni é re' si gataj ni sij rian ni xi ni é re': "Si dagahuí' re' ngüi mánj. Daj si tsínj dagahuí' dugüi' sij, ni gahuin sij castigo, gui'yaj Yan'anj anj." Daj gataj ni sij. **22**Sanj ataj snan'anj man'ánj gunun a ni é re' sisi un tsínj ga'man ruhua ni'ya dugüi' sij, ni gahuin sij castigo, gui'yaj Yan'anj. Ni sisi ga'mi quij 'ngo tsínj rian dugüi' sij, ni gan'anj sij rian junta nico. Ni sisi gataj 'ngo tsínj sisi nuhui' sta'nga' dugüi' sij nun, ni hua xi'í si gan'anj sij rian yan'an gaca sij aj.

²³'Hué dan ní sisi nicáj re' 'ngo ofrenda huáj re' rian Yan'anj, ní hué yu'uj daj gananun ruhuá re' sisi gui'yáj re' 'ngo gaquin' rian 'ngo dugüí' re', ²⁴ngaa ní hué gue yu'uj daj duna re' si-ofrendá re' daj, ní gan'anj siní re' na'mi re' nga dugüí' re'. Ngaa ní nanicaj ruhua' yún re', ní ga'ui' re' ofrenda daj rian Yan'anj anj.

²⁵'Ní rá'yanj gá'mi 'ueé re' nga tsínj unun' nga re' ngaa huáj re' nacaj dugüí' re' nga sij chrej sisi si naga'ui' sij man'án re' rian güesi mánj. Ngaa ní sisi si na'mi nungüej é re', ngaa ní naga'ui' güesi man'án re' rian caíde. Ní gari caíde daj ducuaga' man'án re' aj. ²⁶Ní ataj snan'án gunun re' sisi nitaj si huaj gahui re' yu'uj daj da guisij naru'ue re' daran' san'anj da'uí re'. Da ni gahui re' aj.

Jesús y el adulterio

²⁷'Hua gunun a ni é re' si gataj ni sij asij ná: "Si gal'mí re' nga nica dugüí' re' mánj." Daj gataj ni sij. ²⁸Sanj ataj snan'án gunun a ni é re' sisi un tsínj ni'yaj rian 'ngo yun'unj xana ngaa huin ruhua sij ni'yaj sij rian unj, ní hua ga'mi niman sij nga unj. ²⁹Hué dan ní sisi rundij rián re' ne' chrej ra'a sa' re' huin ruhua gui'yaj gaquin', ngaa ní guiri re' guere' re' aj. Naanj sa' huin sisi guere' 'ngo rundij rián re' sisi gan'anj gaca nnee cúj re' rian yan'an anj. ³⁰Ní sisi ne' chrej ra'a sa' re' huin ruhua gui'yaj gaquin', ngaa ní ga'nin' re'. Naanj sa' huin sisi guere' anéj chrej ra'a re' sisi gan'anj ni'yá re' rian yan'an anj.

Jesús y el divorcio

³¹'Ní gataj ni sij asij ná: "Ní un tsínj guere'ej nica, ní hua nian náchi

nicaj sij yanj ata naga'ui' sij ra'a ún!'" Daj gataj ni sij. ³²Sanj ataj snan'anj man'ánj gunun a ni é re' sisi un tsínj guere'ej nica ngaa sé xi'lí si a'mi ún' nga ango tsínj, ngaa ní da'ui ún' gaquin' ngaa xacaj dugüí' ún' nga ango tsínj, gui'yaj sij. Ní tsínj xacaj yun'unj xana guere'ej nica, ní daj rún' yaj tsínj ga'mi nga nica ango tsínj, 'yaj sij aj.

Jesús y los juramentos

³³'Ní hua gunun ni é re' sisi gataj ni sij rian ni xi ni é re': "Ní si duná re' si dagahuín re' nga nuguan' guta' nica yyá re' rian Señor mánj." Daj gataj ni sij. ³⁴Sanj ataj snan'anj man'ánj gunun a ni é re' sisi si guta' nica yya á re' mánj. Ní si guta' nica yya ni é re' rian xata' si rian nicaj sun Yan'anj huin nej mánj. ³⁵Ní si guta' nica yya á re' rian xungüí mánj. Daj si rian uta' Yan'anj daco huin nánj. Ní si guta' nica yya ni é re' rian xuman' Jerusalén mánj. Daj si Jerusalén huin rian nicaj sun Yan'anj xanga' huin rey huin achij. ³⁶Ní si guta' nica yya ni é re' rian chra ni man'an ni é re' mánj. Daj si si ga'ue gui'yaj ni é re' si ga gatsi, ni ga maru urin hué chra ni é re' mánj. ³⁷Maan si gataj a ni é re' sisi ga'ue, asi si ga'ue mánj. Si guta' ni é re' ango nuguan' ga'mi a ni é re' chra nuguan' da mánj. Daj si nuguan' uta' ni é re' ga'mi ni é re' huin 'ngo nuguan' xi'lí aj.

El amor hacia los enemigos

³⁸'Hua gunun a ni é re' sisi gataj ni sij asij ná: "Sisi guere' rundij rián re', gui'yaj dugüí' re', ngaa ní ga'ue guiri re' rundij rian tsínj gui'yaj daj. Ní sisi güéj 'ngo yán' re', gui'yaj dugüí' re', ngaa ní ga'ue dugüéj re'

yan' tsínj gui'yaj da aj." Daj gataj ni sij.³⁹ Sani ataj snan'anj man'anj gunun a ni é re^l: "Ga'nin' ruhua a ni é re^l ngā 'ngo tsínj chran' yun'unj a ni é re^l. Ni sisi ga'ui' 'ngo tsínj daj xi'níj rián re^l ne^l chrej sa^l re^l, ngaa ni ga'nin' ruhuá re^l sisi ga'ui' sij anéj re^l nej." Daj atā gunun a ni é re^l.⁴⁰ Ni sisi huin ruhua 'ngo tsínj daj gunun' ngā re^l ga'ne sij si-gató re^l, ngaa ni ga'nin' ruhuá re^l sisi ga'ne sij si-retó re^l nej aj.⁴¹ Ni sisi ga'nin' 'ngo tsínj daj sun sisi gata re^l si'yaj sij guinicaj re^l 'ngo kilómetro, saní güij nícaj re^l da huij kilómetro aj.⁴² Ni ga'ui' re^l rian go'ngo ni ngüi achínj 'ngo rasun rián re^l. Ni ga'ui' xiquínj re^l rian go'ngo ni ngüi achínj xiquínj rián re^l nej.

⁴³ Ni hué daj gunun a ni é re^l sisi gataj ni sij asij ná: "Gahuin 'i ruhuá re^l ni'yaj re^l ni ngüi nícaj dugüi' ngā re^l. Sani sij gahuin 'i ruhuá re^l ni'yaj re^l ni ngüi unun' ngā re^l mánj." Daj gataj ni sij.⁴⁴ Sani ataj snan'anj man'anj gunun a ni é re^l: "Gahuin 'i ruhua ni é re^l ni'yaj ni é re^l ni ngüi unun' ngā ni é re^l. Ni ga'mi 'ueé ni é re^l rian ni tsínj a'mi quij rian ni é re^l. Ni gui'yaj sa^l ni é re^l rian ni tsínj nun huin xan' ruhua ni'yaj ni é re^l. Ni gachinj jni'yaj ni é re^l rian Yan'anj xi'l ni ngüi a'mi quij rian án re^l aj." Daj atā gunun a ni é re^l.⁴⁵ Ngaa ni gahuin ni é re^l da'níj chrej ni é re^l nne xata!. Daj si hué man'an sij 'yaj si guixiguín güi rian ni ngüi sa^l ngā rian ni ngüi nitaj si sa^l. Ni 'yaj man'an sij sisi 'na^l gumán rian ni ngüi hua níca niman nga rian ni ngüi nitaj si hua nica niman nej.⁴⁶ Ni sisi 'i ruhua ni é re^l ni'yaj ni é re^l urin ni ngüi 'i ruhua

ni'yaj man'an re^l, ngaa ni sij gani ruhuá re^l sisi gui'yaj sa^l Yan'anj ngā re^l mánj. Daj si hué daj 'yaj ni tsínj digya' yun'unj huin ni tsínj a'nej san'anj güenda gobierno.⁴⁷ Ni sisi ga'mi sa^l ni é re^l rian urin ni jnánj án re^l, ni nitaj si 'yaj sa^l ni é re^l daj ngā ango ni ngüi mánj. Daj si hué daj 'yaj ni tsínj 'na^l anéj chrej huin ni tsínj nun ni'l daj hua Yan'anj anj.⁴⁸ Ngaa ni ga sa^l nin' niman án re^l daj rún' hua sa^l nin' niman chrej ni é re^l nne xata! aj.

Jesús y la limosna

6 ¹ Ni dugumi a ni é re^l man'an ni é re^l ngaa 'yaj sa^l ni é re^l rian ni ngüi. Ni sé daj gui'yaj ni é re^l xi'l si gani ruhua ni ngüi sisi sa^l ni é re^l mánj. Daj si sisi hué daj gui'yaj a ni é re^l, ngaa ni sij gui'yaj sa^l Yan'anj nne xata! rian ni é re^l mánj. ² Hué dan ni ngaa huin ruhuá re^l ga'ui' re^l san'anj rian ni ngüi yaco ran!, ni sij gui'yaj nne re^l rian ni ngüi mánj. Daj si hué daj 'yaj ni tsínj nne sisi ga'mi sa^l ni ngüi xi'l ni sij, ruhua ni sij. Ni hué daj 'yaj nne ni sij chruhua nuhui ngā cayu nej. Xanga! atā gunun ni é re^l sisi ngaa 'yaj nne ni sij rian ni ngüi, ni hua ganacaj ni sij si-premio ni sij. Ni a 'ngo rin xico' si naru'ue Yan'anj rian ni sij mánj. ³ Sani ngaa chraquij re^l rian ni ngüi yaco ran!, ni sij xacaj cuenta ne^l chrej ra'a rotsi re^l si 'yaj ra'a sa^l re^l mánj. ⁴ Ngaa ni chraquij hui re^l ngaa ga'ui' re^l rian ni ngüi yaco ran!. Ngaa ni gui'yaj 'ueé chrej re^l nne xata! ngā re^l guin'i daran! ni ngüi si ni'l Yan'anj si 'yaj hui re^l aj.

Jesús y la oración

⁵ Ni ngaa gachinj jni'yaj a ni é re^l rian Yan'anj, ni sij gui'yaj á re^l daj

rún' 'yaj ni tsínj nne mánj. Daj si aran' ruhua ni sij guiniquin' ni sij chruhua nuhui nga cayu gachinj jni'yaj ni sij sisi guini'i ni ngüi, ruhua ni sij. Xanga' atā gunun a ni é re' sisi nga si 'yaj ni sij daj, ni hua ganacaj ni sij si-premio ni sij. ⁶Sani ngaa gachinj jni'yaj man'án re' rian Yan'anj, ni natu urín re' chruhua ducuá re'. Ni naranj re' rian hue!. Ngaa ni gachinj jni'yaj re' rian chréj re' nne yu'u'j daj nga re' huin Yan'anj. Ngaa ni gui'yaj 'ueé chréj re' nga re' si ni'i-ín' si 'yaj hui re' aj. ⁷Ni ngaa gachinj jni'yaj a ni é re' rian Yan'anj, ni si nacáj re' raruhua ga'mi re' nuguan' nitaj si ní'yanj daj rún' 'yaj ni ngüi nico' ango yan'anj mánj. Daj si ani ruhua ni sij sisi unun dan'anj ni sij xi'í si a'mi xacan ni sij. ⁸Ni si gui'yaj a ni é re' daj rún' 'yaj ni ngüi da mánj. Daj si asij achin gachinj jni'yaj ni é re' rian chrej ni é re' huin Yan'anj, ni hua ni'i si achin rian ni é re' nánj.

⁹'Ngaa gachinj jni'yaj a ni é re' rian Yan'anj, ni naanj gataj ni é re' gunun Yan'anj:

Tata chré' nne xata!, huin ruhua únj si ga'mi 'ueé ni ngüi si-xugüi man'án re' aj.

¹⁰Ni huin ruhua únj sisi ga'na' re' guinicaj re' sun rian xungüi nan anj.

Ni daj rún' dagahuin sa' ni si mán xata' rian man'án re', ni hué daj dagahuin sa' ni ngüi mán nica' rian man'án re', ruhua únj.

¹¹Ni riqui re' si xá ni únj da' go'ngo güi.

¹²Ni daj rún' guinicaj únj 'ngo niman nico rian ni tsínj

gui'yaj gaquin' rian únj, ni da'nga' daj guinicaj re' 'ngo niman nico rian únj.

¹³Ni si duná re' si digya' yun'unj si quij ni únj mánj.

Sani ga'ní re' si ga nini únj rian si quij hua daj.

Daj si man'án re' nicaj daran' sun. Ni nicáj re' daran' fuerza nej.

Ni hua 'ueé nin' nné re'.

Ni hué daj gahuin re' niganj nin', ruhua únj. Amén.

Hué daj ga'mi a ni é re' ngaa gachinj jni'yaj á re' rian Yan'anj anj. ¹⁴Ni sisi guinicaj a ni é re' 'ngo niman nico rian si-gaquin' ni ngüi, ni hué daj guinicaj chrej ni é re' nne xata' 'ngo niman nico rian si-gaquin' ni é re' aj. ¹⁵Sani sisi si ga'uej ruhua á re' guinicaj á re' 'ngo niman nico rian si-gaquin' ni ngüi, ngaa ni si guinicaj chrej ni é re' niman nico rian xi'í si-gaquin' ni é re' mánj.

Jesús y el ayuno

¹⁶'Ni si gui'yaj yaco rian ni é re' ngaa 'yaj ni é re' ayuno daj rún' 'yaj ni tsínj nne mánj. Xi'í si 'yaj ni sij daj, ni guini'i ni ngüi si 'yaj ni sij ayuno, ruhua ni sij aj. Xanga' atā gunun ún re' sisi nga si 'yaj ni sij daj, ni hua ganacaj ni sij si-premio ni sij aj. ¹⁷Sani ngaa gui'yaj man'án re' ayuno, ni gana'nin' re' rián re'. Ni gari re' gasiti chra re' nej.

¹⁸Ngaa ni si xacaj ni ngüi cuenta si 'yáj re' ayuno mánj. Sani urin chréj re' nne yu'u'j daj nga re' ni'i nej aj. Ni gui'yaj 'ueé-é' nga re' nánj.

Tesoros en el cielo

¹⁹'Ni si nara sa' ni é re' nico rasun chruhua xungüi nan mánj. Daj si

xungüi nan, ní xij xucu rasun daj. Ní xa daqui yo gaga' daj nej aj. Ní atuj tsínj tu hue' nej. ²⁰Sani nara sa' ni é re' rasun sa' xata' aj. Daj si yu'uj daj, ní nitaj si xij xucu atsij mánj. Ní nitaj si xa daqui yo ni gaga' da mánj. Ní nitaj si atuj tsínj tu hue' da mánj. ²¹Daj si rian nicaj ni é re' si'yaj ni é re', ní hué yu'uj daj nani ruhua ni é re' aj.

La lámpara del cuerpo

²²Rún' huin 'ngo yan'an xiguín huin rundij rian né'. Ní ngaa xiguín sa' rundij rian né', ní ni'yaj sa' né'. ²³Sani sisí nitaj si xiguín sa' rundij rian né', ní si ga'ue nari' né' 'ngo chrej sa' gan'anj né' mánj.

Dios y las riquezas

²⁴Ní a 'ngo tsínj si ga'ue dagahuin rian huij xuru'ue mánj. Daj si nun huin xan' ruhua sij ni'yaj sij 'ngo xuru'ue. Ní aran' ruhua sij ni'yaj sij ango xuru'ue. Así guinicaj dugüi' sij ná 'ngo xuru'ue, ní nun ga'mi sa' sij ná ango xuru'ue mánj.

El afán y la ansiedad

²⁵'Hué dan ní ataj snan'an gunun a ni é re' sisí si gahuin ruhua á re' xi'í daj guiman án re' xá á re', ní go'o a ni é re' mánj. Ní si gahuin ruhua ni é re' nga atsij gunun nnee cúj ni é re' mánj. Ni'i ni é re' sisí gahuin ni'na' ni é re', gui'yaj Yan'anj. Xi'í daj ní huin nucuaj Yan'anj ríqui si xá á re' nej. Ní huin nucuaj Yan'anj ríqui si gunun atsij nnee cúj ni é re' nej.

²⁶'Ní'yaj ni é re' ni xataj mán xata!. Nitaj si unun xuj nnaq nej mánj. Ní nitaj si ri xuj nnaq nej

mánj. Ní nitaj si nara sa' xuj chruhua guru nej mánj. Sani a'ui' chrej ni é re' nne xata' xa xuj. Ní ní'yanj nin' ruhua ni é re' daj nga si ní'yanj ni xataj daj. ²⁷Ní ga'ue gahuin xacan ni é re' doj xi'í si ganani nico ruhua ni é re' ní'. Si ga'ue mánj.

²⁸'Ní un sin huin ní huin ruhua ni é re' ni'yaj ni é re' xi'í si-gan' ni é re' únj. Ní'yaj ni é re' daj achij 'ngo yaj lirio ríqui quij. Nitaj si 'yaj sun yaj da mánj. Ní nitaj si hua'a yaj da yu'uej mánj. ²⁹Sani atā gunun ni é re' sisí hua nia' nin' ruhua yaj daj daj nga si hua nia' rey Salomón ngaa gunun sij 'ngo atsij sa' nin' ruhua. ³⁰Ní dugumi Yan'anj nga coj man ríqui quij. Ní yyaj ni man coj daj. Sani a'yoj ní gari yan'an ni sij coj daj. Ní sisí hué daj ríqui Yan'anj si-gan' coj daj, ngaa ní huaj nin' ruhua ríqui Yan'anj doj si-gan' ni é re' huin ni é re' ni ngüi xuman doj ruhua ní'yaj Yan'anj.

³¹'Hué dan ní si gahuin ruhua ni é re' mánj. Ní si gataj ni é re': "Ní un sin huin xo!. Ní un sin huin go'o!. Ní un atsij gunun' únj." Sé si gahuin ruhua ni é re' nga da mánj. ³²Daj si ni tsínj nico' ango yan'anj nano' ni rasun daj. Sani ni'i chrej ni é re' nne xata' sisí ní'yanj ni é re' ni rasun daj. ³³Hué dan ní ganahuij sini ruhua ni é re' nga xi'í si nicaj sun Yan'anj rian ni é re'. Ní hué daj ganahuij ruhua ni é re' nga si gui'yaj nica ni é re' daj rún' aran' ruhua Yan'anj anj. Ngaa ni ganahuij ra'a ni é re' daran' ni rasun daj, gui'yaj Yan'anj. ³⁴Hué dan ní si gahuin ruhua ni é re' nga si guiran' ni é re' a'yoj. Daj si

a'yoj, n̄i ga'ue ḡani ruhua ni é re'
xi'í a'yoj. Da go'ngo güi, n̄i hua si
guiran' ni é re' xi'í da! go'ngo güi
daj.

El juzgar a los demás

7 'Sí ga'ui' ni é re' gaquin' dugüi'
ni é re' mánj. Ngaa n̄i sí ga'ui'
Yan'anj gaquin' ni é re' mánj. ²Daj
si daj rún' a'ui' ni é re' gaquin'
dugüi' ni é re', n̄i hué daj gui'yaj
Yan'anj n̄ga ni é re' aj. Ni daj rún'
'yaj ni é re' n̄ga ni ngüi, n̄i hué daj
gui'yaj Yan'anj n̄ga ni é re' aj. ³Ní
n̄un sin huin n̄i n̄i'yaj ni é re' sisí
n̄un daru chrun rundij rian jnánj
re' únj. Sani nitaj si n̄i'yáj re' si
n̄un 'ngo caj rundij rian man'án re'.
⁴Ní daj ga'ue gataj re' gunun jnánj
re' saj: "Guiniquin' acuán' re', n̄i
guirij daru chrun n̄un rundij rián re'
aj." Sé daj gataj re' sa mánj. Daj si
n̄un 'ngo caj rian man'án re'. ⁵Tsínj
digya' yun'unj huín re'. Guiri siní
re' caj n̄un rián re' aj. Ngaa n̄i ga'ue
guini'yaj sa' re' guiri re' daru chrun
n̄un rundij rian jnánj re' aj.

⁶'Sí ga'ui' ni é re' 'ngo rasun' n̄a'
rian Yan'anj rian ni tsínj quij hua
mánj. Daj si rún' huin xuhue huin
ni sij. Ní sí ga'ui' ni é re' 'ngo yej sa'
gu'naj perla rian ni tsínj quij hua
mánj. Daj si rún' 'yaj xacáj 'yaj ni
sij. Ni si ruhuaj ni gurun dacój xuj.
Ní n̄anicaj xuj xá xuj ni é re'. Ní daj
rún' 'yaj xucu daj da'nga' daj 'yaj ni
tsínj quij hua aj.

La oración y la regla de oro

⁷'Gachinj ni é re' si achin rian
án re' rian Yan'anj anj. Ni riqui
Yan'anj rian ni é re'. Ní n̄ano' ni
é re' nuguan' sa'. Ní guiri' ni é re'

nej. Gui'yaj ni é re' daj rún' 'yaj 'ngo
tsínj ita ra'a rian hue' n̄ga Yan'anj,
ngaa n̄i na'ni Yan'anj rian hue' gatu
ni é re' aj. ⁸Daj si daran' ni ngüi
achínj rian Yan'anj, n̄i n̄ahuin ra'a
ni sij n̄ga si achínj ni sij aj. Ní ni
ngüi nano', n̄i nari' ni sij. Ní ni ngüi
ita ra'a rian hue', n̄i na'ni Yan'anj
gatu ni sij. ⁹Ní sisí hua 'ngo ni é
re' hua da'nj, n̄i ga'ue ga'ui' ni é
re' yej ra'a ngaa achin chrachrúnj
xaj ní!. Sé daj huin mánj. ¹⁰Ní ga'ue
ga'ui' ni é re' 'ngo xucuáj ra'a ngaa
achin xucuaj ní!. Sé daj huin mánj.
¹¹Ní sé si sa' niman ni é re', sani n̄i'i
ni é re' ni rasun sa' ga'ui' ni é re'
rian ni da'nj ni é re' aj. Hué dan ni
huaj n̄in' ruhua si riqui chrej ni é
re' nne xata' nuguan' sa' rian ni ngüi
achínj rian Yan'anj anj.

¹²'Ngaa n̄i daj rún' huin ruhua ni
é re' gui'yaj sa' ni ngüi n̄ga ni é re'
n̄i da'nga' daj gui'yaj sa' ni é re' n̄ga
ni sij. Daj si hué nan huin si ruhuaj
gata si-ley Yan'anj n̄ga ni nuguan'
gataj ni tsínj ga'mi si-nuguan'
Yan'anj asij ná aj.

La puerta estrecha

¹³'Gátu ni é re' rian hue' chruj
rian nne Yan'anj anj. Daj si gara'
rian hue' atuj ni ngüi ga n̄i'ya. Ni
gan'an chrej gara' daj huin rian
gan'anj ga n̄i'ya niganj ni sij aj. Ni
hua nico ni ngüi huaj rian chrej
gara' daj. ¹⁴Sani chruj rian hue' atuj
ni ngüi gane niganj. Ni chruj chrej
huaj ni sij. Ni doj ni ngüi nari' chrej
chruj da aj.

Por sus frutos los conoceréis

¹⁵'Gá cuidado ni é re' n̄ga ni tsínj
ataj sisí a'mi ni sij si-nuguan' Yan'anj.

Sanj sé si x̄anga' ni sij mánj. Daj si 'na' ni sij rian ni é re' rún' huin xachij huin ni sij nánj. Sanj ne' chruhua niman ni sij huin ni sij 'ngo xucu huee nánj. ¹⁶Ni ga'ue guini'l'i ni é re' sisí tsínj digya' yun'unj huin ni sij nga si 'yaj ni sij. Guta né' uva chr̄a 'ngo coj tanj ní'. Sé daj huin mánj. Ni guta né' higo chr̄a coj ni'yo ní'. Sé daj huin mánj. ¹⁷Daj si daran' chrun sa', ni ayu chruj sa' chr̄a aj. Sanj chrun nitaj hua sa', ni hué daj ayu chruj nitaj si hua sa' chraj. ¹⁸Ni chrun sa' si ga'ue gayu chruj nitaj si hua sa' chraj nej mánj. Ni chrun nitaj si hua sa', ni si ga'ue gayu chruj hua sa' chraj nej mánj. ¹⁹Daran' chrun na'ue gayu chruj sa' chra, ni ga'nin' ni sij, ni gara sij rian yan'an gaca man'an. ²⁰Hué ducuánj daj ga'ue guini'l'i ni é re' nga si 'yaj ni sij sisí tsínj digya' yun'unj huin ni sij aj.

Nunca os conocí

²¹'Sé daran' ni ngüi gataj gunünj: Señor, Señor, gatu rian nicaj sun Yan'anj xata' mánj. Sanj maan si gatu ni ngüi 'yaj si aran' ruhua chrē nne xata' nánj. ²²Ni güi daj, ni gataj nico ni ngüi gunünj: "Señor, Señor, ga'mi únj si-nuguan' Yan'anj nga si-xugüi re'. Ni si-xugüi re' guiri únj nané xi'i niman ni ngüi aj. Ni si-xugüi re' guiyaj únj nico si sa' rian ni ngüi aj." Daj ga'mi ni ngüi daj riānj güi ganahuij xungüi aj. ²³Sanj gataj man'anj gunun ni sij: "Nitaj aman guini'inj ni é re' mánj. Guxun ni é re' man'an án re' riānj anj." Daj gataj man'anj gunun ni sij.

Los dos cimientos

²⁴'Ngaa ni daj rún' hua 'ngo tsínj ni'i sa' ngaa une' sij daqui ducuá

sij rian huej, ni hué daj hua 'ngo tsínj unun ni nuguan' nan anj. Ni ráj xina sij si ataj man'anj rian sij aj. ²⁵Ngaa ni gaman' 'ngo gumān xxi. Ni gara xinéj nnee. Ni ga'na' nnee ga'ui' rian ducuá sij. Ni gahui nané rian hue' daj. Sanj nun gane hue' daj. Daj si gahuin ran daqui hue' daj rian huej. ²⁶Sanj sisí hua 'ngo tsínj unun nuguan' nan, ni nun dagahuin sij nuguan' atā nan gunun sij, ni huin sij daj rún' huin 'ngo tsínj gui'yaj ducua rian yo'ój chru. ²⁷Ngaa ni gaman' 'ngo gumān xxi. Ni gara xinéj nnee. Ni ga'na' ga'ui' rian hue!. Ni gahui nané rian hue!. Ngaa ni gane ducuá sij, ni unyun guere'ej. —Daj gataj Jesús gunun ni tsínj nico' sij.

²⁸Ni ngaa guisíj nahuij ga'mi Jesús, ni gahuin yan'anj ruhua daran' ni ngüi ngä nuguan' gataj sij. Daj si sa' nin' ruhua digyán Jesús rian ni ngüi. ²⁹Ni nicaj sun nuguan' digyán sij rian ni ngüi daj. Ni sé si digyán sij daj rún' digyán ni tsínj digyán si-ley Moisés rian ni ngüi aj.

Jesús sana a un leproso

8 Ni ngaa nanij Jesús chra quij daj, ni nico' nico ni ngüi ga'na' ngä sij.

²Ngaa ni gahuin nichrun' 'ngo tsínj guiran' xi'i lepra. Ni ganiquin' ráj dacoj sij rian Jesús. Ni gataj sij: —Señor, sisí ruhuá re', ni ga'ue guiyaj gono'ó re' yünj, ni xi'ne xi'i a'nānj. —Gataj tsínj a'nan' daj rian Jesús.

³Ngaa ni guta' Jesús ra'a sij, ni gataj sij:

—Huin ruhuāj sisí ga sa' nnee cúj re'. —Daj gataj Jesús.

Ngaa ni 'ngo hora xi'nej xi'i a'nan' tsínj daj. ⁴Ngaa ni gataj Jesús:

—Ga cuidadó re' nga man'án re'. Si ganatá' re' rian ni a 'ngo ni ngüi mánj. Maan si gan'anj re' digyán re' man'án re' rian chrej. Ni nícaj re' 'ngo ofrenda ga'uil re' rian Yan'anj daj rún' ga'nin! Moisés sun güenda gahuin-ín' 'ngo da'nga' sisi hua ganahuín re'. Ngaa ni xacaj ni chrej cuenta sisi hua ganahuín re', gui'yaj man'ānj. —Daj gataj Jesús gunun tsínj daj.

Jesús sana al siervo de un centurión

⁵Ni ngaa gatúj Jesús xuman' Capernaum, ni ga'na' 'ngo snado centurión rian Jesús. Ni ga'mi yaco sij rian Jesús. ⁶Ni gataj sij:

—Señor, ngaj si-mosuj a'nán' sij ducuāj. Ni na'ue guisiqui' sij. Ni a'ngaj nin' ruhua sij. —Daj gataj snado daj.

⁷Ngaa ni gataj Jesús:

—Guchiij ni ganahuin sij, gui'yá. — Daj gataj Jesús gunun snado daj.

⁸Ngaa ni gataj snado centurión gunun Jesús:

—Señor, sé tsínj sa' huinj sisi gatu re' chruhua ducuāj. Maan si ga'nin' re' sun, ni ganahuin si-mosuj, gui'yáj re'. ⁹Daj si hua tsínj a'nin' sun riānj. Ni huéj a'nin' sun rian ni snado nej. Ni ngaa a'ní 'ngo snado gan'anj sí', ni huan'anj sí'. Ni ngaa atá ga'na' 'ngo sí', ni 'na' sí' nej. Ni ngaa a'ní si-mosuj gui'yaj sun sí', ni hué daj gui'yaj sun sí' nej. —Daj gataj snado daj gunun Jesús.

¹⁰Ni ngaa gunun Jesús si gataj tsínj daj, ni gan'anj ruhua sij. Ni gataj sij gunun ni tsínj nico' sij:

—Xanga' atá gunun ni é re' sisi nun nari'líj a 'ngo tsínj israelita

xuman ruhua rún' xuman ruhua tsínj snado nan mánj. ¹¹Ni atá gunun ni é re' sisi ga'na' nico ni ngüi 'na' ne' rian sij güi nga rian atúj güi. Ni gane ni sij nga tsínj gu'naj Abraham nga Isaac nga Jacob rian nicaj sun Yan'anj xata!. ¹²Sani ni tsínj israelita ni tsínj hua niqan gane rian nicaj sun Yan'anj, sani guere'ej Yan'anj ni sij ne' chrej xe' rian hua rumi'. Ni yu'uj daj gaco ni sij, ni xa ruj yan' ni sij xi'í sayun guiran' ni sij. Daj si na'uej ruhua ni sij guxuman ruhua ni sij ni'yaj ni sij man'ānj. —Daj gataj Jesús.

¹³Ngaa ni gataj Jesús gunun snado daj:

—Güij nqan' ducuá re', ni daj rún' guxuman ruhuá re' ni'yáj re' man'ānj, ni da'nga' daj ga aj. —Daj gataj Jesús.

Ni hué 'ngo hora daj, ni ganahuin moso daj.

Jesús sana a la suegra de Pedro

¹⁴Ngaa ni ga'na' Jesús ducuá Pedro. Ni guini'lí sij sisi ngaj nichej sí' a'nán' ún' rian nna. Ni nun gachi' ún!. ¹⁵Ni ganun ra'a Jesús ra'a ún!. Ngaa ni xi'nej gachi' ún!. Ni nachica ún!. Ni gui'yaj sun ún' rian ni sij.

¹⁶Ni ngaa guini, ni nícaj ni ngüi nico ni dugüi' ni sij nun nane xi'i gan'anj ni sij rian Jesús. Ni guiri Jesús nane xi'i nun niman ni sij nga si-nuguan' sij. Ni ganahuin daran' ni ngüi a'nán!, gui'yaj sij nej.

¹⁷Ni hué daj gahuin sisi gahuin yya daj rún' gataj tsínj gu'naj Isaías huin sí' tsínj ga'mi si-nuguan' Yan'anj asij ná. Ni gataj sí!: "Ga'nej sij si-xi'lí né!. Ni guiran' sij sayun sisi ganahuin sa' né! xi'í ni xi'lí ran' né!". Daj gataj Isaías xi'í Jesús.

Los que querían seguir a Jesús

¹⁸Ni ngaa guini'i Jesús sisi mañ nico ni ngüi ganicaj xi'nij sij, ni ga'nin' sij sun sisi gachin ni tsínj nico' sij nga sij anéj chrej du'ua laguna xxi daj.

¹⁹Ngaa ni ga'ná! 'ngo tsínj digyán si-ley Moisés ga'ná! sij rian Jesús. Ni gataj sí! gunun Jesús:

—Maestro, huin ruhuāj guinicōj man'án re! ni a gan'anj re! aj. —Daj gataj sij.

²⁰Ngaa ni gataj Jesús gunun sí!:

—Hua huej nyn xune aj. Ni hua si-gaca' xataj chréj xata' nyn xú!. Sani nitaj rian guna da'nij ni ngüi huinj mánj. —Daj gataj Jesús.

²¹Ngaa ni gataj ango tsínj nico' Jesús:

—Señor, duná re! sisi gan'anj sinij gachinj chréj aj. —Daj gataj sij.

²²Sani gataj Jesús gunun sij:

—Guinicō! re! man'ánj. Ni ga'nin' ruhuá re! si gachin' ango ni sij níman. Daj si rún' huin níman huin ni sij. —Daj gataj Jesús gunun sij.

Jesús calma la tempestad

²³Ngaa ni gahui Jesús chruhua 'ngo rio chréj rian nnee. Ni hué daj guí'yaj ni tsínj nico' sij nej. ²⁴Hué dan ni naxumán nín' ruhua nnee guí'yaj 'ngo nané nucuaj xxi. Ni gachin nnee rian rio nún ni sij. Sani gatoj Jesús. ²⁵Ngaa ni gan'anj ni tsínj nico' Jesús jnachi ni sij sí!. Ni gataj ni sij:

—Señor, ganacaj re! man'an né!. Daj si ruhua gahui' né!. —Daj gataj ni sij.

²⁶Ngaa ni gataj Jesús:

—Ni un sin huin ni xu'ui! ni é re! únj. Doj xuman ruhua ni é re! ni'yaj

ni é re! man'ānj. —Daj gataj Jesús gunun ni sij.

Ngaa ni nachica sij. Ni ga'mi huee sij rian nané ngä rian nnee daj. Ngaa ni gahuin din'inj ruhua daran'anj.

²⁷Ngaa ni gan'anj ruhua ni tsínj daj ni'yaj ni sij Jesús. Ni gataj ni sij:

—Ni un tsínj huin tsínj nan, ni da' nané ngä nnee dagahuin si-nuguan! sij únj. —Daj gataj ni tsínj nico' Jesús rian dugüi' ni sij.

Los endemoniados gadarenos

²⁸Ni guisíj Jesús anéj chrej du'ua laguna xxi rian huin do'ój ni tsínj gadareno. Ni gahui huíj tsínj nun nané xi'i níman scanij rian achin' ni níman ga'ná! nungüej sij rian nne Jesús. Ni huee nín' ruhua nungüej sij. Xi'í daj ni na'ue gachin ni ngüi chrej da mánj. ²⁹Ni gaguáj nungüej sij rian Jesús. Ni gataj nungüej sij:

—Nitaj si huaj si diguíj re! nga nungüej únj Jesús huín re! da'níj Yan'anj xanga' saj. Ga'ná! re! nan ngaa achin güi guí'yaj Yan'anj castigo nungüej únj. —Daj gataj nungüej tsínj daj gunun Jesús.

³⁰Ni hua gan' xi'í quij mán 'ngo xi'nin' xxi ni xacáj xa xuj. ³¹Ngaa ni ga'mi yaco ni nané xi'i gunun Jesús. Ni gataj ni sij:

—Sisi guiri re! únj níman nungüej tsínj nan, ni ga'nij re! gan'anj únj gátu únj níman ni xacáj daj. —Daj gataj ni nané xi'i gunun Jesús.

³²Ngaa ni:

—Güij ni é re!. —Daj gataj Jesús.

Hué dan ni gahui ni nané xi'i daj níman nungüej tsínj daj. Ni gatúj ni sij níman ni xacáj daj. Ngaa ni 'ngo gan'anj gué xi'nin' xacáj daj guinij

xú' chra' 'ngo huej. Ni guinij ni xuj chruhua laguna daj. Ni gahui' ni xuj chruhua nnee.³³ Ngaa ni gunánj ni tsínj dugumi ni xacáj daj nañ' ni sij xánj ni sij. Ni nata' ni sij daran' si gahuin ngā nungüej tsínj nun nane xi'i chruhua niman.³⁴ Hué dan ni gahui daran' ni ngüi mān xuman' daj gan'anj ni sij rian nne Jesús. Ni ngaa guini'i ni sij Jesús, ni ga'mi yaco ni sij rian sí' sisi gahui sí' xánj ni sij gan'anj sí' ango yu'u.

Jesús sana a un paralítico

9 Ngaa sij ni gahui Jesús chruhua 'ngo rio. Ni gachin sij anéj chrej du'ua laguna xachij daj. Ni nañ' sij xánj sij. ²Hué dan ni nicaj ni sij 'ngo tsínj nare' dacój rian 'ngo chrun chréj ga'ná' ni sij rian Jesús. Ni ngaa guini'i Jesús sisi daj guxuman ruhua ni sij ni'yaj ni sij sí', ni gataj sij rian tsínj a'nan' daj:

—Gahuin niá' ruhua re' jnajan. Daj si nicá 'ngo niman nico xi'i si-gaquin' re' aj. —Daj gataj Jesús gunun sij.

³Ngaa ni gani ruhua doj ni tsínj digyán ley niquin' nga Jesús: "A'mi quij tsínj nan rian Yan'anj anj." Hué daj gani ruhua ni sij.

⁴Sani guini'i Jesús si gani ruhua ni sij. Ni gataj sí':

—Ni un sin huin ni ani quij ruhua ni é re' ún. ⁵Hua huij nuguan' ga'ue gatā gunun tsínj nan. Así ga'ue gatā gunun sij: "Níca' 'ngo niman nico xi'i si-gaquin' re' ní!" Así ga'ue gatā gunun sij: "Náchica re' gache re' sa!" Ni un go'ngo nungüej nuguan' nan cu doj, ruhua á re' ún. ⁶Ni huin ruhuāj sisi xacaj

ni é re' cuenta sisi nicaj sūnj rian xungüi nan huinj da'níj ni ngüi. Ni ga'ue guinicā 'ngo niman nico xi'i si-gaquin' ni ngüi aj. —Daj gataj Jesús gunun ni sij.

Ngaa ni gataj sij gunun tsínj nare' dacój daj:

—Atā gunun man'án re' sisi nachica re', ni nacaj re' chrun chréj daj. Ni güij nan' ducuá re' nánj. —Daj gataj Jesús gunun sij.

⁷Ngaa ni nachica tsínj a'nan' dacój daj nañ' sij ducuá sij. ⁸Ni ngaa guini'i ni ngüi si gahuin, ni gan'anj ruhua ni sij. Ni ga'mi sa' ni sij rian Yan'anj. Daj si ríqui Yan'anj sisi gánuhuin ni ngüi, guí'yaj Jesús huin sí' 'ngo tsínj.

Llamamiento de Mateo

⁹ Ni ngaa gahui Jesús yu'u daj, ni guini'i sij 'ngo tsínj gu'naj Mateo. Ni nne sí' rian mesa a'nej sí' san'anj güenda gobierno. Ngaa ni gataj Jesús gunun sí':

—Guinicó' so' yünj gun!. —Daj gataj Jesús.

Ngaa ni naxuman Mateo nico' sí' Jesús gan'anj sí'.

¹⁰Ni ngaa gane Jesús rian mesa chruhua 'ngo hue' daj, ni guxuman ga'li ni tsínj a'nej san'anj güenda gobierno ngā ni tsínj 'yaj gaquin'. Ni gane nuguan'an ni sij ngā Jesús ngā ni tsínj nico' Jesús nej. ¹¹Ni ngaa guini'i ni tsínj fariseo, ni nachínj snan'anj ni sij ni tsínj nico' Jesús. Ni gataj ni sij:

—Ni un sin ni xa tsínj digyán rian ni é re' ngā ni tsínj a'nej san'anj ngā ni tsínj 'yaj gaquin' ún. —Daj gataj ni sij.

¹²Ni ngaa gunun Jesús si gataj ni sij ni gataj sí':

—Nitaj si ní'yanj ni ngüi hua sa'
nga 'ngo tsínj 'yaj gono'o mánj. Sani
ni ngüi a'nan' ní'yanj 'ngo tsínj
gono'o aj.¹³ Ngaa ni güij gahuin
chrún ni é re' үn sin huin nuguan'
nan ruhuaj gataj: “Huin ruhuāj sisi
gahuin i ruhua ni é re' guini'yaj ni
é re' ni dugüi' ni é re'. Ni nun huin
ruhuāj si riqui ni é re' xucu riānj
mánj.” Hué daj gataj rian si-nuguan'
Yan'anj. Daj si sé si 'nāj gaquín ni
ngüi hua sa'. Sani 'nāj gaquín ni
ngüi 'yaj gaquin' sisi ganani ruhua
ni sij xi'l si-gaquin' ni sij aj. —Daj
gataj Jesús gunun ni tsínj fariseo
daj.

La pregunta sobre el ayuno

¹⁴Ngaa ni ga'na' ni tsínj nico'
Juan rian Jesús. Ni gataj ni sij:
—Ni үn sin 'yaj ni únj ayuno nga
ni tsínj fariseo. Ni ni tsínj nico'
man'án re', ni nitaj si 'yaj ni sij
ayuno únj. —Daj gataj ni sij.
¹⁵Ngaa ni gataj Jesús gunun ni sij:
—Daj rún' 'yaj 'ngo tsínj xacaj
yun'unj xana, da'nga' daj 'yā. Ni
ngaa gahuin gui'yanj xacaj 'ngo
tsínj daj yun'unj xana, ni si ga'ue
nāni ruhua ni tsínj gan'anj gui'yanj
daj. Sani hua 'ngo güi ngaa guida'a
ni tsínj quij tsínj xacaj yun'unj xana
daj. Ngaa ni gui'yaj ni tsínj nico'
man'ānj ayuno aj.

¹⁶'Sí ga'ue ganara né! 'ngo atsij
naca ngä atsij re'e mánj. Daj si hué
gue atsij naca naraj né' daj, gui'yaj
sisi tsitsi' atsij re'e daj. Ni ganahuin
xachij rian naraj né!¹⁷ Ni daj rún'
hua nnee vino hua si-nuguan'ānj. Ni
si ga'ue ga'nij né' nnee vino naca
chruhua 'ngo nnij re'e. Daj si tsitsi'
nnij daj, gui'yaj vino naca daj. Hué

dan ni 'ngo guere' vino ngä nnij.
Ngaa ni hua niañ si ga'nij né' vino
naca chruhua nnij naca. Ni hué
ducuánj daj ga'ue dugumi né' vino
daj ngä nnij nej. —Daj gataj Jesús
gunun ni tsínj nico' Juan.

La hija de Jairo y la mujer que tocó el manto de Jesús

¹⁸Ni ngaa ga'mi Jesús nuguan' daj,
ni ga'na' 'ngo tsínj huin achij. Ni
ganiquin' ráj dacoj sij rian Jesús. Ni
gataj sij:

—Acuan' gahui' da'ni xanāj. Sani
gan'anj né' guta' re' ra'á re' rian unj
anj. Ngaa ni ga'ue nahuin ni'na' unj.
—Daj gataj tsínj daj gunun Jesús.

¹⁹Ngaa ni naxuman Jesús gan'anj
sij nga ni tsínj nico' sij nga tsínj daj.

²⁰Ngaa ni gahuin nichrun' 'ngo
yun'unj xana a'nan' rucu Jesús si
guisij xuhuij yo' uráj tun ún!. Ni
ganun chra' ra'a ún' du'ua si-gan'
Jesús. ²¹Daj si gani ruhua ún!: “Urin
si ganun chra' ra'a du'ua si-gan' sí',
ngaa ni nahuinj”, ruhua ún!.

²²Sani nanicaj Jesús guini'yaj sij
rian ún!. Ni gataj sij:

—Gahuin nia' ruhuá re' xica'ui.
Daj si ganahuín re', gui'yaj si
guxuman ruhuá re' ni'yáj re'
man'ānj. —Daj gataj Jesús gunun
ún!. Ni 'ngo hora ganahuin ún!.

²³Ni ngaa gatúj Jesús chruhua
ducuá tsínj huin achij daj, ni guini'i
sij sisí man ni tsínj a'yanj ria. Ni
guini'i sij sisí aguáj aco ni ngüi mán
ni sij. ²⁴Ngaa ni gataj Jesús gunun
ni sij:

—Gahui ni é re' gan'anj ni é re' ne'
chrej xe' aj. Daj si sé si gahui' tsin'
xana da mánj. Sani si ato nánj. —
Daj gataj Jesús.

Ni ga'nga' naco ni ngüi guini'i ni sij man'an Jesús.

²⁵ Ni ngaa guisij gahui ni ngüi ne' chrej xe', guiyaj ni sij, asij ni gatúj Jesús rian ngaj níman daj. Ni guida'a sij ra'a ún'. Ngaa ni nachica ún'. ²⁶ Ni gaxa'ní nuguan' daj xi'í si guiyaj Jesús nin' gachra' estado daj gunun ni ngüi.

Dos ciegos reciben la vista

²⁷ Ni ngaa gahui Jesús yu'uj daj, ni nico' huij tsínj duri daj. Ni gaguáj nucuaj nungüej tsínj daj Jesús aj. Ni gataj nungüej sij:

—Ganani yaco ruhuá re' ni'yaj re' nungüej únj huín re' da'níj David.
—Daj gataj nungüej tsínj duri rian Jesús.

²⁸ Ni ngaa gatúj Jesús chruhua hue', ni ga'na' nungüej tsínj duri daj rian sij. Ni gataj Jesús:

—Xuman ruhua nungüej é re' sisí ga'ue ganahuin nungüej é re' guiyá ní'. —Daj gataj Jesús.

—Xuman ruhua nungüej únj, Señor. —Gataj nungüej sij.

²⁹ Ngaa ni ganun ra'a Jesús rian nungüej tsínj duri daj. Ni gataj sij:

—Ga'ue nahuin sa' nungüej é re' daj rún' xuman ruhua nungüej é re'. —Daj gataj Jesús gunun nungüej sij.

³⁰ Ngaa ni naxiguin rian nungüej sij. Ni ga'nin' Jesús nico sun rian nungüej sij. Ni gataj sij:

—Ga' cuidado nungüej é re' sisí si guini'i ni ngüi si nahuin nungüej é re', guiyá. —Daj gataj Jesús.

³¹ Sani dyaj guisij gahui nungüej sij, ni nata' nungüej sij rian daran' ni ngüi mān ni xuman' daj si guiyaj Jesús nga nungüej sij.

Un mudo habla

³² Ni ngaa gahui nungüej tsínj daj, ni hua 'ngo ni tsínj nicaj 'ngo tsínj ya'mi ga'na' ni sij rian Jesús. Ni nun nané xi'i niman sí'. ³³ Ni ngaa guiri Jesús nané xi'i niman sí', ngaa ni ga'ue ga'mi sí'. Ni gahuin yan'anj ruhua ni ngüi xi'í si guiyaj Jesús. Ni gataj ni sij:

—Nitaj aman guini'i ni ngüi israelita 'ngo nuguan' daj rún' guiyaj Jesús nan mánj. —Daj gataj ni sij.

³⁴ Sani gataj ni tsínj fariseo:

—Ri Jesús nané xi'i niman ni ngüi si chraquij sichre huin achij. —Daj gataj ni sij.

La mies es mucha

³⁵ Ngaa ni gachéj Jesús daran' ni xuman' ngá daran' ni rancho. Ni digyán sij nuguan' chruhua si-nuhui ni tsínj israelita. Ni ganata' sij nuguan' sa' xi'í si nicaj sun Yan'anj. Ni guiyaj sij sisí ganahuin daran' ni ngüi a'nan' daran' rian xi'í. ³⁶ Ni ngaa guini'i Jesús sisí ga'na' nico ni ngüi rian sij, ni nahuin i ruhua sij ni'yaj sij ni sí'. Daj si daj rún' huin xachij nitaj tsínj dugumi xuj, ni hué daj huin ni sij. Ni guiran' ni sij sayun. Ni nun xugüii ruhua ni sij si guiyaj ni sij. ³⁷ Ngaa ni gataj Jesús gunun ni tsínj nico' sij:

—Xanga' ni daj rún' huin strigo ganaco ngaa guisij hora ga'nin' ni sij, da'nga' daj huin ni sij. Ni hua nico sun rian né'. Sani doj huin ni tsínj a'nan' strigo daj. ³⁸ Ngaa ni gachinj jni'yaj ni é re' rian Yan'anj sisí ga'nij Yan'anj tsínj gan'anj guiyaj sun ga'nin' strigo

daj. Daj si daj rún' huin tsínj do'oju huin Yan'anj anj. —Daj gataj Jesús gunun ni sij.

Elección de los doce apóstoles

10 Ngaa ni gaquínj Jesús ga'na'ni xuhuij ni tsínj nico' sij. Ni ga'ui' sij sun rian ni sí' sisi guinicaj ni sí' sun rian ni nané xi'i. Hué dan ni ga'ue gahuin nucuaj ni sí' guiri ni sí' nané xi'i chruhua niman ni ngüi. Ni ga'ue guiyaj ni sí' sisi ganahuin ni ngüi a'nan' daran' rian xi'i.

²Ni hué nan huin ni si-xugüi ni xuhuij ni tsínj apóstol gune' Jesús huin ni tsínj nata' rian ni ngüi xi'i sí'. Ni 'ngo tsínj daj huin Simón. Ni hué daj gu'naj sij Pedro nej. Ni Andrés huin jnánj sij. Ni ango sij huin Jacobo da'níj Zebedeo. Ni jnánj Jacobo huin Juan. ³Ni ango sij huin Felipe ngä Bartolomé nej, Tomás nej, Mateo tsínj ga'nej san'anj güenda gobierno nej, Jacobo da'níj Alfeo nej, Tadeo nej, ⁴Simón nej, gu'naj sí' cananita nej, ngä Judas Iscariote huin sí' tsínj naga'ui' Jesús rian ni tsínj nicaj sun.

Misión de los doce

⁵Ngaa ni ga'níj Jesús xuhuij tsínj daj gan'anj ni sí'. Ni gataj sij gunun ni sí':

—Si gan'anj ni é re' ni xánj ni tsínj 'na' anéj chrej mánj. Ni si gatuj ni é re' xánj ni tsínj samaritano mánj. ⁶Sani gan'anj sa' ni é re' rian man ni tsínj israelita. Daj si daj rún' huin xachij gani'ya huin ni sij aj. ⁷Gan'anj ni é re', ni nata' ni é re' rian ni ngüi. Ni gataj ni é re': “Ruhua guisij güi guinicaj sun

Yan'anj rian xungüi.” Daj gataj á re' rian ni sij. ⁸Ganahuin ni ngüi a'nan', guiyaj ni é re'. Ni ganahuin sa' ni ngüi ran' xi'i lepra, guiyaj ni é re' nej. Ni gana'nij ni níman, guiyaj ni é re' aj. Ni guiri ni é re' nane xi'i niman ni ngüi aj. Ni daj rún' guiyaj Yan'anj sinduj rian ni é re', ni da'nga' daj guiyaj ni é re' nga ni ngüi.

⁹Sí nicaj ni é re' oro ngä plata nej, cobre nej, gan'anj ni é re' mánj. ¹⁰Ni ngaa huaj ni é re' chrej, ni si guinicaj ni é re' nnánj huaj á re' mánj. Maan si guinicaj ni é re' urin atsij gan'anj ni é re'. Ni si guinicaj ni é re' canj ngä corínj gar'anj ni é re' mánj. Daj si hua si chrej ni tsínj 'yaj sun sisi xä ni sij aj. ¹¹Ni ngaa huaj guisij ni é re' 'ngo xuman' asi 'ngo rancho, ni nano' ni é re' ducuá 'ngo tsínj sa' guna ni é re'. Ni hué yu'uj da guna ni é re' da guisij güi gan'anj ni é re' ango yu'uj aj. ¹²Ni ngaa huaj gatu ni é re' chruhua hue' daj, ni ga'mi a ni é re' nuguan' sa' rian ni ngüi man chruhua hue' daj gataj á re' sisi din'inj guiman ni sij. ¹³Ni sisi ni ngüi sa' huin ni ngüi nne chruhua hue' daj, ngaa ni gahuin din'inj ruhua ni sij daj rún' gataj ni é re' gunun ni sij. Sani sisi sé ni ngüi sa' huin ni sij, ngaa ni si gahuin din'inj ruhua ni sij mánj. Maan si ga'nin' ruhua ni é re' ngä si-nuguan' ni é re' aj. ¹⁴Ni sisi hua 'ngo tsínj na'uej ruhua nahuin ra'a ni é re', asi na'uej ruhua sij gunun sij si-nuguan' ni é re', ngaa ni nagunan' ni é re' yo'ój chru dacój ni é re' ngaa gahui ni é re' chruhua hue' daj, asi xuman' daj. Da'nga' daj xäcaj ni sij cuenta sisi da'ui ni

sij gaquin' xi'í si nun gunun ni sij si-nuguan' Yan'anj. ¹⁵Xāng'a atā gunun ni é re' sisi güi ganahuij xungüij, ni huaj gahuin castigo ni tsínj daj si gahuin castigo ni tsínj xi'lí guimán asij ná xuman' Sodoma nga xuman' Gomorra.

Persecuciones venideras

¹⁶Ni'yaj ni é re'. Rún' huin xachij huin ni é re' a'ní gan'anj ni é re' dāni ni xucu huee. Daj rún' hua yoo xucuáj, ni da'nga' daj ga' yoo ni é re'. Sani daj rún' 'yaj sa' xu'man, ni da'nga' daj gui'yaj sa' ni é re'. ¹⁷Ni ga cuidado ni é re' ngā si gui'yaj ni tsínj ngā ni é re'. Daj si naga'ui' ni sij rian ni tsínj nicaj sun ni é re'. Ni duguayun ni sij chruhua nuhui ni é re' nej. ¹⁸Ni gan'anj ni é re' da' rian ni gobernado ngā ni rey gui'yaj ni sij xi'íj aj. Ngaa ni gahuin ni é re' ni tsínj nāta' xi'íj rian ni sij ngā ni ngüii 'na' anéj chrej aj. ¹⁹Ni ngaa naga'ui' ni sij ni é re' rian ni tsínj nicaj sun, ni si gahuin ruhua ni é re' nga si ga'mi ni é re' sisi daj gataj ni é re' gunun ni sij mánj. Daj si ngaa ruhua guisij hora ga'mi ni é re', ni Espíritu Santo huin si ríqui nuguan' ga'mi ni é re' gunun ni tsínj da aj. ²⁰Daj si sé man'an ni é re' huin si ga'mi mánj. Sani Espíritu Santo gui'yaj da ga'mi ni é re' aj.

²¹Ni naga'ui' 'ngo tsínj daj jnánj sij rian ni tsínj nicaj sun sisi gahui' sí'. Ni da'nga' daj gui'yaj ango sij ngā da'níj sij nej aj. Ni nanicaj ango ni tsínj daj gataj rúhua sij guini'i sij chrej sij ngā nni sij. Ni gahui' ni sí', gui'yaj ni sij nej. ²²Ni si gahuin xan' ruhua ni ngüii guini'i ni sij ni é re' xi'í si nico' ni é re' man'ānj

mánj. Sani ni ngüii ga nica ruhua da ganahuij ni sayun daj, ni hué ni sij ganacaj Yan'anj anj. ²³Ni sisi gui'yaj quij ni tsínj man 'ngo xuman' ngā ni é re', ngaa ni gunánj ni é re' ango xuman' gan'anj án re' aj. Xāng'a yya atā gunun ni é re' sisi nun guisij gache nin' ni é re' ni xuman' rian man ni ngüii israelita da ga'nāj huinj da'níj ni ngüii aj.

²⁴Sé si huin rian 'ngo tsínj 'na' gahuin chrun daj ngā tsínj digyán rian sij. Ni sé si huin achij 'ngo tsínj 'yaj sun daj ngā si-xuru'ue sij. ²⁵Hua nian si guiran' tsínj 'na' gahuin chrun daj rún' ran' tsínj digyán rian sij. Ni hua nian si guiran' tsínj 'yaj sun daj rún' ran' si-xuru'ue sij. Ni sisi dugu'naj ni sij sichre Beelzebú man'ānj, ni da'nga' daj gataj ni sij gunun ni tsínj 'yaj sun riānj nej. Daj si daj rún' huin tsínj ducua, ni da'nga' daj huinj. Ni daj rún' huin ni tsínj nne nuguan'an ngā tsínj ducua, ni hué daj huin ni tsínj 'yaj sun riānj anj.

A quién se debe temer

²⁶Hué dan ni si guxu'ui' a ni é re' rian ni sij mánj. Daj si si ga'ue gari hui ni ngüii 'ngo nuguan' mánj. Sani hua 'ngo güi ni naxira' daran' nuguan' aríj hui ni ngüii. ²⁷Ngaa ni nuguan' nan atā gunun a ni é re' rian hua ránj, ni nāta' á re' rian ni ngüii ne' chrej xe' gunun ni sij. Ni ni nuguan' a'mi huij gunun a ni é re' ni ga'mi nucuaj á re' ne' chrej xe' chruhua ducua á re' gunun ni ngüii.

²⁸Ni si guxu'ui' a ni é re' rian ni tsínj ga'ue dagahui' nnee cíj ni ngüii mánj. Daj ni na'ue dagahui' ni sij niman ni ngüii. Sani guxu'ui' a ni é

re' rian Yan'anj. Daj si ga'ue gui'yaj Yan'anj sisí ga ni'ya niganj niman ni ngüi nga nnee cúj ni sij rian yan'an.

²⁹Ni x̄anga' nij du'ue huij xataj le 'ngo moneda san'anj. Sani sisí si riqui chrej ni é re' nne xata' permiso, ni si guinij 'ngo xuj daj rian yo'ój mánj. ³⁰Ni hua naya Yan'anj da' go'ngo hué chrá á re' aj. ³¹Xi'í daj ni si guxu'ui' ni é re' mánj. Daj si huaj ga ní'yanj án re' si ní'yanj ni xataj ga aj.

³²'Hué dan nī daran' ni ngüi n̄ata' sisí nico' ni sij yünj rian ni ngüi hué daj ga'mi sa'āj xi'í ni sij rian chrē nne xata!. ³³Sanī daran' ni ngüi na'uej ruhua n̄ata' rian ni ngüi sisí nico' ni sij yünj, ni si ga'mi sa'āj rian xi'í ni sij rian chrē nne xata!.

Jesús, causa de división

³⁴Si gani ruhua á re' sisí ga'nāj chruhua xungüi nan sisí gahuin din'inj ruhua ni ngüi. Sé daj huin mánj. Sé si ga'nāj sisí gahuin din'inj ruhua ni sij mánj. Sani gunun' ni sij, 'yaj si ga'nāj. ³⁵Daj si ga'nāj sisí gunun' 'ngo tsínj daj nga chrej sij. Ni gunun' 'ngo yun'unj x̄ana nga nni unj. Ni gunun' 'ngo yun'unj x̄ana daj nga nichej unj. ³⁶Ni ni ngüi man ducuá 'ngo tsínj daj, ni gunun' ni sij nga sí!. ³⁷Sisi 'i ruhua 'ngo tsínj daj ni'yaj sij chrej sij nga nni sij daj nga si 'i ruhua sij ni'yaj sij man'anj, ni nun sij sij si guinicaj dugüi' sij nga man'anj. Ni sisí hua 'ngo tsínj 'i ruhua ni'ya da'ni sno'o sij nga da'ni x̄ana sij daj nga si 'i ruhua sij ni'yaj sij man'anj, ni nun sij sij si guinicaj dugüi' sij ngāj. ³⁸Ni un tsínj na'uej ruhua guiran' sayun xi'í si nico' sij man'anj, ni nun sij sij guinicaj

dugüi' sij ngāj. ³⁹Ni un tsínj huin ruhua nacaj man'an, ni ga ni'ya sij. Sani un tsínj ga'uej ruhua gahui' xi'íj, ni ga ni'na' niganj sij aj.

Recompensas

⁴⁰Ni sisí ganahuin ra'a ni ngüi ni é re', ni da'nga' daj ganahuin ra'a ni sij man'anj. Ni tsínj ganahuin ra'a man'anj, ni ganahuin ra'a sij tsínj ga'níj ga'nāj nej. ⁴¹Ni ngüi ganahuin ra'a 'ngo tsínj a'mi si-nuguan' Yan'anj xi'í si 'nä! sí' rian Yan'anj, ni uyan ganahuin ra'a ni sij nga tsínj a'mi si-nuguan' Yan'anj daj ngaa naru'ue Yan'anj rian ni ngüi. Ni ni ngüi ganahuin ra'a 'ngo tsínj sa' xi'í si sa' sí', ni uyan ganahuin ra'a ni sij nga tsínj sa' daj ngaa naru'ue Yan'anj rian ni ngüi aj. ⁴²Ni daj hua tsínj ga'ui' 'ngo tasa nnee nuhuij go'o 'ngo tsínj hua lij xi'í si nico' sij man'anj, ni x̄anga' atā gunun a ni é re' sisí gui'yaj sa' Yan'anj nga sij. —Daj gataj Jesús gunun ni tsínj nico' sij.

Los mensajeros de Juan el Bautista

11 Ni ngaa guisíj ganahuij si digyán Jesús rian ni tsínj nico' sij, ni gahui sij yu'uj daj gan'anj digyán sij nuguan' sa' rian ni ngüi man ni xánj ni sij.

²Ni nun Juan ducuaga'. Ni ngaa gunun sij si gui'yaj Jesús, ni ga'níj sij huij tsínj nico' sij gan'anj nacchin' snan'anj Jesús. ³Ni gataj nungüeij sij:

—Hué re' huin tsínj ga'na' nacaj ni ngüi ní!. Así gana'uij únj si ga'na' ango tsínj ní!. —Daj gataj nungüeij tsínj daj gunun Jesús, gui'yaj Juan.

⁴Ngaa ni gataj Jesús:

—Güij nungüej é re'. Ni nata' nungüej é re' gunun Juan si gunun nungüej é re' nga si guini'l nungüej é re' nej. ⁵Daj si xiguin ni'yaj ni tsínj duri. Ni chéj ni tsínj yacuan. Ni nahuin sa' ni ngüi a'nan' xi'l nnij nej. Ni naxi'nij chraquij ni tsínj so'o nej. Ni ganá'nij ni níman gahui' nej. Ni unun ni ngüi yaco ran' nuguan' sa'. ⁶Ni gahui sa' 'ngo tsínj nitaj si nanicaj ruhua ni'yaj sij xi'ij. —Daj gataj Jesús gunun nungüej tsínj daj.

⁷Ni ngaa huaj nan' nungüej sij rian Juan, ngaa ni gaxi'i Jesús ga'mi sa' sí' rian ni ngüi xi'í Juan. Ni gataj sij:

—Ni ngaa gan'anj ni é re' gunun ni é re' si-nuguan' Juan quij qui'yanj naco, ni daj hua sij guini'l a ni é re', ruhua á re' únij. Daj rún' yaj ria ngaa xinunj 'yaj nane, ni da'nga' daj 'yaj sij, ruhua á re' ní'.

⁸Ni sisi sé daj 'yaj sí', ni un sin huin ni gan'anj ni'yaj ni é re' rian huaj sij únij. Gan'anj ni'yaj ni é re' 'ngo tsínj nun atsij nia' ní'. Sani sé daj huin sij mánj. Ni ni'l ni é re' sisi ni tsínj nun atsij nia', ni nne ni sí' ducuá rey. ⁹Ni un sin huin ni gan'anj ni'yaj á re' rian nne sij únij. Así 'ngo tsínj a'mi si-nuguan' Yan'anj ní'. Xanga' yya ni hué daj huin sij aj. Ni hua achij Juan daj nga' daran' ango ni tsínj a'mi si-nuguan' Yan'anj anj.

¹⁰Ni asij ná ni garun sa' 'ngo tsínj ga'mi si-nuguan' Yan'anj xi'í Juan. Ni gataj Yan'anj:

A'ní 'ngo tsínj guinicaj nuguan' guchi' sij.

Ni tsínj daj guítaj dian sini rián re' gan'anj sij aj.

Ni gui'yaj xugüi sij si-chréj re'. Daj gataj Yan'anj garun Isaías asij ná.

¹¹'Ni xanga' atá gunun a ni é re' sisi scanij ni tsínj ga'nga, gui'yaj ni yun'unj xana, ni nitaj si rugüi' 'ngo tsínj huin achij daj rún' huin achij man'an Juan tsínj duguata' nnee. Sanj tsínj hua lij nín' huin achij sij rian nicaj sun Yan'anj daj nga' man'an Juan gaj. ¹²Ni asij ngaa ga'na' Juan tsínj duguata' nnee, ni 'na' gahuin achij rian nicaj sun Yan'anj. Ni hué daj hua da güi acuan!. Ni ni tsínj hua sa' niman, ni huin ruhua ni sij sisj gahuin achij Yan'anj niman ni sij aj. ¹³Daj si daran' ni tsínj nata' si-nuguan' Yan'anj rian ni ngüi asij ná da man'an Juan, ni ga'mi ni sij xi'í güi guinicaj Yan'anj sun. Ni da'nga' daj a'mi si-ley Yan'anj nej. ¹⁴Ni sisi huin ruhua á re' guxuman ruhua á re' nga nuguan' nan, ni Juan huin Elías tsínj ga'na' daj rún' garun ni sij asij ná. ¹⁵Ni tsínj nun chraquij, ni gunun sij nuguan' nan anj.

¹⁶'Ni daj un sin huin guí'yá guiri' digyānj rian án re' daj hua ni ngüi mán acuan' nan únij. Daj rún' 'yaj ni tsin' gan'anj gane rian yu'ué ngaa ducuj, ni agua ni dugüi', ni hué daj huin ni sij. ¹⁷Ni ataj anin'inj: "Ga'yanj únij riá rian án re' saj. Sani nun guiran'anj án re' mánj. Garaj ni únij chra' stanga saj, ni nun gaco a ni é re' mánj." Hué daj ataj ni tsin' rian ni dugüi' ni tsin' anj.

¹⁸Daj si ga'na' Juan, ni nun xa sij chrachrúnj, ni nun go'o sij nnee vino mánj. Sani ataj ni ngüi sisi nun nané xi'i niman sij aj. ¹⁹Así ni ga'na' da'nij ni ngüi huin man'ānj. Ni xāj, ni go'ōj aj. Ni ataj ni ngüi sisi huinj 'ngo tsínj xa nasa' go'o nasa!. Ni huinj 'ngo tsínj nicaj dugüi'

nga ni ngüi 'yaj gaquin' nga ni tsínj a'nej san'anj, ataj ni sij xi'lí aj. Ni sisi xacaj ni ngüi cuenta daj 'yaj nungüej únj Juan, ni gahuin yya ruhua ni sij sisi chrún nungüej únj.

Ayes sobre las ciudades impenitentes

²⁰Ngaa ni gaxi'i Jesús nata' sij xi'lí si-gaquin' ni tsínj mān ni xuman' daj rian gui'yaj sij nico si sa' nga si-fuerza sij. Ni hué daj ga'mi sij xi'lí si nun nanicaj ruhua ni sí' xi'lí si-gaquin' ni sí!. ²¹Ni gataj Jesús:

—Niqui nin' ruhua niman án re' huin ín re' ni tsínj mān xuman' Corazín nga xuman' Betsaida. Ni nun gui'yā si sa' 'na' rian Yan'anj nga si-fuerzaj xuman' Tiro nga xuman' Sidón rún' gui'yā si sa' xuman' Corazín nga xuman' Betsaida. Sani sisi hué daj gui'yā, ni hua ganani ruhua ni tsínj mān Tiro nga Sidón xi'lí si-gaquin' ni sij asij ná. Ni hua gunun ni sij atsij dachrinj digyán ni sij sisi hua yya nanicaj ruhua ni sij xi'lí si-gaquin' ni sij. Ni hua gara ni sij yaj chra ni sij aj. ²²Sani atā gunun ún re' sisi ngaa guisij nagui'yaj Yan'anj nga si-gaquin' ni ngüi, ni guiran' nico ni tsínj mān xuman' Corazín nga xuman' Betsaida castigo daj nga si guiran' ni tsínj mān xuman' Tiro nga xuman' Sidón.

²³'Ni atā gunun ún re' huin ín re' ni tsínj mān xuman' Capernaum sisi nne nin' ruhua á re'. Xi'lí daj ani ruhua á re' sisi hua 'ueé nin' ruhua xánj án re', ruhua á re'. Sani gan'anj án re' da' daqui nin' ruhua rian hua rumi', gui'yaj Yan'anj. Daj si sisi nun gui'yā si sa' 'na' rian Yan'anj

nga si-fuerzaj xuman' Sodoma daj rún' gui'yā xánj án re', ngaa ni ga gué ngaj xuman' daj aj. ²⁴Sani atā gunun ún re' sisi güi ga'na' nagui'yaj yya Yan'anj nga si-gaquin' ni ngüi, ni guiran' ni é re' doj castigo rian si guiran' ni tsínj mān xuman' Sodoma. —Daj gataj Jesús gunun ni ngüi.

Venid a mí y descansad

²⁵Ni ngaa daj, ni gataj Jesús gunun Yan'anj:

—A'mi sa'aj rián re' huín re' chrē nne xata!. Ni nicáj re' sun xata' nga rian yo'ój nej aj. Ni a'mi sa'aj rián re'. Daj si digyán re' nuguan' sa' nan rian ni tsínj nun huin achij. Ni garij hui re' nuguan' nan rian ni tsínj ni'i nico nga ni tsínj chrún sa' ni nuguan' nej. ²⁶Daj si hué daj garan' ruhuá re' si gui'yáj re' huín re' chrē aj. —Daj gataj Jesús gunun Yan'anj.

²⁷Ngaa ni gataj Jesús gunun ni ngüi:

—Nariqui chrē daran' ni rasun riānj anj. Ni a 'ngo ni ngüi nun ni'i daj hua da'níj Yan'anj mánj. Sani urin chrē ni'i man'ānj. Ni a 'ngo ni ngüi nun ni'i daj hua man'an chrē nej mánj. Sani urinj ni'i chrē si huéj huin da'níj Yan'anj anj. Ni un ngüi garan' ruhuāj digyānj, ni ga'ue digyānj daj hua chrē rian nej.

²⁸'Ngaa ni gahua' daran' ni é re' ninaj ata ni rasun ya'i riānj. Ni gui'yā sisi nañan ruhua ni é re' aj.

²⁹Ni guinico' ni é re' man'ānj anj. Ni gahuin chrún ni é re' nga nuguan' digyānj rian ni é re' aj. Daj si rún' hua 'ngo xucu hua ni, ni da'ngá' daj huāj aj. Ni nitaj si yan'anj ruhuāj

mánj. Ngaa ni ga'ue nari' ni é re' rian naran ruhua ni é re' nej aj. ³⁰Daj si sé si 'i sisi guinicō' ni é re' man'ānj nej mánj. Ni sé si 'i sisi gache ni é re' si-chrē. —Daj gataj Jesús gunun ni ngüi.

Los discípulos recogen espigas en el día de reposo

12 Ni ngaa daj ni huaj Jesús dāni rian gunun ni sij strigo 'ngo güi naránj ruhua ni sij. Ni gachin xi'nā riqui ni tsínj nico' sij. Ngaa ni gaxi'i ni sij rocoj ni sij ca strigo. Ni xa ni sij. ²Sani ngaa guini'lī ni tsínj fariseo, ni gataj ni sij gunun Jesús:

—Ni'yaj re' si 'yaj ni tsínj nicó' re' aj. Daj si na'uej si-ley Yan'anj sisi da'ngal daj gui'yaj ni sij güi naránj ruhua né' mánj. —Daj gataj ni tsínj fariseo gunun Jesús.

³Ngaa ni gataj Jesús:

—Hua gaya ni é re' si gui'yaj xi' David ní'. Daj si 'ngo güi gachin xi'nā riqui ni dugüi' sij. ⁴Ni gatúj sij chruhua ducuá Yan'anj. Ni xa sij si-chrachrunj Yan'anj. Ni na'uej si-ley Yan'anj sisi xa ni dugüi' sij chrachrunj daj. Sani urin ni chrej xa chrachrunj da aj.

⁵Ni nun gaya ni é re' si-ley Moisés nej mí'. Daj si 'yaj sun ni chrej chruhua si-nuhui Yan'anj güi naránj ró' aj. Sani nitaj gaquin' da'ui ni sij nej mánj. ⁶Ni atā gunun ni é re' sisi nan niquin' 'ngo tsínj huin achij daj ngā nuhui da aj. ⁷Ni gataj si-nuguan' Yan'anj: "Huin ruhuāj sisi gahui 'i ruhua ni é re' ni'yaj ni é re' ni ngüi. Ni nitaj si huin ruhuāj sisi dagahui' ni é re' xucu riānj mánj." Daj gataj si-

nuguan' Yan'anj. Ni sisi unun ni é re' un sin huin ruhuaj nuguan' nan gata, ni si guta' chre ni é re' gaquin' ni ngüi nun gui'yaj gaquin' mánj.

⁸Daj si nicaj sūnj rian ni güi naránj ró' huinj da'níj ni ngüi. —Daj gataj Jesús gunun ni tsínj fariseo.

El hombre de la mano seca

⁹Ngaa ni gahui Jesús yu'uj daj. Ni gatúj sij chruhua si-nuhui ni sí!. ¹⁰Ni nne 'ngo tsínj hua nāco ra'a daj. Ngaa ni nachínj snan'anj ni tsínj fariseo Jesús. Ni gataj ni sij:

—A'uej si-ley Yan'anj sisi ganahuin 'ngo tsínj a'nan', gui'yaj né' güi naránj ruhua né' ní'. —Daj gataj ni sij xi'í si huin ruhua ni sij ga'mi gaquin' ni sij xi'í Jesús. ¹¹Ngaa ni gataj Jesús:

—Sisi guinij 'ngo dan ni é re' xachij chruhua yu'uj güi naránj ruhua ni ngüi, ni si gan'anj guiri ni é re' xuj chruhua yu'uj da mí!. ¹²Ni nín' ruhua ní'yanj 'ngo tsínj daj si ní'yanj 'ngo xachij da aj. Hué dan ni sa' huin sisi gui'yaj sa' né' güi naránj ruhua ni ngüi. —Daj gataj Jesús gunun ni sij.

¹³Ngaa ni gataj sij gunun tsínj a'nan' ra'a daj:

—Ducua re' ra' re' aj. —Daj gataj Jesús.

Ni hué daj gui'yaj sí', ni ganahuin ra' a' daj rún' hua anéj ra' sí!. ¹⁴Sani gahui ni tsínj fariseo. Ni daga'mi dugüi' ni sij daj ga'ue dagahui' ni sij Jesús.

El siervo escogido

¹⁵Sani ni'i Jesús si ani ruhua ni tsínj daj. Ngaa ni gahui sij. Ni gan'anj sij yu'uj daj. Ni nico' nico

ni ngüi gan'anj ni sij. Ni ganahuin daran' ni ngüi a'nan', gui'yaj Jesús. ¹⁶Ni ga'nin' sij sun sisi si nuna ni sij un tsínj huin sij rian ni ngüi mánj.

¹⁷Ni hué daj gahuin sisi gahuin yya daj rún' garun Isaías asij ná xi'í Yan'anj. Ni gataj sij:

¹⁸ Nan nne tsínj unánj guitsi riānj anj.

Ni hua ganacui man'ānj sij nej.

Ni huin sij tsínj 'i ruhuāj.

Ni huin nia' ruhuāj nga sij nej.

Ni ga'uij Espíritu Santo ga'na' niman sij nej.

Ni nata' sij rian ni ngüi 'na' anéj chrej sisi 'ueé nagui'yaj yyāj nga xi'í si-gaquin' ni sij!

¹⁹Ni si gunun' sij nga ni ngüi mánj.

Ni si gaguáj sij mánj.

Ni si gunun ni ngüi si ga'mi nucuaj sij chruhua chrej mánj.

²⁰Ni si gaquin' sij yoo guyu huin ni tsínj guere' ruhua, gui'yaj ni sayun ran' ni sij.

Ni si duna'aj sij chrä candil na'ue ganun sa' yan'an huin ni tsínj na'ue xacaj sa' si-chrej Yan'anj.

Hué dan ní gui'yaj gana nuguan' xanga' ga'mi tsínj 'yaj sun riānj ngaa nagui'yaj yya sij si-gaquin' ni ngüi.

²¹Ni hué daj gui'yaj sij da gana'uij daran' ni ngüi 'na' anéj chrej si gui'yaj sa' sij nga si-xugüi sij.

Daj gataj Yan'anj rian Isaías asij hua ná.

La blasfemia contra el Espíritu Santo

²²Ngaa ní nicaj ni sij 'ngo tsínj duri na'ue ga'mi ga'na' ni sij rian

Jesús. Ni nun nané xi'i niman tsínj daj. Ni ganahuin sij, gui'yaj Jesús. Ngaa ní ga'ue ga'mi sij. Ni naxiguin rian sij nej. ²³Ni gahuin yan'anj ruhua daran' ni ngüi. Ni nachínj snan'anj ni sij ni man'an ni dugüi' ni sij. Ni gataj ni sij:

—Hué sij huin da'níj tsínj gu'naj David, ruhua á re' ní!. —Daj gataj ni sij xi'í Jesús.

²⁴Sani ngaa gunun ni tsínj fariseo si gataj ni ngüi, ní gataj ni sij:

—Xi'í si-fuerza man'an sichre Beelzebú, ní gahuin nucuaj Jesús ri sij ni nane xi'i niman ni ngüi aj. — Daj gataj ni sij xi'í Jesús.

²⁵Ni ní'i Jesús si ani ruhua ni tsínj fariseo daj. Ngaa ní gataj sij:

—Sisi unun' ni dugüi' 'ngo ducasun, ní guere' xuman' daj gui'yaj ni man'an sij mán sij. Ni sisí unun' ni dugüi' ni tsínj mān 'ngo xuman', ngaa ní guere' xánj ni sij, gui'yaj sij. Ni hué daj gahuin ngaa unun' 'ngo tsínj daj nga ni dugüi' sij mán ducuá sij. ²⁶Ni hué daj huin sisi guiri sichre Satanás man'an sichre Satanás niman ni ngüi, ní huin ruhuaj gata sisi hué güe Satanás unun' nga Satanás. Ni si ga'ue

gunucuaj rian nicaj sun sichre da mánj. ²⁷Ni sisí ríj sichre niman ni ngüi nga si-fuerza Beelzebú, ngaa ní un tsínj riqui sisi guiri ni tsínj nico' ni é re' sichre niman ni ngüi, ruhua á re' únj. Hué dan ní digyán ni sí' sisí nitaj si hua nica ruhua ni é re' mánj.

²⁸Sani sisí hua yya ríj sichre niman ni ngüi, 'yaj Espíritu Santo, ngaa ní huin ruhuaj gata sisi ga'na' guisij si guinicaj sun Yan'anj scanij ni é re' aj.

²⁹'Si ga'ue gatu 'ngo tsínj tu chruhua ducuá 'ngo tsínj nucuaj,

gui'yaj tu sij si'yaj sí' mánj. Sani hua sini numi tsínj daj tsínj si'yaj, ngaa ni ga'ue gui'yaj tu sij si'yaj sí'.

³⁰Ni tsínj nitaj si nicaj dugüi' ngaj, ni unun' ni sij ngaj. Ni tsínj nitaj si naran' strigo ngaj, ni re'ej ni sij strigo. Ni 'yaj ni sij sisi na'ue guinicō' ni ngüi man'anj. ³¹Hué dan ni atā gunun ni é re' sisi ga'ue guinicaj Yan'anj niman nico xi'lí daran' gaquin' 'yaj ni ngüi nga daran' nuguan' quij a'mi ni sij. Sani daran' ni ngüi a'mi quij xi'lí Espíritu Santo, ni si ga'ue guinicaj Yan'anj niman nico xi'lí ni sij mánj. ³²Ga'ue guinicaj Yan'anj 'ngo niman nico xi'lí ni ngüi a'mi quij rian da'nij ni ngüi huin man'anj. Sani si ga'ue guinicaj Yan'anj 'ngo niman nico xi'lí ni ngüi a'mi quij xi'lí Espíritu Santo mánj. Ni xungüi nan nga xungüi ga'na', ni si guinicaj Yan'anj niman nico xi'lí ni sij mánj.

³³Sisi sa' 'ngo chrun daj, gui'yaj á re', ni gayu chruj sa' chraj. Sani sisi xi'lí 'ngo chrun daj, gui'yaj á re', ni si gayu chruj sa' chraj nej mánj. Daj si ni'lí nél' sisi digyán chruj daj daj hua chrun ayu chruj daj. ³⁴Da'níj xucuáj huin a ni é re'. Daj ga'ue ga'mi ni é re' nuguan' sa' ni man'an ni é re' huin quij únj. Daj si du'ua ni ngüi a'mi nga nuguan' nun chruhua niman ni sij. ³⁵Nga tsínj sa', ni a'mi sij ni nuguan' sa'. Daj si hua sa' niman sij. Ni tsínj quij hua, ni a'mi sij ni nuguan' quij. Daj si quij hua niman sij aj. ³⁶Ni atā gunun a ni é re' sisi daran' ni é re' naga'ui' cuenta nga daran' ni nuguan' nitaj si ní'yanj rian Yan'anj güi nagui'yaj yya Yan'anj si-gaquin' ni ngüi. ³⁷Ni gataj Yan'anj sisi sa' ni é re' asi

da'ui ni é re' gaquin' xi'lí ni nuguan' ga'mi ni é re' guimán ni é re' xungüi nan. —Daj gataj Jesús gunun ni sij.

La generación perversa demanda señal

³⁸Hué dan ni gataj go'ngo ni tsínj digyán ley nga ni tsínj fariseo gunun Jesús:

—Huin ruhua únj guini'i únj gui'yaj re' 'ngo si sa' nga si-fuerzá re'. —Daj gataj ni sij.

³⁹Ngaa ni gataj Jesús:

—Huin ruhua ni tsínj xi'lí guini'i ni sij sisi gui'yā 'ngo si sa' nga si-fuerzaj aj. Daj si duna ni sij Yan'anj. Sani si guilyā 'ngo si sa' nga si-fuerzaj guini'i ni sij mánj. Urin si guiran' tsínj gu'naj Jonás huin si guini'i ni sij. Ni huin si' 'ngo tsínj ga'mi si-nuguan' Yan'anj asij ná.

⁴⁰Ni daj rún' gunun Jonás huá'nij güi huá'nij yan' riqui xucuaj xxi, ni da'nga' daj gui'nij da'nij ni ngüi huá'nij güi huá'nij yan' riqui yo'ój.

⁴¹Ni güi ganahuij xungüi ngaa nagui'yaj Yan'anj xi'lí si-gaquin' ni ngüi, ni ganiquin' ni tsínj guimán xuman' Nínive nga ni tsínj mān acuan!. Ni gataj ni tsínj daj sisi da'ui ni tsínj mān acuan' gaquin'. Daj si ganani ruhua ni tsínj guimán Nínive daj xi'lí si-gaquin' ni sij ngaa gunun ni sij si nata' Jonás si-nuguan' Yan'anj gunun ni sij. Ni yu'uj nan niquin' 'ngo tsínj huin achij daj nga Jonás. ⁴²Ni ngaa guisij güi gui'yaj yya Yan'anj nga ni gaquin', ni ganiquin' reina 'na' ne' Sur gataj ún' sisi da'ui ni ngüi man yyaj gaquin'. Ni gahuin ni sij castigo nej. Daj si ga'na' ún' da' xi'lí nin' xungüi gunun ún' si-nuguan'

tsínj gu'naj Salomón. Ni chrún sí' si-nüguan' Yan'anj anj. Sani huin achij man'ānj daj nga Salomón rian ni é re'!

El espíritu inmundo que vuelve

⁴³ Ni ngaa gahui 'ngo nane xi'i nimán 'ngo tsínj daj, ni chéj nane xi'i daj 'ngo yu'u hua náco nano' nane daj ni a náran ruhuaj. Sani nun nari' nane daj rian náran ruhuaj. ⁴⁴ Ngaa ni: "Nanicaj ruhua' yúnj ducuāj rian gahui", ataj nane daj. Ni ngaa nanicaj nane daj, ni nari' nane 'ngo hue' hua ní'ni. Ni hua naca' nej. Ni nagui'yaj sa' nej hue' daj. Ni da'nga' daj rún' huin hue' daj hué daj huin nimán tsínj daj. ⁴⁵ Ngaa ni gan'anj nane daj náno'-ó' ango ichij nane quij hua daj nga man'an nane. Ni daran' ni nane daj ganatu nüguan'an nimán tsínj daj ruhua' yún. Ni guiran' sij nico sayun daj nga si guiran' sij asij sini yan. Ni hué daj gahuin ngá ni ngüi quij mán yyaj. —Daj gataj Jesús gunun ni tsínj digyán ley nga ni tsínj fariseo.

La madre y los hermanos de Jesús

⁴⁶ Ni ngaa hua gue a'mi Jesús rian ni ngüi, ni niquin' nni sij ngá ni jnánj sij ne' chrej xe' hue' daj. Ni gataj ni sij sisí huin ruhua ni sij ga'mi ni sij ngá sí!. ⁴⁷ Ni ganata' 'ngo tsínj daj rian Jesús:

—Nní re' nga ni jnánj re' ana'uij niquin' ne' chrej xe' huin ruhua anin' sij ga'mi anin' sij ngá re'. —Daj gataj sí' rian Jesús.

⁴⁸ Sani gataj Jesús gunun tsínj daj. —Ni un ngüi xána huin nní rian man'ānj, ruhuá re' únj. Ni un tsínj

huin jnán rian man'ānj, ruhuá re' únj. —Daj gataj Jesús.

⁴⁹ Ngaa ni digyán sij ra'a sij ne' mán ni tsínj nico' sij, ni gataj sij: —Hué nní ngá ni jnán huin ni tsínj man nan. ⁵⁰ Daj si un tsínj dagahuin si aran' ruhua chre' nne xata', ni hué ni sij huin jnán ngá xica'ui nej, nní nej aj. —Daj gataj Jesús.

Parábola del sembrador

13 Ngaa ni güi daj ni gahui Jesús hue' daj gan'anj gane sij du'ua laguna xachij. ² Ni ganahuin yu' nico ni ngüi rian sij. Ngaa ni gatúij sij chruhua 'ngo rio chéj rian nnee gan'anj gane sij. Ni niquin' daran' ni ngüi ni'yaj ni sij du'ua laguna daj. ³ Ni nani sij ga'i cuento digyán sij rian ni ngüi. Ni gataj sij:

—Gahui 'ngo tsínj gan'anj dagaman' can. ⁴ Ni ngaa dagaman' sij, ni guinij doj can daj chruhua chrej aj. Ni ga'na' gue xataj, ni xa xú' can daj. ⁵ Ni guinij doj can rian yo'ój yej rian nitaj nico yo'ój nun. Ni chira' yoo can daj. Daj si nitaj si hua nico yo'ój rian yej daj. ⁶ Sani ngaa gahui güi gurununj, ni gaca coj daj, gui'yaj nnán. Daj si nitaj ya'q siu. Ni ganaco rá'yanj coj daj. ⁷ Ni gayu doj can scanij tanj. Ni gachrij yoo tanj. Hué dan ni gane coj daj, gui'yaj tanj. ⁸ Ni gayu doj can ango yo'ój sa!. Ni gayu sa' can. Ni 'ngo coj gahui 'ngo ciento can. Ni ango coj gahui huá'nij xia can. Ni ángó coj gahui co chi' can daj.

⁹ 'Sisi nun chraquij re', ni gunun re' nej aj. —Daj gataj Jesús gunun ni ngüi.

Propósito de las paráolas

¹⁰ Hué dan ni gahuin nichrun' ni tsínj nico' Jesús rian sí!. Ni nachínj snan'anj ni sij sí!. Ni gataj ni sij:

—Ni un sin huin ní naní re' cuento digyán re' rian ni ngüi únj. —Daj gataj ni sij.

¹¹Ngaa ní gataj Jesús:

—Rian ni é re' riqui Yan'anj sisi guini'i ni é re' daj hua ni nuguan' hui rian nicaj sun Yan'anj. Saní nun digyán Yan'anj nuguan' daj rian ango ni sij. ¹²Daj si tsínj unun, ní ga'ui' nico Yan'anj rian sí! Ní guini'i nico sí! Saní tsínj nitaj si unun, ní ga'ne Yan'anj dój si unun sí! ¹³Xí'í daj ní nanij 'ngo cuento digyánj rian ni ngüi. Ngaa ní guini'yaj ni sij. Saní nun guini'i ni sij. Ni gunun ni sij. Saní na'ue xacaj ni sij cuenta. ¹⁴Ní hué daj gahuin yya si ga'mi tsínj gu'naj Isaías tsínj ga'mi si-nuguan' Yan'anj asij ná, 'yaj ni sij. Daj si gataj sí!:

Gunun chraquij ni é re'.

Saní sí gara da'nga' ruhua ni é re' mánj.

Guini'yaj ni é re'.

Saní sí guini'i ni é re' mánj.

¹⁵Daj si tsí niman ni ngüi nan.

Ní hua ránj chraquij ni sij.

Ní adin rian ni sij nej.

Ngaa ní sí ga'ue gui\xiguin,
gui'yaj ni sij mánj.

Ní sí ga'ue gunun ni sij nej mánj.

Ní sí ga'ue gara da'nga' ruhua ni sij mánj.

Ní sí ga'ue nanicaj ni sij ga'na'
ni sij riānj sisi ganahuin ni sij,
gui'yā mánj.

Hué daj gataj Yan'anj ga'mi Isaías asij ná.

¹⁶Saní hua xí'í si gahuin nia' ruhua ni é re'. Daj si ni'lí rian ni é re'. Ni unun chraquij ni é re' nej. ¹⁷Ní xanga' atā gunun ni é re' sisi asij ná, ní nín' ruhua gahuin

ruhua nico ni tsínj ga'mi si-nuguan' Yan'anj ngä nico ni tsínj hua sá' niman guini'i ni sij daj rún' ni'lí ni é re'. Saní nun guini'i ni sij mánj. Ni gahuin ruhua ni sij gunun ni sij si unun ni é re' saj. Saní sí gunun ni sij mánj.

Jesús explica la parábola del sembrador

¹⁸Ngaa ní gunun ni é re' un sin huin ruhua cuento daj gata. ¹⁹Ngaa na'ue gara da'nga' sá' ruhua 'ngo tsínj daj gunun sij nuguan' sá' xí'í si nicaj sun Yan'anj, ní 'nä' sichre. Ni ganaxun sichre nuguan' sá' gunun sij. Ni daj rún' huin cán guinij du'ua chrej, ní da'nga' daj huin tsínj daj. ²⁰Ní daj rún' huin cán guinij scanij yo'ój yej, ní hué daj huin tsínj gunun si-nuguan' Yan'anj. Ni 'ngo hora nahuin ra'a sij nuguan' daj. Ni gahuin nia' ruhua sij. ²¹Saní 'yaj sij rún' 'yaj 'ngo coj nitaj nico ya'q siu. Ni ngaa ga'na' 'ngo sayun chran' yun'unj ango ni tsínj xí'í si-nuguan' Yan'anj, ngaa ni jna sij si-chrej Yan'anj. ²²Ní cán guinij scanij tanj daj, ní da'nga' daj huin ango tsínj unun nuguan' sá'. Saní huin ruhua sij guiri' sij rasun mán ruhua xungüi nan. Ni digya' yun'unj san'anj sij si nahuij ruhua sij gahuin xuru'ue sij. Ni guere' nuguan' sá' mán chruhua niman sij. Ni nitaj si 'yaj sá' sij ga mánj. ²³Ní cán guinij rian yo'ój sá', ní da'nga' daj huin ango tsínj unun nuguan' sá'. Ni raj da'nga' ruhua sij nuguan' daj. Ni 'yaj sá' sij. Ni 'yaj 'ngo tsínj daj daj rún' 'yaj 'ngo coj ngaa ayu 'ngo ciento cán. Hué daj 'yaj ni tsínj unun sá' si-nuguan'

Yan'anj. —Daj gataj Jesús gunun ni tsínj nico' sij.

Parábola del trigo y la cizaña

²⁴Hué dan ní nani Jesús angó cuento digyán sij rian ni sí!. Ní gataj sij:

—Rún' huin 'ngo tsínj dagaman' can sá' rian do'ój sij, da'nga' daj huin rian nicaj sun Yan'anj. ²⁵Sani ngaa atoj daran' ni sij, ní guisíj 'ngo tsínj unun' ngá tsínj daj dagaman' sí' can xí'i riqui yo'ój daj, ní gan'anj sí!. ²⁶Ní ngaa gachij strigo, ní gani ca chraj. Ní hué daj gurugüi' angó coj nitaj si hua sá' scanij strigo daj. ²⁷Hué dan ní gan'anj gataj ni tsínj 'yaj sun rian tsínj do'oij. Ní gataj ni sij: "Señor, sí hua sá' dagamán' re' rian do'ój re', ní ni a 'ná' coj xí'i nan únj." Daj gataj ni sij. ²⁸Ngaa ní: "Gu'yaj 'ngo tsínj unun' ngáj", ataj tsínj do'oij gunun ni sij. Ngaa ní nachínj sman'anj ni tsínj 'yaj sun rian sí!: "Ruhuá re' sí gan'anj únj gorocoj únj coj xí'i daj ní", ataj ni sij!. ²⁹Sani gataj tsínj do'oij daj: "Si ga'ue gorocoj a ni é re' coj xí'i daj nun sá' nun hué daj gorocoj a ni é re' strigo nej. ³⁰Sani sá' huin sí duna acuan' án re' si da gachij nuguan'anj, ngaa ní ga'ní ni tsínj 'yaj sun gan'anj náran' sini ni sij coj xí'i daj. Ngaa ní numi ni sij rumi coj daj ga'nij ni sij rian yan'an gaca-á!. Así ní nara sá' ni sij strigo chruhua si-gurúj nánj", ataj tsínj do'oij rian ni sij. —Daj gataj Jesús gunun ni ngüii.

Parábola de la semilla de mostaza

³¹Ní hué daj ganani Jesús angó cuento rian ni sij. Ní gataj sij:

—Daj rún' hua cán cuej nasa ngaa dagaman' 'ngo tsínj daj rian do'ój sij, ní da'nga' daj hua rian nicaj sun Yan'anj xata!. ³²Ní hué cán daj huin cán le nne ngá angó ni cán. Sani ngaa gachi, ní gahuin xacanj daj nga angó ni coj. Ní daj rún' huin chrun mán rian yo'ój huin-ín!. Ní 'ná' ni xataj 'yaj xú' si-gaca' xú' chrá coj daj. —Daj gataj Jesús.

Parábola de la levadura

³³Ní hué daj nani Jesús angó cuento. Ní gataj sij:

—Daj rún' hua levadura, ní hué daj hua rian nicaj sun Yan'anj xata!. Ní jnachej hui 'ngo yun'unj xana daj levadura scanij huá'nij rio nún chru harina sí náhuin nico quinj guí'yaj levadura daj. —Daj gataj Jesús digyán sij daj gaxa'ni si-nuguan' sij chruhua xungüi nan.

El uso que Jesús hace de las paráboles

³⁴Ní xí'i cuento ga'mi Jesús daran' ni nuguan' nan rian ni ngüi. Ní maan nínanj cuento nani Jesús rian ni ngüi. ³⁵Ní hué nánanj ga'mi Jesús sí gahuin yya daj rún' gataj tsínj ga'mi si-nuguan' Yan'anj asij ná. Ní gataj sij:

Nanij cuento rian ni ngüi.
Ní digyánj nuguan' guixij hui
 Yan'anj asij ngaa gaxí'i xungüi
 nan.

Daj gataj tsínj daj.

Jesús explica la parábola de la cizaña

³⁶Ngaa ní gana'níj Jesús nán' ni ngüi. Ní gatúj sij chruhua hue!. Ní gahuin níchrún' ni tsínj nico' sij. Ní gataj ni sí' rian sij:

—Digyán re' rian ni únj xi'lí cuento coj xi'lí xira' riqui yo'ój daj gunun únj anj. —Daj gataj ni sij.

³⁷ Ngaa ni gataj Jesús:

—Tsínj dagaman' cān sa' daj, ni hué sij huin da'níj ni ngüüi huin man'ānj anj. ³⁸ Ni yo'ój daj huin xungüüi. Ni cān sa' daj huin ni ngüüi gane rian nicaj sun Yan'anj. Ni cān xi'lí daj huin ni ngüüi nicaj dugüüi' nga sichre. ³⁹ Ni tsínj unun' nga tsínj dō'oj daj hué sij huin sichre dagaman' cān xi'lí daj rian yo'ój. Ni daj rún' gui'yaj ni sij ngaa ganaran' ni sij, ni da'nga' daj gahuin ngaa ganahuij xungüüi nan. Ni ni tsínj ganaran' daj huin ni ángel. ⁴⁰ Ni daj rún' gahuin ngaa ganaran' ni sij coj xi'lí daj ga'níj ni sij rian yan'an gaca-á!, ni da'nga' daj gahuin ngaa ganahuij xungüüi. ⁴¹ Huéj huin da'níj ni ngüüi aj. Ni ga'ní ni ángel gan'anj naran' daran' ni tsínj digyán nuguan' quij rian ni ngüüi nico' man'ānj. Ni da'nga' daj gui'yaj ni ángel nga daran' ni tsínj gui'yaj gaquin'. Ni guiri ni ángel daran' ni sij ne' chrej xe' rian nicaj sūnj anj. ⁴² Ngaa ni ga'níj ni ángel ni tsínj xi'lí daj rian gurúj yan'an rian gunun ni sij gaco ni sij aj. Ni da'xaruj yan' ni sij nej. ⁴³ Ngaa ni ni tsínj hua sa', ni guixiguin ni sij daj rún' xiguin güi gane ni sij rian nicaj sun chrej ni sij.

'Hué dan ni sisí nun chraquij re', ni gunun re' nej aj.

El tesoro escondido

⁴⁴ Ni daj rún' hua 'ngo rasun sa' nin' ruhua ngaa garij hui ni ngüüi riqui yo'ój daj hua rian nicaj sun Yan'anj anj. Ni ganari' 'ngo tsínj rasun sa' daj. Ni gahuin nia'

ruhua sij ganari' sij rasun sa' daj. Ni nanicaj sij garij hui sij yu'u'j daj. Ni gan'anj sij gudu'uej sij daran' ni rasun man rian sij. Ni guiránj sij yo'ój daj.

La perla de gran precio

⁴⁵ Ni daj rún' hua 'ngo tsínj du'uej rasun, ni da'nga' daj hua rian nicaj sun Yan'anj. Daj si nana'ui' tsínj daj 'ngo yej sa' huin perla. ⁴⁶ Ni ngaa nari' sij 'ngo yej perla du'ue nin' ruhua daj, ngaa ni gan'anj sij gudu'uej sij daran' ni rasun man rian sij. Ni guiránj sij yej perla daj.

La red

⁴⁷ Ni daj rún' hua 'ngo nnánj ga'níj ni sij chruhua nnee ngaa da'a ni sij daran' rian xucuaj, ni da'nga' daj hua rian nicaj sun Yan'anj. ⁴⁸ Ni ngaa gara nnánj daj, ni guiri ni sij du'ua nnee. Ni gan'anj gane ni sij, ni ganacui ni sij xucuaj hua sa!. Ni gara ni sij chruhua xuguti. Ni xucuaj nitaj si hua sa' guere' ni sij. ⁴⁹ Ni da'nga' daj gahuin ngaa ganahuij xungüüi. Daj si guiri níni ni ángel ni ngüüi xi'lí scanij ni ngüüi hua sa!. ⁵⁰ Ni ga'níj ni ángel ni ngüüi xi'lí daj rian gurúj yan'an rian gunun ni sij gaco ni sij. Ni da'xaruj yan' ni sij. —Daj gataj Jesús gunun ni tsínj nico' sij.

Tesoros nuevos y viejos

⁵¹ Ngaa ni nachínj snan'anj Jesús ni sij. Ni gataj sij:

—Gunun ni é re' daran' ni nuguan' nan ga'mí ní!. —Gataj Jesús.

Ngaa ni gataj ni sij:

—Gunun ni únj, Señor. —Gataj ni sij.

52Ngaa ni gataj Jesús:

—Ni ngaa digui'yun 'ngo tsínj digyán si-ley Yan'anj daj hua rian nicaj sun Yan'anj, ni 'yaj sij daj rún' 'yaj 'ngo tsínj ducua. Ni rian hua nara sa' sij si'yaj sij, ni ga'ue guiri sij ni rasun naca, asi ni rasun guimán asij ná. —Daj gataj Jesús.

Jesús en Nazaret

53Ni ngaa ganahuij ganani Jesús ni cuento digyán sij rian ni ngüi, ngaa ni gahui sij yu'uj daj. **54**Ni nan' sij xánj sij. Ni digyán sij chruhua si-nuhui ni tsínj israelita. Ngaa ni gan'anj ruhua ni tsínj daj. Ni gataj ni sij:

—Ni a gahuin chrun tsínj daj daran' nuguan' a'mi sij únj. Ni daj ga'ue gui'yaj sij si sa' 'na' rian Yan'anj únj. **55**Sé da'níj tsínj acoj chrun huin sij, ni huin du'ua sij daj ní'. Ni hué nni sij huin María nej aj. Ni hué ni jnánj sij huin Jacobo nga José nej, Simón nej, Judas nej aj. **56**Ni nne ni xica'uij sij scanij né' aj. Ni a ga'na' ni nuguan' daj gahuin chrun sij, ni huin du'ua sij daj nej únj. —Daj gataj ni tsínj daj xi'í Jesús.

57Xi'í daj ni gahuin naco ruhua ni sij ni'yaj ni sij sí'. Saní gataj Jesús gunun ni sij:

—Nun yan'anj ni ngüi ni'yaj ni sij 'ngo tsínj a'mi si-nuguan' Yan'anj ún yu'uj huaj sí'. Saní ngaa násij sí' xánj sí' rian mān ni dugüi' sí' ni'yaj ni sij sí' aj. —Daj gataj Jesús gunun ni sij.

58Ni nitaj si gui'yaj Jesús nico si sa' nga si-fuerza sij yu'uj daj. Daj si nun guxuman ruhua ni sij ni'yaj ni sij sí'.

Muerte de Juan el Bautista

14 Ni ngaa daj gunun gobernado gu'naj Herodes xi'í nuguan' ga'mi ni ngüi xi'í Jesús. **2**Ngaa ni gataj sij gunun ni tsínj 'yaj sun rian sij:

—Hué sij huin Juan tsínj duguata' nnee ganá'nij sij scanij ni níman ganahuin sij Jesús aj. Xi'í daj ni nucuaj sij 'yaj sij si sa' nga si-fuerza sij, ruhuaj aj.

3Daj si hua ga'nin' Herodes sun sisí guida'a ni sij man'an Juan gunumi ni sij cadena, ni garí ni sij ducuaga' sí'. Da'nga' daj gui'yaj Herodes si hua xacaj sij Herodías huin unj nica jnánj sij Felipe. **4**Ni hua gataj Juan gunun Herodes sisí si ga'ue xacaj sij xaco' sij gahuin nica sij mánj. **5**Ni huin ruhua Herodes dagahui' sij Juan. Saní xu'ui' sij rian ni ngüi aj. Daj si daran' ni ngüi gani ruhua sisí Juan huin 'ngo tsínj a'mi si-nuguan' Yan'anj.

6Saní ngaa gahuin gui'yanj ganasíj yo' ga'nga Herodes, ni gahuin gui'yanj, gui'yaj sij. Ni guiran'anj da'ní xana Herodías rian daran' ni tsínj mān nga Herodes. Ni garan' ruhua Herodes ni'yaj sij ún'. **7**Ni guta' nica yya sij rian ún' sisí un rasun garan' ruhua ún' gachinj ún' rian sij, ni ga'ui' sij rian ún'. **8**Ni hua ga'ui' nni ún' 'ngo chrej daj ga'mi ún' rian sij. Ngaa ni gataj ún' gunun Herodes:

—Ruhuaj sisí riQui re' 'ngo go'o nun chra Juan tsínj duguata' nnee riānj. —Daj gataj ún' gunun Herodes, gui'yaj nni ún'.

9Ngaa ni ducu nani ruhua rey Herodes. Saní rian hua guta' nica

yya sij rian yun'unj xana daj ngaa
 mán ni tsínj ngá sij rian mesa,
 ni ga'nin' sij sun sisi ga'ui' ni sij
 chra Juan rian ún'. ¹⁰Ní ga'níj
 sij tsínj gan'anj ga'nij chra Juan
 chruhua ducuaga!. ¹¹Asíj ni nicaj
 sí' 'ngo go'o nun chra Juan ga'na' sí'
 ga'ui' sí' rian yun'unj xana da aj. Ni
 naga'ui' ún' ra'a nni ún'.

¹²Ngaa ni ga'na' ni tsínj nico'
 Juan. Ni nicaj ni sij níman daj
 gan'anj gachin' ni sij. Ni da' síj daj
 gan'anj ni sij nata' ni sij rian Jesús.

Alimentación de los cinco mil

¹³Ní ngaa gunun Jesús nuguan'
 daj, ni gatúj sij chruhua 'ngo rio
 chéj rian nnee. Ni gahui sij yu'uj
 daj gan'anj sij 'ngo yu'uj hua nini
 huin quij qui'yanj naco. Ni ngaa
 gunun ni ngüi si gan'anj Jesús, ni
 gahui ni sij xánj ni sij. Ni guinico'
 ni sij gachéj dacoj ni sij. ¹⁴Ní ngaa
 nanij Jesús chruhua rio daj, ni
 guini'i sij mán nico ni ngüi aj. Ni
 gahuin lì ruhua sij ni'yaj sij ni sí'. Ni
 ganahuin ni ngüi a'nan', gui'yaj sij.
¹⁵Ní ngaa guini, ni ga'na' ni tsínj
 nico' Jesús. Ni gataj ni sij gunun sí':

—Yu'uj nan hua ní'nij nitaj ni ngüi
 mán mánj. Ni guisíj gahuin dil'ni.
 Ngaa ni gana'níj re' ni ngüi gan'anj
 ni sí' ni xuman' daj sisi guiran ni sí'
 si xá ni sí'. —Daj gataj ni sij gunun
 Jesús.

¹⁶Ngaa ni gataj Jesús:
 —Nitaj xi'í si gan'anj ni sij. Ga'ui'
 ni é re' si xá ni sij nan nánj. —Daj
 gataj Jesús.

¹⁷Ngaa ni:
 —Maan si nicaj únj un'un'
 chrachrúnj ngá huij gue xucuaj. —
 Daj gataj ni sij.

¹⁸Ngaa ni:

—Nicaj ni é re' ga'na' ni é re' nan
 anj. —Gataj Jesús.

¹⁹Hué dan ni ga'nin' Jesús sun
 sisi gan'anj gane ni ngüi rian
 chin!. Ngaa ni guida'a sij un'un'
 chrachrúnj daj ngá huij xucuaj.
 Ni ni'yaj sij xata!. Ni naga'ui' sij
 si guruhua Yan'anj. Ngaa ni gura'
 da'aj sij ni chrachrúnj ga'ui' sij ra'a
 ni tsínj nico' sij. Ni naga'ui' ni sij
 ra'a ni ngüi daj. ²⁰Ní xa daran' ni
 sij. Ni gara ran riqui ni sij. Ngaa
 ni ganacaj ni sij si xitin' gunáj nara
 ni sij chruhua xuhuij xugutí. ²¹Ní
 guisíj 'ngo si un'un' mí ni tsínj xa
 daj. Ni nini huin ni yun'unj xana
 nga ni tsin'.

Jesús anda sobre el mar

²²Hué dan ni gui'yaj Jesús sisi
 gatu ni tsínj nico' sij chruhua rio
 chéj rian nnee gachin sini ni sij anéj
 chrej du'ua laguna xachij daj. Ni
 guna sí!. Ni gana'níj sí' ni ngüi nqan'
 ni sij xánj sij. ²³Ní ngaa guisíj na'níj
 sí' nqan' ni sij, ngaa ni gahui urin sí'
 chra 'ngo quij. Ni gan'anj sí' gachínj
 jni'yaj sí' rian Yan'anj. Ni ngaa
 guini, ni nne urin Jesús yu'uj daj.

²⁴Ní huaj guisíj rio daj da dani
 laguna xachij. Ni naxuman nnee,
 ni xitinj rio daj, gui'yaj nnee. Daj si
 ahui nané. Ni a'uij rian ni sij. ²⁵Ní
 ngaa ruhua guerenga!, ni gan'anj
 Jesús gachéj sij rian nnee huaj sij
 nari' dugüi' sij ngá ni tsínj daj. ²⁶Ní
 ngaa guini'i ni tsínj nico' sij chéj sij
 huaj sij rian nnee, ni guxu'ui' nin'
 ruhua ni sij. Ni gataj ni sij:

—Hué 'ngo sta'naj huin. —Daj
 gataj ni sij guini'i ni sij Jesús.

Ní gaguáj ni sij si guxu'ui' sij.

²⁷Saní hora ga'mi Jesús rian ni sij.
Ni gataj sij:

—Gá nucuaj niman ni é re' aj.
Yünj huin nánj. Si guxu'ui' ni é re'
mánj. —Daj gataj Jesús gunun ni sij.

²⁸Ngaa ni gataj Pedro gunun
Jesús:
—Señor, sisi hué man'án re' 'na',
asíj ni ga'nij re' gan'án gachē rian
nnee. Ngaa ni guisí rian niquín' re'.
—Daj gataj Pedro.

²⁹Ngaa ni:
—Gahua' re'. —Gataj Jesús.

Ngaa ni gananij Pedro chruhua
rio daj. Ni gachéj sij rian nnee sisi
gan'anj sij rian niquin' Jesús. ³⁰Sani
ngaa guini'i sij sisi ahui nin' ruhua
nane, ni guxu'ui' sij si gan'anj sij. Ni
nanaj huaj naga' sij chruhua nnee.
Ngaa ni gaguáj sij. Ni gataj sij:

—Señor, nacaj re' man'ānj anj. —
Daj gataj Pedro.

³¹Ngaa ni 'ngo hora guida'a Jesús
ra'a Pedro. Ni gataj sij gunun sí:

—Tsínj na'ue guxuman sa' ruhua
ni'yaj man'ānj huín re' aj. Ni un sin
huin ni gahuin huij nimán re' únj.
—Daj gataj Jesús rian sí!

³²Ni ngaa gahui nungüej sij
chruhua rio, ni ganiquin' nanę.

³³Ngaa ni ga'nal ni tsínj man
chruhua rio daj. Ni ganiquin' ráj
dacoj ni sij rian Jesús. Ni gataj ni
sij:

—Xangá' ni hué re' huin da'níj
Yan'anj anj. —Daj gataj ni sij rian
Jesús.

Jesús sana a los enfermos en Genesaret

³⁴Ni ngaa guisíj ni sij anéj du'ua
laguna xachij daj, ni guxuman ni
sij 'ngo yu'uj gu'naj Genesaret. ³⁵Ni

ngaa ganani'i ni tsínj man yu'uj
daj Jesús, ni ga'níj ni sij nuguan'
ganicaj 'ngo gue yu'uj daj. Hué
dan ni nicaj ni sij daran' ni ngüi
a'nan' ga'na' ni sij rian Jesús. ³⁶Ni
gachínj jni'yaj ni sij sisi ga'uej sí',
ni ganun ni sij hué du'ua si-gan' sí'.
Ni ganahuin daran' ni ngüi ganun
si-gan' sí'.

Lo que contamina al hombre

15 Hué dan ni ni tsínj fariseo
nga ni tsínj digyán ley nne
xuman' Jerusalén, ni ga'na' ni sij
rian Jesús. Ni nachínj snan'anj ni sij
Jesús. Ni gataj ni sij:

—Ni un sin huin ni na'ue
dagahuin ni tsínj nico' rucu re' si-
ducuanj ni xi únj únj. Daj si nun
nania' ni sij ngaa xa ni sij chra. —
Daj gataj ni sí!

³Ngaa ni gataj Jesús:
—Ni un sin ni nun dagahuin ni
é re' nuguan' ga'nin' Yan'anj sun
rian né' únj. Ni da'nga' daj 'yaj ni
é re' xi'lí si dagahuin ni é re' nga
si-ducuanj man'an ni é re'. ⁴Daj
si gataj Yan'anj: “Guinun yan'ānj
re' chré re' nga nní re'. Ni un tsínj
a'mi quij rian chrej sij nga nni sij, ni
gahui' sij nánj.” Da'nga' daj ga'nin'
Yan'anj sun rian né'. ⁵Saní ataj ni
é re' sisi ga'ue gataj 'ngo tsínj daj
gunun chrej sij nga nni sij: “Huin
ruhuáj riquij san'anj nan rian
nungüej é re', saní san'anj nicā nan
huin ofrenda güenda Yan'anj anj.”
Hué daj ataj ni é re'. Hué dan ni un
tsínj gataj nuguan' nan, ni na'uej
ruhua sij chracuoj sij chrej sij nga
nni sij. ⁶Ni xi'lí si-ducuanj ni é re', ni
'yaj yun ni é re' si-nuguan' Yan'anj
anj.

⁷'Tsínj digya' yun'unj huin ni é re'. Hua yya x̄anga' si-nuguan' xi né' Isaías ngaa ga'mi sij si-nuguan' Yan'anj xi'í ni é re'. Daj si gataj sij:

⁸Nun yan'anj ni ngüi nan nga du'ua ni sij yünj anj.

Sani nini huin niman ni sij nánj.

⁹Nitaj si ní'yanj si nico' ni sij yünj mánj.

Daj si nuguan' digyán ni sij huin nuguan' a'nin' ni tsínj sun anj.

Ni sé si digyán ni sij si-nuguan'anj mánj.

Hué daj gataj Yan'anj garun Isaías asij ná. —Daj gataj Jesús gunun ni tsínj fariseo ngā ni tsínj digyán ley.

¹⁰Hué dan ni gáquínj Jesús ga'na' ni ngüi rian sij. Ni gataj sij:

—Gúnum ni é re'. Ni gara da'nga' ruhua ni é re' nej aj. ¹¹Nitaj si gahuin quij chruhua niman 'ngo tsínj daj, 'yaj rasún atuj du'ua sij mánj. Sani gahuin quij chruhua niman sij, 'yaj nuguan' ahui du'ua sij. —Daj gataj Jesús.

¹²Ngaa ni gahuin níchrun' ni tsínj nico' Jesús rian sij. Ni ganachínj snan'anj ni sí' man'an Jesús. Ni gataj ni sí':

—Ni'í re' sisi nun garan' ruhua ni tsínj fariseo nuguan' ga'mí re' daj ní'. —Daj gataj ni sí' gachínj snan'anj ni sí' Jesús.

¹³Ngaa ni gataj Jesús:

—Gorocoj chré daran' coj nun gunun chré nne xata!. Ni daj rún' hua ni coj nitaj si ní'yanj daj da'nga' daj hua ni tsínj daj. ¹⁴Ga'nin' ruhua á re' ngā ni sij. Daj si tsínj duri huin ni sij. Ni huin ni sij ni tsínj da'a ra'a ango ni tsínj duri. Ni sisi da'a 'ngo tsínj duri ra'a tsínj duri ngā sij huaj

nungüej sij, ni guinij nungüej sij chruhua yu'uj. —Daj gataj Jesús.

¹⁵Ngaa ni gataj Pedro gunun Jesús:

—Gátañ re' un sin huin ruhua nuguan' daj gata, ni gunun únj. —Daj gataj Pedro.

¹⁶Ngaa ni gataj Jesús:

—Hua gué na'ue gara da'nga' ruhua á re' ní'. ¹⁷Ni li sa' ni é re' sisi daran' rasún atuj chruhua du'ua 'ngo tsínj daj, ni achin-ín' riqui sij. Hué dan ni ahui-í' ri'i sij. ¹⁸Sani ni nuguan' ahui du'ua 'ngo tsínj daj, ni 'na' ni nuguan' daj niman sij. Ngaa ni gahuin quij chruhua niman tsínj daj, 'yaj nuguan' quij ahui chruhua niman sij. ¹⁹Daj si nan huin nuguan' quij ahui chruhua niman ni ngüi: Ani quij ruhua ni sij. Ni dagahui' ni sij níman nej. Ni a'mi ni sij ngā nica ango ni ngüi nej. Ni 'yaj squira' ni sij ngā ango ngüi nej. Ni 'yaj tu ni sij nej. Ni uta' chre ni sij gaquin' ni dugüi' ni sij. Ni a'mi quij ni sij xi'í ni dugüi' ni sij. ²⁰Ni hué ni nuguan' quij nan 'yaj sisi gahuin quij niman 'ngo tsínj daj. Sani sé si x̄anga' sisi gahuin quij niman sij 'yaj si nitaj si nania' sij ngaa xa sij chra. —Daj gataj Jesús gunun ni tsínj nico' sij.

La fe de la mujer cananea

²¹Hué dan ni gahui Jesús yu'uj daj gan'anj sij rian ngaj xuman' Tiro ngā xuman' Sidón. ²²Ngaa ni ga'na' 'ngo yun'unj x̄ana nne estado Cananea. Ni gaguáj ún!. Ni gataj ún' gunun Jesús:

—Señor, nani yaco ruhuá re' nj'yaj re' man'ānj huín re' da'níj David. Daj si ran' da'ni xanāj sayun, 'yaj

nane xi'i nun niman ún!. —Daj gataj ún!.

²³Sani ni a 'ngo nuguan' nun gataj Jesús gunun yun'unj x̄ana dā mánj. Ngaa ni gahuin nichrun' ni tsínj nico' Jesús. Ni gachínj jni'yaj ni sij rian sí!. Ni gataj ni sij:

—Gataj re' gunun yun'unj x̄ana daj sisi gan'anj ún!. Daj si aguáj ún' nico' ún' rucu únj anj. —Daj gataj ni sij.

²⁴Ngaa ni gataj Jesús:

—Maan si ga'níj Yan'anj ga'nāj rian ni tsínj israelita sisí huin ni sij daj rún' huin ni xachij ga ni'ya. —Daj gataj Jesús.

²⁵Sani ga'na' yun'unj x̄ana daj ganiquín' ráj dacoj ún' rian Jesús. Ni gataj ún!:

—Señor, chracuij re' man'ānj. —Daj gataj ún!.

²⁶Ngaa ni gataj Jesús:

—Nitaj si hua sa' si ga'ne' si-chrachrunj ni tsin' gal'ui' du'ua ni xuhue mánj. —Daj gataj Jesús.

²⁷Ngaa ni gataj ún!:

—Xanga' Señor. Sani da' ni xuhue xa xú' ni daru chrachrúnj guinij du'ua mesa nne tsínj huin dánj xú!. —Daj gataj ún' gunun Jesús.

²⁸Ni gataj Jesús:

—Xuman nico ruhuá re' ni'yáj re' man'ānj. Xi'i daj ni daj rún' achínj re' riānj, ni hué daj gahuin. —Daj gataj Jesús.

Ni hué hora daj ni ganahuin da'níj ún!.

Jesús sana a muchos

²⁹Ngaa ni gahui Jesús yu'u'j daj gan'anj sij. Ni guisíj sij nichrun' du'ua laguna xachij gu'naj Galilea. Ni gahui sij chra 'ngo quij gan'anj

sij. Ni gan'anj gane sij. ³⁰Ngaa ni gahuin nichrun' nico ni ngüi rian Jesús. Ni nicaj ni sij ni ngüi nare' dacój ngä ni ngüi duri nej, ni ngüi rá'yan' nej ngä ango ni ngüi a'nan' nicaj ni sij ga'na' ni sij rian nne Jesús. Ni ganahuin ni sij, gui'yaj Jesús. ³¹Xi'i daj ni gan'anj ruhua ni ngüi ga'na' daj guini'lí ni sij sisi gal'ue ga'mi ni ngüi rá'yan!. Ni ganahuin ni ngüi yacuan nej. Ni ga'ue gache sa' ni ngüi nare' dacój nej. Ni ga'ue naxiguín rian ni ngüi duri guini'yaj ni sij nej. Ni ga'mi sa' ni sij rian Yan'anj nico' ni tsínj israelita.

Alimentación de los cuatro mil

³²Ngaa ni gaquínj Jesús ga'na' ni tsínj nico' sij. Ni gataj sij:

—Nahuin i'ruhuāj ni'yā daran' ni ngüi mān nan. Daj si sij huq'niñ güi mān ni sij ngāj aj. Ni nitaj si nicaj ni sij si xā ni sij mánj. Ni nitaj si huin ruhuāj na'nī ni sij nān' ni sij ngaa nitaj si nicaj ni sij si xā ni sij si guinichre ni sij huaj ni sij chruhua chrej si ruhuaj aj. —Daj gataj Jesús.

³³Ngaa ni gataj ni tsínj nico'

Jesús:

—Ni a guiran únj chrachrúnj gunuman riqui daran' ni ngüi nan 'ngo yu'u'j quij qui'yanj nāco únj. —Daj gataj ni tsínj nico' Jesús.

³⁴Ngaa ni gataj Jesús:

—Ni undaj chrachrúnj nicaj ni é re' únj. —Daj gataj Jesús.

—Ichij chrachrúnj nicaj únj. —Gataj ni sij.

³⁵Ngaa ni ga'nin' Jesús sun sisi gan'anj gane ni ngüi rian yo'ój.

³⁶Ni guida'a sij ichij chrachrúnj ngä doj xucuaj daj ra'a sij. Ni nago' sij

si guruhua Yan'anj. Ngaa ní gura' da'a'j sij chrachrúnj daj ngá xucuaj ga'u'j sij ra'a ni tsínj nico' sij. Ní da'nga' ni sí' ra'a ni ngüi mán anj.

³⁷ Ní xa daran' ni sij. Ní gara ran riqui ni sij. Ní gara ichij xuguti, gui'yaj si xitin' gunáj aj. ³⁸ Ní guisíj gan'anj mí ni tsínj xa daj. Ní nini huin ni yun'unj xána nga ni tsin'!

³⁹ Ngaa ní na'níj Jesús nan' ni ngüi. Ní gahui sij chruhua 'ngo rio chéj rian nnee. Ní guisíj sij 'ngo yu'uj gu'naj Magdala.

La demanda de una señal

16 Ngaa ní ga'ná! ni tsínj fariseo nga ni tsínj saduceo rian Jesús si huin ruhua ni sij gui'yaj ni sij 'ngo xi' gátu Jesús nga si-nuguan' sí!. Ní gachínj ni sij sisi gui'yaj Jesús 'ngo si sa' 'ná! rian Yan'anj digyán sij sisi 'ná! sij rian Yan'anj. ²Sani gataj Jesús:

—Ataj ni é re' ngaa guini: "Guixiguin sa' a'yoj. Daj si hua mare xata!", ataj ni é re'. ³Ní ne' nigan' ataj ni é re': "Gaman', ni gahui nané. Daj si hua mare xata!. Ni nachej nga xata!", ataj ni é re'. Tsínj digya' yun'unj huin ni é re'. Ni'i ni é re' daj hua xata!. Sani na'uej ruhua ni é re' gunun ni é re' si digyán Yan'anj rian ni é re' xi'j si daj hua chruhua xungüi ni güi nan.

⁴Huin ruhua ni ngüi xi'i mán acuan' guini'i ni sij 'ngo si sa' 'ná! rian Yan'anj. Sani si gui'yā 'ngo si sa' guini'i ni é re' mánj. Maan si guini'i ni é re' sisi guiran'anj daj rún' guiran' tsínj gu'naj Jonás asij ná. —Daj gataj Jesús.

Ngaa ní dunáj Jesús ni sij. Ní gan'anj sí'.

La levadura de los fariseos

⁵Ní ngaa guisíj ni tsínj nico' Jesús anéj chrej du'ua laguna xachij daj, ní xacaj ni sij cuenta sisi guini'yun ruhua ni sij guinicaj ni sij chrachrúnj. ⁶Ngaa ní gataj Jesús gunun ni sij:

—Gá cuidado ni é re' nga man'an án re'. Ní guruj a ni é re' nga si-levadura ni tsínj fariseo ngá ni tsínj saduceo. —Daj gataj Jesús.

⁷Ní ga'mi man'an ni sij gunun dugüi' ni sij sisi da'nga' daj ga'mi Jesús xi'í si nitaj chrachrúnj nicaj ni sij ga'ná! ni sij.

⁸Sani unun Jesús si gani ruhua ni sij. Ní gataj sí':

—Doj huin si xuman ruhua ni é re' ni'yaj ni é re' man'ānj nánj. Ní un sin huin ní ani ruhua ni é re' sisi nitaj chrachrúnj nicaj ni é re' ga'ná! á re' únj. ⁹Hua gué na'ue gunun ni é re' ga!. Nitaj si nun ruhua ni é re' xi'í un'un chrachrúnj xa un'un mí ni tsínj daj. Ní nitaj si nun ruhua ni é re' undaj xuguti nara ni é re' dasu gunáj daj. ¹⁰Ní nitaj si nun ruhua ni é re' xi'í ichij chrachrúnj xa gan'anj mí ni tsínj daj. Ní hué daj nitaj si nun ruhua ni é re' undaj xuguti ganara ni é re' dasu gunáj.

¹¹Ní un sin huin ní na'ue gara da'nga' ruhua ni é re' sisi nitaj si a'mí xi'í chrachrúnj únj. Maan si a'mí sisi ga cuidado ni é re' ngá si guiran' ni é re', gui'yaj si-levadura ni tsínj fariseo ngá ni tsínj saduceo aj. —Daj gataj Jesús.

¹²Hué dan ní gara da'nga' ruhua ni sij sisi nun ga'mi Jesús xi'í levadura 'nij chrachrúnj. Maan si na'uej ruhua sí' sisi digya' yun'unj

si-nuguan' ni tsínj fariseo nga ni tsínj saduceo ni sij.

La confesión de Pedro

¹³Ni ngaa huaj gahuin níchrun' Jesús xuman' Cesarea de Filipo, ni gachínj snan'anj sij ni tsínj nico' sij. Ni gataj sij rian ni sí:

—Huéj huin da'níj ni ngüi aj. Ni un tsínj huinj ataj ni ngüi, ruhua ni é re' únj. —Daj gataj Jesús gunun ni sij.

¹⁴Ngaa ni gataj ni sij:

—Ataj da'aj ni ngüi sisi hué re' huin Juan tsínj duguata' nnee. Ni ataj ango ni sij sisi hué re' huin tsínj gu'naj Elías. Ni ataj ángo ni sij sisi hué re' huin tsínj gu'naj Jeremías, asi ango tsínj ga'mi si-nuguan' Yan'anj asij hua ná. —Daj gataj ni sij.

¹⁵Ngaa ni:

—Ni un tsínj huinj ruhua man'an ni é re' únj. —Gataj Jesús gunun ni sij.

¹⁶Ngaa ni gataj Simón Pedro gunun Jesús:

—Hué re' huin Cristo da'níj Yan'anj hua ni'na' aj. —Daj gataj Pedro.

¹⁷Ngaa ni gataj Jesús:

—Hua 'ueé rián re' Simón huín re' da'níj Jonás si 'ngo tsínj nitaj digyán nuguan' nan rián re' mánj. Saní urin chrē nne xata' huin si

dogyán nuguan' nan rián re' nánj.

¹⁸Ni atā gunun re' sisi so' gu'naj Pedro xi'í si daj rún' huin huej ngaj xi'í huej huín re'. Ni daj rún' 'yaj ni sij une' ni sij huej xiráj huej, ni da'ngá' daj gune' man'ānj ni tsínj nico' man'ānj rian huej daj. Ni a doj si ga'ue guí'yaj gana daran'

si-fuerza ni sichre rian ni tsínj da ga mánj. ¹⁹Ni riquíj llave guinicaj re' rian nicaj sun Yan'anj. Ni sisi gue re' 'ngo nuguan' chruhua xungüi, ni da'ngá' daj gué Yan'anj nuguan' daj ne' xata' nej aj. Ni sisi nitaj si gué re' 'ngo nuguan' chruhua xungüi, ni da'ngá' daj nitaj si gué Yan'anj nuguan' daj ne' xata' nej mánj. —Daj gataj Jesús rian Pedro.

²⁰Ngaa ni ga'nin' Jesús sun rian ni tsínj nico' sij sisi sij nata' ni sí' rian a 'ngo ni ngüi sisi hué sij huin Cristo.

Jesús anuncia su muerte

²¹Hué dan ni asij güi daj, ni gaxí'i Jesús gataj snan'anj sij rian ni tsínj nico' sij sisi hua niñan gan'anj sij xuman' Jerusalén guiran' nico sij sayun, guí'yaj ni tsínj huin achij ngá ni chrej huin rian nej ngá ni tsínj digyán ley nej. Ni dagahui' ni sí' man'an sij. Saní xiráj huá'nij güi, ni gana'nij sij. —Daj gataj Jesús xi'í man'an sij.

²²Ngaa ni nicaj Pedro Jesús gan'anj anéj sij doj. Ni gaxí'i sij chran' sij sí'. Ni gataj sij:

—Gahuin 'í ruhuá re' ni'yaj re' man'án re'. Ni a 'ngo güi sij guiran' re' daj, Señor. —Daj gataj Pedro.

²³Saní nanicaj Jesús gataj sij gunun Pedro:

—Guxun re' man'án re' riānj, Satanás. Daj si hué re' huin 'ngo si naránj chrej huaj man'ānj. Ni nitaj si huin ruhuá re' rún' huin ruhua Yan'anj mánj. Rún' huin ruhua ni ngüi huin ruhuá re' nánj. —Daj gataj Jesús gunun Pedro.

²⁴Hué dan ni gataj Jesús gunun ni tsínj nico' sij:

—Sisi hua 'ngo tsínj ruhua nico' yūnj, ngaa ni dunaj tsínj daj si-chrej man'an sij. Ngaa sij ni gata sij rugutsi guinicco' sij yūnj guiran' sij sayun ngāj aj. ²⁵Ni tsínj na'uej ruhua gahui' ngāj, ni ga ni'ya sij. Sanj tsínj ga'ue gahui' xi'l man'ānj ngā xi'l nuguan' sa' a'mi man'ānj, ngaa ni gane niganj sij aj. ²⁶Ni sisi guilyaj gana 'ngo tsínj daj daran' si mān chruhua xungüi gahuin si'yaj sij, ngaa ni un sin huin-ín' sisi ga ni'ya niman sij, ruhua ni é re' únj. Nitaj si guilyaj gana sij mánj. Niqui niman tsínj guilyaj gana nico chruhua xungüi nan sisi ga ni'ya niman sij. Daj si na'ue nahuin sa' niman sij, guilyaj ni rasun mánj.

²⁷Daj si ga'nāj ngā ni si-ángel huinj da'níj ni ngüi. Ni gahuin 'uej nin' ruhua, guilyaj chrē. Ngaa ni naru'uē rian go'ngo ni ngüi daj rún' guilyaj go'ngo ni sij. ²⁸Xanga' atā gunun ni é re' sisi nitaj si gahui' da'aj ni ngüi mán yu'uj nan da' guini'lí ni sij ga'na' man'ānj guinicaj sūnj huinj da'níj ni ngüi. —Daj gataj Jesús rian ni tsínj nico' sij.

La transfiguración

17 Ni ngaa gachin huatan' güi, ni nicaj Jesús Pedro nga Jacobo ngā Juan huin jnánj Jacobo gan'anj nini sij chra 'ngo quij xacan. ²Ni ganahuin 'ueé nneé cùj Jesús ne' rian ni sij. Ni xiguin rian Jesús rún' hua güi huaj. Ni ganahuin gatsi si-gan' sij daj rún' hua si xiguin huaj. ³Hué dan ni gurugüi' tsínj gu'naj Moisés nga tsínj gu'naj Elías rian nne ni sij. Ni ga'mi nungüej sí' nga sij. ⁴Ngaa ni gataj Pedro gunun Jesús:

—Sa' mán né' yu'uj nan Señor. Sisi garan' ruhuá re', ni guilyaj né' huá'nij hue' recoj le aj. Ni ngoj man'án re'. Ni angoj Moisés. Ni ángoj Elías. —Daj gataj Pedro gunun Jesús.

⁵Ni ngaa hua gué ga'mi Pedro, ni nasíj 'ngo nga xiguin garan-án' rian ni sij. Ni scanij nga daj gunun ni sij 'ngo nane si gataj-á':

—Nan huin da'níj i ruhuaj aj. Gunun a ni é re' si ataj sij. —Hué daj gataj Yan'anj gunun ni sij.

⁶Ni ngaa gunun ni tsínj nico' Jesús nuguan' daj, ni ga' nitu ni sij rian yo'ój. Daj si ducu guxu'ui' ni sij. ⁷Ngaa ni gahuin nichrun' Jesús ganun ra'a sí' ni sij. Ni gataj sí':

—Ganaxuman ni é re'. Ni si guxu'ui' ni é re' mánj. —Daj gataj Jesús gunun ni sij.

⁸Ni ngaa nachica ni sij rian ni sij, ni guini'lí ni sij niquin' urin Jesús yu'uj daj.

⁹Ni ngaa huaj ni sij nanij ni sij chrä quij, ni ga'nin' Jesús sun rian ni sij. Ni gataj sí':

—Si gununa ni é re' si guini'lí ni é re' rian ni ngüi mánj. Ni da' síj gana'nij da'níj ni ngüi huin man'ānj, asij ni ga'ue nata' ni é re' aj. —Daj gataj Jesús.

¹⁰Ngaa ni nachínj snan'anj ni tsínj nico' Jesús man'an sí'. Ni gataj ni sij:

—Ni un sin huin ataj ni tsínj digyán ley sisi hua sini ga'na' Elías únj. —Daj gataj ni sij.

¹¹Ngaa ni gataj Jesús:

—Xanga' ga'na' sini Elías. Ni hué sí' nagui'yaj sa' daran'anj. ¹²Ni atā gunun ni é re' sisi hua ga'na' Elías. Sanj nun nani'lí ni ngüi man'an sí'

mánj. Ni gui'yaj quij ni sij daran' si garan' ruhua ni sij gui'yaj ni sij ngá sí'. Ni daj rún' guiran' sí', ni da'nga' daj guiran' man'ānj huñj da'níj ni ngüi, gui'yaj ni sij aj. —Daj gataj Jesús.

¹³Hué dan ni gara da'nga' ruhua ni tsínj nico' Jesús sisí a'mi sí' xi'l Juan tsínj duguata' nnee.

Jesús sana a un muchacho lunático

¹⁴Ni ngaa guisíj ni sij rian mán ni ngüi, ni ga'na' 'ngo tsínj daj. Ni ganiquin' ráj dacoj sij rian Jesús.

¹⁵Ni gataj sij:

—Señor, ganani yaco ruhuá re' ni'yáj re' doj da'ní si ahui' na'nij sij aj. Ni ran' nin' ruhua sij sayun. Ni sij ga'i natúj sij rian yan'an an. Ni sij ga'i guinij sij chruhua nnee nej aj. ¹⁶Ni nicá ga'naj rian ni tsínj nico' man'án re' aj. Saní nun ga'ue ganahuin da'ní, gui'yaj ni sij mánj. —Daj gataj tsínj daj gunun Jesús.

¹⁷Ngaa ni gataj Jesús:

—Na'ue guxuman ruhua ni é re' huin ni é re' ni tsínj mán yyaj. Ni xi'l niman án re'. Ngaa ni na'ue gane nigān ngá á re'. Ni si gunucuá si-chrej ni é re' niganj mánj. Nicaj ni é re' sij ga'na' ni é re' riánj anj. —Daj gataj Jesús gunun ni tsínj nico' sij.

¹⁸Ngaa ni ga'mi huee Jesús rian nane xi'l daj. Ni gahui-í chruhua niman tsin' daj. Ni 'ngo hora ganahuin sij, gui'yaj Jesús.

¹⁹Ngaa ni ga'na' urin ni tsínj nico' Jesús rian sí!. Ni gataj ni sij:

—Ni un sin huin ni nun gunucuaj únj guiri únj nané xi'l niman tsin' daj únj. —Daj gataj ni sij.

²⁰Ngaa ni gataj Jesús:

—Daj si na'ue guxuman sa' ruhua ni é re' ni'yaj ni é re' man'ānj. Ni xanga' atā gunun ni é re' sisí guxuman ruhua ni é re' 'ngo ritsin daj rún' hua can cuej nasa, ngaa ni ga'ue gataj ni é re' gunun quij da aj: "Guxun re' man'án re' yu'uj nan gan'anj re' ango yu'uj." Ni da'nga' daj gahuin sisí guxuman xanga' ruhua ni é re' nánj. Ni ga'ue gui'yaj ni é re' daran'anj. ²¹Saní ga'ue guiri né' ni nané xi'l nan urin si gachinj jni'yaj né' rian Yan'anj, ni gui'yaj né' ayuno nej. —Daj gataj Jesús gunun ni sij.

Jesús anuncia otra vez su muerte

²²Ni ngaa mán ni sij estado Galilea, ni gataj Jesús gunun ni sij: —Huéj huin da'níj ni ngüi. Ni naga'ui' 'ngo tsínj daj man'ānj ra'a ni tsínj. ²³Ni dagahui' ni sij man'ānj. Saní xiráj huq'nij güi, ni gana'ní nánj. —Daj gataj Jesús gunun ni sij.

Ni ducu ganani ruhua ni sij, gui'yaj nuguan' daj.

Pago del impuesto del templo

²⁴Ni ngaa guisíj Jesús nga ni tsínj nico' sij xuman' Capernaum, ngaa ni gan'anj ni'yaj ni tsínj a'nej pesto güenda nuhui rian nne Pedro. Ngaa ni nachínj snan'anj ni sij sí!. Ni gataj ni sij:

—Si ga'ui' si-maestro ni é re' pesto xi'l nuhui nan ga a!. —Daj gataj ni sij.

²⁵Ngaa ni:

—A'ui' sij aj. —Gataj Pedro gunun ni sij.

Ngaa ni ngaa gatúj Pedro chruhua hue', ni ga'mi sini Jesús. Ni gataj sí!:

—Daj huaj ruhuá re', Simón. Ni ni rey mān chruhua xungüi nan, ni un ngüi a'nej ni sij san'anj ruhuá re' ún̄j. A'nej ni sij san'anj rian man'an da'níj ni sij ní!. Así a'nej ni sij san'anj rian ango ni ngüi sa'. Da' 'yaj ni sij, ruhuá re' ún̄j. —Gataj Jesús.

²⁶Ngaa ni:

—Rian ango ni ngüi. —Gataj Pedro.

Ngaa ni gataj Jesús:

—Hué dan ni ni da'níj sij si ga'ui' ni sij pesto mánj.

²⁷Sani güenda sisí si ga'man ruhua ni sij, ni güij re' laguna xachij, ni dinij re' suelo chruhua nnee. Ni xucuaj guida'a sini suelo daj guiri re'. Ni du'ua xuj nari' re' 'ngo moneda huin san'anj. Ni huej guisij ga'ui' re' xi'líj nga xi'lí man'án re' nej aj. —Gataj Jesús gunun Pedro.

¿Quién es el mayor?

18 Ni ngaa daj, ni ga'na! ni tsínj nico' Jesús rian sí!. Ni gataj ni sij:

—Ni un tsínj huin achij doj rian nicaj sun Yan'anj xata' ruhuá re' ún̄j. —Daj gataj ni sij.

²Ngaa ni gaquínj Jesús ga'na! 'ngo tsin' gani sij dani ni sí!. ³Ni gataj sij:

—Xanga' atā gunun ni é re' sisí si ga'ue naduna ni é re' niman ni é re', guiyaj ni é re' rún' 'yaj ni tsin', ngaa ni si ga'ue gatu ni é re' rian nicaj sun Yan'anj xata' mánj. ⁴Ni un tsínj ga'uej ruhua gahuin lij daj rún' huin lij tsin' niquin' nan, ni hué sij gahuin achij rian nicaj sun Yan'anj.

⁵Ni un tsínj nahuin ra'a 'ngo tsin' nan xi'lí si nicaj dugüi' sij ngāj, ngaa ni nahuin ra'a sij man'ánj nej.

Ocasiones de caer

⁶Ni sisí xuman ruhua 'ngo tsin' nan ni'yaj sij yünj, ngaa ni niqui nin' ruhua niman 'ngo tsínj daj sisí digyán sij guiyaj 'ngo tsin' nan gaquin' nánj. Sa' huin sisí numi ni sij 'ngo to xxi xá tsínj daj, ngaa ni ga'nij ni sij gan'anj sí' chruhua nnee yan'anj anj. ⁷Niqui nin' ruhua niman ni tsínj mān chruhua xungüi nan. Daj si digyán ni sij sisí guiyaj dugüi' ni sij gaquin'. Ni hua niān sisí da'nga' daj gahuin. Sani niqui nin' ruhua niman tsínj digyán chrej quij hua daj rian dugüi' sij.

⁸Hué dan ni sisí guiyaj re' 'ngo gaquin', guiyaj ra'á re', así guiyaj dacój re' gaquin', ngaa ni ga'nin' re', ni xacaj re' guere' re'. Daj ni ga gundu ra'a re' nga dacój re' gatu re' rian gane niganj re' nga Yan'anj sisí huij ra'á re' nga huij dacój re', sani ga'nij Yan'anj man'án re' rian yan'an aca niganj nin!. ⁹Ni sisí guiyaj re' gaquin', guiyaj rundij rián re', ngaa ni guiri re', ni xacaj re' guere' re'. Daj ni urin rundij rián re' gatu re' rian gane niganj re' nga Yan'anj sisí huij rundij rián re', sani ga'nij Yan'anj man'án re' rian yan'an aca niganj nin!.

La parábola de la oveja perdida

¹⁰Sí gani ruhua ni é re' sisí nitaj si níyanj ni tsin' hua lij mánj. Daj si ataj snan'ān gunun a ni é re' sisí dugumi sa' ni ángel ni tsin' da aj. Ni niganj nin' niquin' ángel daj rian chrē nne ne' xata!. Ni unun chrē si nata' ni ángel daj. ¹¹Daj si ga'na' nacā ni ngüi ga nil'ya si huinj da'níj ni ngüi.

¹²'Ngaa nī gunun sāl a nī é rē sī gāmī nan. Sisī nicaj 'ngo tsínj daj 'ngo ciento xachij, nī gā nī'ya 'ngo xuj, nī daj dānga' guīyaj tsínj dan daj ngā dán sij, ruhua nī é rē ún̄j. Gara sij gan'anj xia xinun' gan'anj xachij daj riqui quij. Nī gan'anj nāna'uī sij xachij gan'anj nī'ya daj dayun nārī sij dán sij aj. ¹³Nī sisī gunucuaj sij narī sij xucu daj, ngaa nī xāngā' yya atā gunun nī é rē sisī huaj gahuin nīa ruhua sij ngā xucu daj ngā ango gan'anj xia xinun' gan'anj xucu nun gā nī'ya aj. ¹⁴Hué ducuánj daj nāuej ruhua chrej nī é rē nne xata' sisī gā nī'ya nī ā 'ngo nī tsin' nan mán̄j.

Cómo se debe perdonar al hermano

¹⁵Nī sisī guīyaj 'ngo jnánj rē gaquin' rián rē, ngaa nī gan'anj gāmī urín rē ngā sij xī'i gaquin' daj. Nī sisī gunun sij sī gataj rē, ngaa nī gana'mi sāl nungüej é rē nán̄j. ¹⁶Nī sisī nāue gunun sij sī gataj rē, nī gaquinj rē gan'anj ango tsínj yahuij tsínj ngā rē rian nne sij. Nī sisī gan'anj huij huānij testigo daj, nī gahuin yya ruhua nī é rē xī'i sī hua huij huānij nī é rē guini'i daj hua nuguan' daj. ¹⁷Hué dan nī sisī nāue gunun sij sī ataj anin' é rē, ngaa nī nāta' anin' é rē rian daran' nī tsínj nico' Yan'anj. Nī sisī nāue gunun sij sī ataj daran' nī tsínj nico' Yan'anj, ngaa nī gani ruhua nī é rē sisī huin sij 'ngo tsínj 'nāl anéj chrej, asī huin sij 'ngo tsínj ānej xācan pesto.

¹⁸'Ngaa nī xāngā' atā gunun nī é rē sisī sī gāue gānīn' ruhua nī é rē nga 'ngo nuguan' hua chruhua xungüī nan, nī dānga' daj sī gāue gānīn' ruhua Yan'anj nne xata' nej.

Nī hué daj sisī gāue gānīn' ruhua nī é rē nga 'ngo nuguan' chruhua xungüī nan, nī dānga' daj gāue gānīn' ruhua Yan'anj nne xata' nej. ¹⁹Nī atā gunun nī é rē sisī uyan hua ruhua huij ran' nī é rē xī'i 'ngo nuguan' chruhua xungüī nan, nī gāue gachinj jnī'yaj nungüej é rē rian chrē nne xata'. Nī riqui xāngā' chrē sī achínj nungüej é rē daj.

²⁰Daj sī rian huij huānij ran' nī é rē nahuin yu' nī é rē ngā si-xugüī, nī yu'uj daj nnēj dāni nī é rē aj. —Daj gataj Jesús gunun nī tsínj nico' sij.

²¹Ngaa nī gahuin nichrun' Pedro nachínj snan'anj sij Jesús. Nī gataj sij:

—Nī undaj huin guisij guinicā niman nico ngā gaquin' guīyaj jnān riánj ún̄j. Asī da ichij ní!. —Daj gataj Pedro.

²²Ngaa nī gataj Jesús:

—Sé sī atā gunun rē sisī da ichij mán̄j. Sanī da huānij xia chi' número nicaj ichij huin, nī dānga' daj guinicaj rē niman nico rian jnánj rē aj.

Los dos deudores

²³Nī daj rún' 'yaj 'ngo rey ngaa ruhua sij naguīyaj sij cuenta rian nī tsínj 'yaj sun rian sij, nī dānga' daj huin rian nicaj sun Yan'anj. ²⁴Nī ngaa gaxīl'i naguīyaj sij cuenta, nī nicaj nī sij gāna' sij 'ngo tsínj dāui gāl'i nīn' ruhua millón huin san'anj rian rey daj. ²⁵Nī rian nāue gunucuaj sij nāru'ue sij sī dāui sij, ngaa nī gānīn' rey daj sun sisī gudu'ue nī sij nungüej nicā moso daj ngā dānīj sij nej, daran' sī mán rian sij nej. Asij nī guirīl rey sī dāui moso daj nāru'ue sij. ²⁶Ngaa

ni ganiquin' ráj dacoj moso daj rian rey, ni ga'mi yaco sij, gataj sij gunun rey: "Señor, ganahuin 'i ruhuá re' ni'yaj re' doj yünj, ngaa ni naru'ue nin'inj rián re' aj." Daj gataj sij gunun rey daj. ²⁷ Ngaa ni ganahuin 'i ruhua rey daj ni'yaj sí' sij. Ni ga'nin' ruhua sí' ngā si da'ui sij. Ni na'níj sí' gan'anj sij.

²⁸ Sani ngaa gahui moso daj gan'anj sij, ni nari' dugüi' sij ngā ango moso 'yaj sun nuguán'an ngā sij huin moso da'ui doj san'anj rian sij. Ngaa ni guida'a sij, ni gani sij xá sí!. Ni gataj sij: "Naru'ue so' si da'ui so' riánj anj." Gataj sij gunun tsínj daj. ²⁹ Ngaa ni ganiquin' ráj dacoj sí' rian sij. Ni ga'mi yaco sí' rian sij. Ni gataj sí!: "Ganahuin 'i ruhuá re' ni'yaj re' yünj, ngaa ni naru'ue nin'inj rián re'!" Gataj sí!. ³⁰ Sani nun ga'uej sij. Ni garíj sij ducuaga' gunun sí' sisi da naru'ue sí' daran' si da'ui sí' rian sij, ngaa ni gahui sí!.

³¹ Ngaa ni ngaa guini'i ango ni moso 'yaj sun rian rey daj guiran' moso daj, ni nin' ruhua ganani ruhua ni sij. Ni gan'anj nata' ni sij daran'anj rian rey daj. ³² Ngaa ni gaquínj rey ga'na' moso da'ui nico daj. Ni gataj sí' rian sij: "Moso xi'i huin re'. Ga'nin' ruhuáj ngā daran' si da'ui re' xi'i si ga'mi yacó re' riánj saj. ³³ Ni daj rún' gahuin 'i ruhuáj ni'yá so', ni da'nga' daj hua niqan gahuin 'i ruhuá re' guini'yaj re' dugüi' re' saj." Daj gataj rey rian si-moso sij. ³⁴ Ngaa ni nin' ruhua ga'man ruhua rey daj. Ni nago' sij moso daj rian caíde dugumi rian ducuaga' sisi gahuin sí' castigo da naru'ue sí' daran' si da'ui sí' rian rey aj.

³⁵ Ni daj rún' gui'yaj rey daj da'nga' daj gui'yaj chré nne xata' ngā ni é re' sisi na'ue guinicaj sa' ni é re' niman nico rian xi'í jnánj ni é re' nej aj. —Daj gataj Jesús.

Jesús enseña sobre el divorcio

19 Ni ngaa guisíj ga'mi Jesús ni nuguán' nan, ni gahui sij estado Galilea. Ni guisíj sij anéj chrej du'ua xinéj nnee gu'naj Jordán rian ngaj estado Judea. ² Ni nico' nico ni ngüi sij. Ni ganahuin ni ngüi a'nan' yu'uj daj, gui'yaj sij.

³ Ni ga'na' ni tsínj fariseo. Ni huin ruhua ni sí' ga'ui' ni sí' gaquin' xiráj Jesús xi'í nuguán' ga'mi sij. Xi'í daj nachínj snan'anj ni sí' Jesús. Ni gataj ni sí!:

—Ga'uej si-ley Yan'anj sisi dunó' nico' xi'í daran' ni nuguán' ni!. — Daj gataj ni tsínj fariseo rian Jesús.

⁴ Ngaa ni gataj Jesús:

—Ani ruhuáj sisi hua gaya ni é re' sisi ngaa gaxi'i daran'anj, ni gui'yaj Yan'anj tsínj sno'o ngā yun'unj xana.

⁵ Ni gataj Yan'anj: "Xi'í daj dunaj 'ngo tsínj daj chrej sij ngā nni sij. Ni gane nuguán'an sij ngā nica sij aj. Ni nungüej nica tsínj daj gahuin urin ngüi aj." Daj gataj Yan'anj. ⁶ Ngaa ni sé huij nnee cíj huin nungüej sij ga mánj. Sani urin nnee cíj huin nungüej sij nánj. Ni ngaa xacaj dugüi' 'ngo tsínj daj ngā 'ngo yun'unj daj, gui'yaj Yan'anj, ngaa ni si ga'ue gahuin nini nungüej sij, gui'yaj ni ngüi mánj. —Daj gataj Jesús gunun ni sij.

⁷ Ngaa ni gataj ni tsínj fariseo:

—Ni un sin huin ni ga'nin' Moisés sun sisi gui'yaj né' yanj ata ga'ui' né' ra'a nica né'. Ngaa ni dunaj né' nica né', gui'yaj sí' únj. —Daj gataj ni sij.

⁸Ngaa ni gataj Jesús:

—Xi'í si tsí niman ni é re!, ni riqui Moisés permiso sisi dūnaj ni é re' nica ni é re'. Saní sé daj gahuin asij sini ngaa gui'yaj Yan'anj ni ngüi mánj. ⁹Hué dan ni atā gunun ni é re' sisi tsínj guere'ej nica daj, ni gānacaj sij ango ngüi, ni da'ui sij gaquin' anj. Saní sé daj huin sisi guil'yaj squira' nica sij ango tsínj mánj. Ni tsínj nāc妖 yun'unj xāna guere'ej daj, ni da'ui sij gaquin' nej aj. —Daj gataj Jesús gunun ni tsínj fariseo.

¹⁰Ngaa ni gataj ni tsínj nico' Jesús:

—Sisi da'nga' daj huin ngā tsínj hua nica, ngaa ni sa' huin sisi si xacaj né' yun'unj xāna mánj. —Daj gataj ni sij.

¹¹Ngaa ni gataj Jesús:

—Sé daran' ni tsínj ga'ue gara da'nga' ruhua ngā nuguan' nan. Saní sisi riqui Yan'anj, ni ga'ue gara da'nga' ruhua ni sij. ¹²Hua 'ngo tsínj na'ue ga'mi ngā yun'unj xāna. Ni da'nga' daj hua ni sij asij ga'nga ni sij. Ni hua ango tsínj na'ue ga'mi ngā yun'unj xāna. Daj si da'nga' daj hua nnee cūj sij, gui'yaj ango ni tsínj. Ni hua ángo tsínj na'uej ruhua ga'mi ngā yun'unj xāna. Daj si huin ruhua sij gui'yaj sun sij rian nicaj sun Yan'anj anj. Ngaa ni sisi ga'ue gara xina ni é re' ngā nuguan' nan, ni da'nga' daj gui'yaj ni é re'. —Daj gataj Jesús.

Jesús bendice a los niños

¹³Ngaa ni nicaj ni yun'unj xāna ni tsin' le ga'na' ne rian Jesús sisi guta' sí' ra'a sí'. Ni gachinj jni'yaj sí' xi'í ni tsin'-ín', ruhua ne. Saní chran'

ni tsínj nico' Jesús ni yun'unj xāna nicaj ga'na' daj aj. ¹⁴Sani gataj Jesús:

—Ra'a ni é re' si ga'na' ni tsin' riānj. Ni si chran' ni é re' si ga'na' riānj nej mánj. Daj si rún' huin ni tsin' le nan, ni da'nga' daj huin ni ngüi mān rian nicaj sun Yan'anj nne xata!. —Daj gataj Jesús.

¹⁵Ngaa ni guta' Jesús ra'a sij rian ni tsin'. Ni gahui sij gan'anj sij.

El joven rico

¹⁶Hué dan ni ga'na' 'ngo tsínj daj. Ni gataj sij gunun Jesús:

—Maestro sa', un sun sa' guil'yaj sūnj, ni ga'ue gane nigān, ruhuá re' únj. —Daj gataj sij aj.

¹⁷Ngaa ni gataj Jesús:

—Ni un sin huin ni atáj re' sisi sa' man'ānj únj. Urin Yan'anj huin si sa' nánj. Saní sisi huin ruhuá re' gane niganj re' nga Yan'anj, ngaa ni dagahuín re' nuguan' ga'nin' Yan'anj sun rian né!. —Daj gataj Jesús gunun sij.

¹⁸Ngaa ni:

—Ni un nuguan' dagahuin únj, ruhuá re' únj. —Gataj tsínj daj gunun Jesús.

Ngaa ni gataj Jesús:

—Si dagahuí' re' níman mánj. Ni si gui'yaj tu re' mánj. Ni si ga'mi re' nuguan' nnē xi'í dugüí' re' mánj. ¹⁹Ni guinun yan'ānj re' chréj re' nga nní re' nej. Ni gahuin 'i ruhuá re' ni'yaj re' dugüí' re' daj rún' i ruhuá re' ni'yaj re' man'ān re' aj. —Daj gataj Jesús.

²⁰Ngaa ni gataj tsínj daj gunun Jesús:

—Daran' ni nuguan' daj ráj xināj asij hua lē aj. Ngaa ni un sin achin

gui'yā, ruhuá re' únj. —Daj gataj sij gunun Jesús.

21 Ngaa ni gataj Jesús gunun sij:

—Sisi huin ruhuá re' gahuin sa' nin' re', ngaa ni güij nañ' re' gudu'ue re' daran' si'yáj re'. Ni san'anj guiri' re' daj ga'ui' re' rian ni ngüi niqui. Hué dan ni guiman nico si'yáj re' xata!, gui'yaj Yan'anj anj. Ngaa ni ga'na' re' guinico' re' yünj anj. —Daj gataj Jesús.

22 Ni ngaa gunun tsínj daj si gataj Jesús, ni gan'anj sij nani ruhua sij. Daj si hua nico si'yaj sij.

23 Ngaa ni gataj Jesús gunun ni tsínj nico' sij:

—Xanga' atā gunun a ni é re' sisi 'i huaj gatu 'ngo tsínj xuru'ue rian nicaj sun Yan'anj xata! aj. **24** Ni gataj ruhua' yünj sisi 'i huaj gatu 'ngo tsínj xuru'ue rian nicaj sun Yan'anj daj ngä si gachin 'ngo xucu camello yu'uj taj cíj nuhua aj. Ni xxi hua xú' aj. —Daj gataj Jesús gunun ni sij.

25 Ngaa ni ngaa gunun ni tsínj nico' Jesús nuguan' daj, ni nin' ruhua gan'anj ruhua ni sij. Ni gataj ni sij:

—Sisi hué daj huin, ni un tsínj ga'ue nacaj Yan'anj únj. —Daj gataj ni sij.

26 Ngaa ni ni'yaj Jesús rian ni sij. Ni gataj sij:

—Si ga'ue nacaj ni ngüi man'an ni sij mánj. Sani Yan'anj ga'ue gui'yaj daran' nuguan!. —Daj gataj Jesús.

27 Ngaa ni gataj Pedro:

—Hua duna únj daran' si'yaj únj anj. Ni nico' únj man'an re' aj. Ngaa ni un sin huin náriqui Yan'anj rian únj, ruhuá re' únj. —Daj gataj Pedro.

28 Ni gataj Jesús gunun ni sij:

—Xanga' atā gunun ni é re' sisi ngaa guisij güi gane 'uej rian chrun xila sa' ango xungüi naca, ni gane xanga' ni é re' rian ni xuhuij chrun xila sa' guinicaj ni é re' sun rian ni xuhuij xi'nin' ni tsínj israelita. Ni hué daj gahuin xi'í si guinico' ni é re' man'anj huinj da'nij ni ngüi. **29** Ni danej gahuin a ni é re' dunáj á re' ducuá á re' nga jnánj án re' nej, xoco' a ni é re' nej, nga chrej a ni é re' nej, nni a ni é re' nej, nga da'nij ni é re' nej, do'ój re' nej, ni sisi dunaj á re' daran' nan rian xi'ij, ngaa ni náhuin ra'a ni é re' 'ngo ciento ni rasun sa' nan. Ni gane niganj án re' nga Yan'anj, gui'yaj Yan'anj nej aj. **30** Sani nico ni ngüi huin achij chruhua xungüi nan náñico' ni sij ne' rucu ango xungüi ga'na' aj. Ni nico ni ngüi nico' ne' rucu chruhua xungüi nan gahuin achij ni sij ango xungüi ga'na' aj.

Los obreros de la viña

20 'Ni daj rún' 'yaj 'ngo xuru'ue ngaa ahui sij nigan' acuan' nana'ui' sij ni tsínj gan'anj gui'yaj sun do'ój sij rian mán coj chruj uva, ni da'nga' daj 'yaj Yan'anj ngä né' rian nicaj sun Yan'anj. **2** Ni gui'yaj yya xuru'ue daj ngä ni tsínj gui'yaj sun undaj huin ga'ui' sí' du'ue ni sij 'ngo güi daj. Ni ga'mi sí' sisi ga'ui' sí' 'ngo san'anj denario rian ni sij. Ngaa ni ga'nij sí' gan'anj gui'yaj sun ni sij riqui coj uva.

3 'Hué dan ni gahui yún xuru'ue daj gan'anj sij ga un nigan'. Ni guini'i sij mán angó ni tsínj mán rian yu'ue. Ni niquin' yun ni sij. **4** Ni gataj sij: "Güij gui'yaj sun ni é re' si-

súnj anj. Ni daj rún' gui'yaj sun ni é re', ni ríquij du'ue ni é re' aj." Daj gataj sij. Ni gan'anj gui'yaj sun ni sí'.

⁵'Ngaa ni gahui ruhua' yún sij gan'anj sij ga xuj nej, ga huá'nij di'ní nej. Ni daj rún' gui'yaj sij ga un, ni da'nga' daj gui'yaj ruhua' yún sij.

⁶'Ni gan'anj ruhua' yún sij rian yu'ué síj 'ngo si ga un'un' di'ní. Ni ganari' sij ango ni tsínj mán man'an. Ni ganachínj snan'anj sij ni sí'. Ni gataj sij: "Ni un sin huin ni mán ni é re' nun güi nin' yu'uj nan, ni nitaj sun 'yaj sun ni é re' mán án re' yu'uj nan únj." Gataj sij. ⁷'Ngaa ni: "Nitaj 'ngo tsínj ataj sisi gan'anj gui'yaj sun ni únj mánj." Gataj ni tsínj mán rian yu'ué daj rian sij.

Ngaa ni gataj xuru'ue daj: "Güij gui'yaj sun ni é re' ríqui coj uva. Ni ríquij du'ue ni é re' daj rún' gui'yaj sun a ni é re' aj." Daj gataj sij.

⁸'Ni ngaa guini, ni gataj sij gunun tsínj nicaj yun'unj ni moso daj: "Gaquinj re' ga'na' ni tsínj 'yaj sun nánj. Ni naga'ui' re' du'ue ni sij aj. Gaxi'i re' naru'ue re' rian ni tsínj nico' da rucu gui'yaj sun aj. Ngaa ni naru'ue re' rian ni tsínj gatúj asij sini yan." Gataj xuru'ue daj.

⁹'Ngaa ni guisíj ni tsínj gatúj da ga un'un' di'ní daj. Ni da go'ngo ni sij ganahuin ra'a chre' gué ni sij 'ngo san'anj denario da aj. ¹⁰Ni ngaa guisíj ni tsínj gui'yaj sun sini, ngaa ni gani ruhua ni sij sisí xacan doj ga'ui' xuru'ue daj du'ue ni sij daj nga si ga'ui' sí' rian ni tsínj gatúj gui'yaj sun ga un'un'. Sani 'ngo hua nahuin ra'a daran' ni sij. ¹¹Ni ngaa nahuin ra'a ni sij, ni gaxi'i ni sij ga'mi gaquin' ni sij xi'lí xuru'ue. ¹²Ni gataj ni sij: "Ni tsínj gatúj da rucu daj,

ni gui'yaj sun ni sij urin hora. Sani uyan naru'ué re' rian ni sij nga únj nánj. Ni gui'yaj sun ni únj nun güi nin' anj. Ni nun güi ni yan'an nej aj." Gataj ni sij. ¹³Sani gataj tsínj do'ój rian 'ngo ni sij: "Amigo, sé si digya' yun'ün go'ngo ni é re' mánj. Sani hua gui'yaj yyá re' ngaj sisí naru'ué 'ngo san'anj denario rian re' aj. ¹⁴Ganacaj re' du'ué re', ni güij re' nánj. Daj rún' naru'ué rian re', ni da'nga' daj huin ruhuáj naru'ué rian tsínj nico' da rucu nej. ¹⁵Sani ga'ue gui'yá daj rún' garan' ruhuáj nga si-san'án nánj. Xicoj ruhuá re' si gui'yá doj sinduj nga dugüí' re' ní'." Daj gataj xuru'ue daj gunun tsínj gui'yaj sun.

¹⁶'Ngaa ni ni ngüi nico' da rucu xungüí nan, ni gahuin rian ni sij ango xungüí naca. Ni ni ngüi huin rian xungüí nan, sani guna da rucu ni sij ango xungüí daj. Daj si aquínj Yan'anj nico ni ngüi gan'anj rianj anj. Sani doj ni sij huin si nacui Yan'anj nánj. —Daj gataj Jesús gunun ni tsínj nico' sij.

Nuevamente Jesús anuncia su muerte

¹⁷Ni ngaa huaj Jesús gahui sij dacan rian ngaj xuman' Jerusalén, ni gaquínj sij ni tsínj nico' sij ga'na' nini ni sí' rian sij. Ni gataj sij:

¹⁸—Ni'i ni é re' sisi huaj né' guisíj né' xuman' Jerusalén. Ni hué yu'uj daj naga'ui' 'ngo tsínj daj man'ānj rian ni chrej a'nin' nga rian ni maestro digyán ley rian ni ngüí. Ni huinj da'níj ni ngüi. Ni daga'mi dugüí' ni sij sisi dagahui' ni sij man'ānj. ¹⁹Ngaa ni naga'ui' ni sij yünj rian ni tsínj 'na' anéj chrej sisi

ga'mi ducu ni sí' xi'ij. Ni₁ duguayun ni sí' nne' xirā aj. Ni₁ gari ni sí' gaquíj man'ānj rian rugutsi nej aj. San₁ xiráj hua'nij güi, ni₁ gana'nī nánj. —Daj gataj Jesús.

Petición de Santiago y de Juan

²⁰Ngaa ni₁ gahuin ni₁chrun' huij da'nij niçä tsínj gu₁naj Zebedeo rian Jesús. Ni₁ ganiquin' ráj dacoj ún' rian Jesús. Ni₁ gachínj ún' ngo sinduj rian sij.

²¹Ngaa ni₁ gataj Jesús:

—Ni₁ un sin huin ruhuá re' únj. —Gataj Jesús.

Ni₁ gataj unj gunun sij:

—Ga₁nin' re' sun sisi ngaa gane sún re' gu₁nicaj sún re', ni₁ gane n₁ngüej da'ní xi'níj re', 'ngo sij ne' chrej ra'a sa₁ re', ni₁ ango sij ne' chrej ra'a rotsi re', ruhuaj aj. —Gataj unj.

²²Ngaa ni₁ gataj Jesús:

—Nun ni₁'i n₁ngüej é re' si achínj n₁ngüej é re' mánj. Ga₁ue gunucuaj n₁ngüej é re' gu₁ran' n₁ngüej é re' sayun daj rún' gu₁ran' man'ānj ní'. —Daj gataj Jesús.

—Ga₁ue aj. —Daj gataj n₁ngüej sij.

²³Ngaa ni₁ gataj Jesús:

—Xangal gu₁ran' n₁ngüej é re' sayun ngāj aj. San₁ na'ue riqui man'ānj sisi gane n₁ngüej é re' 'ngo ni é re' ra'a sa₁āj, ni₁ ango ni é re' ra'a rotsi mánj. Hua nacui chre n₁ngüej tsínj gane n₁ngüej chrej xi'ní anj. —Daj gataj Jesús.

²⁴Ni₁ ngaa gunun ango ichi' ni tsínj nico' Jesús, ni₁ ga'man ruhua ni sí' ni₁'yaj ni sí' n₁ngüej tsínj daj. ²⁵San₁ gaquínj Jesús ga₁na' ni sij, ni₁ gataj sij:

—Ni₁'i ni é re' daj 'yaj ni tsínj niçä sun scanij ni tsínj 'na' anéj chrej.

Ni₁ aran' ruhua ni sij gu₁nicaj sun nico ni sij gahuin achij ni sij rian ni ngüi aj. ²⁶San₁ sé daj gu₁yaj ni é re' mánj. Tsínj ruhua gahuin achij scanij ni é re', ngaa ni₁ gahuin sij si-moso ni é re' aj. ²⁷Ni₁ tsínj ruhua gahuin rian scanij ni é re', ngaa ni₁ gahuin sij tsínj 'yaj sun rian ni é re' aj. ²⁸Daj si sé si 'nāj ni₁ gu₁yaj sun ni ngüi riānj, ruhuāj mánj. Ni₁ huinj da'nij ni ngüi. San₁ 'nāj gu₁yaj sūnj rian ni ngüi aj. Ni₁ 'nāj gahuíj naru'uē rian si-gaquin' nico ni ngüi aj. —Daj gataj Jesús gunun ni sij.

Dos ciegos reciben la vista

²⁹Ni₁ ngaa gahui ni sij xuman' Jericó, ni₁ gachéj ni₁n' ruhua ni ngüi rucu Jesús. ³⁰Ni₁ nne huij tsínj duri du'ua chrej. Ni₁ ngaa gunun n₁ngüej sij sisi huaj Jesús yu'uj daj, ni₁ gaguáj n₁ngüej sij. Ni₁ gataj n₁ngüej sij:

—Señor, nahuin 'i ruhuá re' ni₁'yaj re' n₁ngüej únj huín re' da'níj David aán. —Daj gaguáj n₁ngüej sij.

³¹Ngaa ni₁ chran' ni ngüi sisi dínj gane du'ua n₁ngüej sij.

San₁ doj a¹ ganari' nucuaj n₁ngüej sij gaguáj n₁ngüej sij. Ni₁ gataj n₁ngüej sij:

—Señor, nahuin 'i ruhuá re' ni₁'yaj re' n₁ngüej únj huín re' da'níj David aán. —Daj gataj n₁ngüej sij.

³²Ngaa ni₁ ganiquin' Jesús. Ni₁ gaquínj sij ga₁na' n₁ngüej sij rian sij. Ni₁ gataj sij:

—Ni₁ un sin huin ruhua n₁ngüej é re' gu₁yā ngā n₁ngüej é re' únj. —Daj gataj Jesús.

³³Ngaa ni₁ gataj n₁ngüej sij:

—Señor, huin ruhua únj sisi ganaxiguin rian n₁ngüej únj,

gui'yáj re', ruhua únj anj. —Daj gataj nungüej sij.

³⁴Ngaa ni ganani yaco ruhua Jesús ni'yaj sí' nungüej sij. Ni ganun ra'a sí' rian nungüej sij. Ni 'ngo hora naxiguín rian nungüej tsínj duri daj. Ni guinico' nungüej sij Jesús.

La entrada triunfal en Jerusalén

21 Ngaa ni guisíj ni sij xuman' Betfagé rian niquin' 'ngo dacan gu'naj Olivos. Ni ngaj niçhrun' xuman' Jerusalén nga xuman' Betfagé. Ngaa ni ga'níj Jesús huij tsínj nico' sij. ²Ni gataj sij:

—Gan'anj nungüej é re' xuman' ngaj ne' rian doj aj. Ni ngaa huaj nungüej é re', ni nari' rá'yanj nungüej é re' 'ngo urruj anumi nga da'níj xú!. Ni ganachi nungüej é re' niçaj re' ga'ná' re' riánj. ³Ni sisí hua 'ngo ngüi ganachinj snan'anj rian nungüej é re', ngaa ni gataj nungüej é re' gunun ni sij: "Man'an Señor ní'yanj xuj aj. Ni hora ni ga'na' niçaj yún xuj, guí'yaj sí' aj." Daj gataj nungüej é re' gunun ni ngüi aj.

—Daj gataj Jesús gunun nungüej sij.

⁴Ni da'nga! daj gahuin sisí gahuin yya daj rún' gataj 'ngo tsínj ga'mi si-nuguan' Yan'anj asij ná. Ni gataj sí!:

⁵Gataj ni é re' gunun ni ngüi mān xuman' Sión sisí hué si-rey ni sij 'na' rian mān ni sij. Ni daj rún' huin xucu ni, ni da'nga! daj huin sij.

Ni taj sij 'ngo urruj da'níj xucu 'yaj sun.

Daj gataj tsínj ga'mi si-nuguan' Yan'anj.

⁶Ngaa ni gan'anj nungüej tsínj nico' Jesús. Ni gui'yaj nungüej sij daj rún' ga'nin' Jesús sun rian nungüej sij. ⁷Ngaa ni nicaj nungüej sij nungüej da'nij urruj daj ga'na' nungüej sij rian Jesús. Ngaa ni guta' nungüej sij si-gan' nungüej sij xiráj nungüej xú!. Ngaa ni guitáj Jesús xú' aj. ⁸Ngaa ni guruj nico ni ngüi sigan' ni sij chruhua chrej. Ni ga'nin' ango ni sij coj ra'a chrun guruj ni sij chruhua chrej. ⁹Ni ngüi huaj ne' rian nej, nga ni ngüi nico' ne' rucu Jesús aguáj ni sij. Ni gataj ni sij:

—Hosanna, da'níj David huín re'. Hua niq' 'ueé ruhua tsínj 'na' nga si-xugüi man'an Señor. Ga sa' 'ueé xata' aj. —Gataj ni sij gaguáj ni sij.

¹⁰Ni ngaa gatúj Jesús chruhua xuman' Jerusalén, ni nun nari' ruhua ni ngüi un sin gahuin mánj. Ni gataj ni sij:

—Ni un tsínj huin nan únj. —Daj gataj ni ngüi mān xuman' Jerusalén.

¹¹Ngaa ni gataj ango ni ngüi:

—Tsínj nan huin Jesús tsínj a'mi si-nuguan' Yan'anj. Ni 'na' sij xuman' Nazaret estado Galilea. — Daj gataj ni sij.

Purificación del templo

¹²Ngaa ni gatúj Jesús chruhua si-nuhui Yan'anj. Ni guiri sij ni tsínj mān du'uej rasun nga ni tsínj ránj rasun nej. Ni guru nitu sij ni mesa si'yaj ni tsínj naduna san'anj. Ni guru nitu Jesús ni chrun ruguechra' si'yaj ni tsínj du'uej xu'mān anj. ¹³Ni gataj Jesús gunun ni sij:

—Gataj si-nuguan' Yan'anj: "Ducuá Yan'anj huin rian gachinj jni'yaj ni ngüi rian Yan'anj. Sanj' nuhui nan gahuin 'ngo huej mān ni tsínj

tu, 'yaj á re' nánj." Gataj si-nuguan' Yan'anj. —Daj gataj Jesús.

¹⁴Ngaa ni gatúj ni ngüi duri nga ni ngüi nare' dacój chruhua nuhui rian niquin' Jesús. Ni ganahuin ni sij, gui'yaj sí!.

¹⁵Sani ga'man ruhua ni chrej huin achij ngá ni tsínj digyán si-ley Moisés ngaa guini'i ni sij si sa' gui'yaj Jesús. Ni hué daj ga'man ruhua ni sij ngaa guini'i ni sij sisi ga'mi sa' ni tsin' xi'í Jesús. Daj si gataj ni tsin' daj: "Hosanna rian tsínj nan si huin sí' da'níj rey David".

Daj gataj anin'inj gaguáj anin'inj.

¹⁶Ngaa ni gataj ni sij gunun Jesús:
—Unun man'án re' si ataj ni tsin' nan ní!. —Daj gataj ni sij.

Ni gataj Jesús:

—Unúnj anj. Sani nun gaya ni é re' si-nuguan' Yan'anj xi'í si ataj nuguan' nan gunun ni é re' mfi'. Daj si gataj si-nuguan' Yan'anj: "Guí'yaj Yan'anj sisi ga'mi sa' ni lij ngá ni tsin' utsi nuguan' garan' ruhua man'an Yan'anj gunun". Daj gataj si-nuguan' Yan'anj. —Daj gataj Jesús gunun ni sij.

¹⁷Ngaa ni dunáj Jesús ni sij. Ni gahui sij xuman' daj. Ni gan'anj sij xuman' Betania. Ni gunáj sij yu'u' daj.

Maldición de la higuera estéril

¹⁸Ni hua nigan' ango güi, ni huaj Jesús nanicaj sij xuman' Jerusalén. Ni achin xi'nä riqui sij. ¹⁹Ni guini'i sij niquin' 'ngo chrun gu'naj higuera du'ua chrej. Ni gan'anj nichí sij rian niquin'-ín!. Sani nun nari' sij higo mánj. Maan coj ra'a-á' guini'i sij nánj. Ngaa ni gataj sij rian chrun daj:

—Niganj si gayu chruj chra re' ga mánj. —Daj gataj Jesús.

Ni 'ngo hora ganaco chrun daj.

²⁰Ni ngaa guini'i ni tsínj nico' Jesús si guiran' chrun daj, ni gataj ni sij:

—Ni un sin ni 'ngo hora ganacoj únj. —Daj gataj ni sij gan'anj ruhua ni sij.

²¹Ngaa ni gataj Jesús:

—Xanga' atā gunun ni é re' sisi guxuman ruhua ni é re', ni si gani huij ruhua ni é re' guini'yaj ni é re' Yan'anj, ngaa ni ga'ue guí'yaj ni é re' si guí'yá ngá chrun higuera nan anj. Ni sé urin nan ga'ue guí'yaj ni é re', sani ga'ue gataj ni é re' gunun quij nan: "Guxun re' man'án re' yu'u' nan gan'anj re' ganatu re' chruhua nnee yan'anj anj." Ngaa ni hué daj gahuin. ²²Hué dan ni sisi gachinj jni'yaj ni é re' 'ngo nuguan' rian Yan'anj ngaa guxuman yya ruhua ni é re', ngaa ni nahuin ra'a ni é re' nuguan' da aj. —Daj gataj Jesús gunun ni sij.

La autoridad de Jesús

²³Ni ngaa gatúj Jesús chruhua nuhui digyán sij rian ni ngüi, ni gahui nichrun' ni chrej a'nin' nga ni tsínj huin achij nej. Ni nachínj snan'anj ni sij Jesús. Ni gataj ni sij:

—Ni un sin huin sun ni 'yáj re' nan únj. Ni un tsínj riqui sun, ni 'yáj re' nan únj. —Daj gataj ni sij gunun Jesús.

²⁴Ngaa ni gataj Jesús:

—Ruhuáj ganachin' snan'anj 'ngo nuguan' da man'an án re' aj. Ni sisi danicaj ni é re' nuguan' riānj, asíj ni gataj un sun guí'yá nan gunun ni é re'. ²⁵Ni un tsínj ga'nin' sun rian tsínj gu'naj Juan sisi gataj nnee sí'

ni ngüi únj. Yan'anj gataj rian sij ní!. Así hua ango tsínj gataj rian sij sa!. —Gataj Jesús.

Ngaa ni diguój man'an ni sij nga dugüi' ni sij. Ni gataj ni sij:

—Sisi gato' sisi Yan'anj ga'nin' sun rian Juan, ngaa ni gataj Jesús gunun ni únj sisi un sin huin nun guxuman ruhua ni únj ni'yaj ni únj man'an sij únj.²⁶ Ni sisi gataj únj sisi ni tsímj ga'níj ga'na' Juan, sani xu'ui' ni'yaj únj rian ni ngüi aj. Daj si gani ruhua daran' ni ngüi sisi Juan gahuin 'ngo tsínj ga'mi si-nuguhan' Yan'anj anj. —Daj gataj ni sij gunun ni dugüi' ni sij.

²⁷ Ngaa ni gataj ni sij gunun Jesús: —Nun ni'i únj mánj. —Daj gataj ni sij gunun Jesús.

Ngaa ni gataj Jesús:

—Hué dan ni si gatā gunun ni é re' un sin huin sun 'yā aj. —Daj gataj Jesús.

Parábola de los dos hijos

²⁸ Ngaa ni nachínj snan'anj Jesús ni tsínj daj. Ni gataj sij:

—Daj ani ruhua ni é re' nga nuguhan' nan únj. Hua huij da'níj 'ngo tsínj daj. Ni gataj sij rian 'ngo da'níj sij: "Da'níj, yyaj ni güij gui'yaj sún re' riqui coj uva aj." Gataj tsínj daj gunun da'níj sij.

²⁹ Ngaa ni: "Si gan'ān mánj." Gataj sí' rian chrej sí'. Sani sa' sij, ni xacaj sij ango ducuánj, ni gan'anj gui'yaj sun sij. ³⁰ Hué dan ni gan'anj chrej sij rian nne ango da'níj sij. Ni da'nga' daj gataj sij gunun sí'. Ni: "Ga'ue gan'ān Señor." Gataj sí' rian chrej sí'. Sani nun gan'anj gui'yaj sun sí'. ³¹ Ni un tsínj yya gui'yaj si garan' ruhua chrej sij, ruhua á re' únj. —Daj gataj Jesús.

Ngaa ni gataj ni sij:

—Tsínj rian gataj sini yan daj. Hué sij huin nánj. —Daj gataj ni sij.

Ngaa ni gataj Jesús:

—Xanga' atā gunun ni é re' sisi gatu sini yan ni tsínj a'nej xacan pesto nga ni ngüi xana achéj man'an rian nicaj sun Yan'anj dan nga si gatu ni é re' aj.³² Daj si ga'na' Juan digyán sí' daj ga'ue guiman ni é re' gui'yaj nica ni é re'. Sani nun guxuman ruhua ni é re' mánj. Sani guxuman ruhua ni tsínj a'nej xacan pesto nga ni ngüi xana achéj man'an. Ni nun si guini'i ni é re' daran' nan, sani nun nānicaj ruhua ni é re' xi'i si-gaquin' ni é re' mánj. Ni nun guxuman ruhua ni é re' guini'yaj ni é re' Juan nej mánj.

Los labradores malvados

³³ Hué dan ni gunun ni é re' ango cuento nanij. Ganarij 'ngo xuru'ue daj nico coj uva unun sij aj. Ni gui'yaj sij 'ngo xingá ganicaj rian gunun sij. Ni góñj sij yu'uj rian góñj sij chruj uva, gui'yaj sij vino. Ni gui'yaj sij 'ngo hue' xacan xxi sisi dugumi ni sij daran' ni coj daj. Ni naga'ui' sij si-coj sij coj chruj uva daj rian go'ngo ni tsínj sisi dugumi ni sí' si'yaj sij. Ngaa ni gan'anj gan' sij ango xuman!. ³⁴ Ni ngaa guisij güi gane uva, ngaa ni ga'níj sij si-moso sij gan'anj gachinj ni sij rian ni tsínj mán 'yaj sun daj chruj si huin si'yaj sij. ³⁵ Sani guida'a ni tsínj mán 'yaj sun daj ni si-moso sij. Ni ga'ui' ni sí' chrun xiraj 'ngo moso daj. Ni dagahui' ni sí' ango moso. Ni ga'ui' ni sí' yej ango moso daj. ³⁶ Ngaa ni ga'níj ruhua' yún tsínj do'oj daj ango ni si-moso sij. Ni hua ga'lí ni sí' daj

nga ni tsínj gan'anj sini. Ni daj rún' gui'yaj ni tsínj dugumi daj, ni da'ng'a' daj gui'yaj ni sij nga ni sí!. ³⁷Hué dan ni ne' rucu ni ga'níj sij man'an da'níj sij gan'anj. Ni gataj sij: "Gá ní'yanj ni sí' nga man'an da'ní anj." Gataj ni sij. ³⁸Sani ngaa guini'i ni sí' da'níj sij, ni gataj ni sí' gunun ni dugüi' sí!: "Tsínj nan gunánj do'oj chrej sij si sa' gahui' chrej sí' aj. Dagahui' né' tsínj nan, ngaa ni gunan né' gahuin do'oj né' nánj." Daj gataj ni sij. ³⁹Ngaa ni guida'a ni sij tsínj daj. Ni guere'ej ni sij sí' chrej xe' du'ua rian man coj uva daj. Ni dagahui' ni sij sí!. ⁴⁰Hué dan ni ngaa ga'na' tsínj do'oj, ni un sin huin gui'yaj sij nga ni tsínj dugumi daj, ruhua á re' únj. —Daj gataj Jesús gunun ni chrej a'nin' nga ni tsínj huin achij.

⁴¹Ngaa ni gataj ni sij:

—Dagahui' sij ni tsínj xi'i daj. Ni si ganahuin yaco ruhua sij ni'yaj sij ni sí' ga mánj. Ngaa ni naga'ui' sij coj chruj uva daj huin si-coj sij rian ango ni tsínj sisí dugumi ni sí!. Ni ngaa gane chruj daj, ni naga'ui' ni sí' rian tsínj do'oj daj. —Daj gataj ni sij gunun Jesús.

⁴²Ngaa ni gataj Jesús:

—Ni un sin huin ni nun gaya ni é re' si gataj si-nuguan' Yan'anj únj. Ni gataj si-nuguan' Yan'anj:

Yej guere'ej ni tsínj 'yaj sun hue!, ni gahuin-ín' 'ngo yej sa' doj gane ran-án' dugu'nun' squina hue' niganj ni aj.

Hué man'an Señor gui'yaj nuguan' nan.

Ni dugu'naj nin' ruhua hua nuguan' nan ruhua né' aj.

Daj gataj si-nuguan' Yan'anj. ⁴³Hué dan ni gatā gunun ni é re' sisí ga'ne

Yan'anj rian gane ni é re' rian nicaj sun Yan'anj. Ni ga'ui' Yan'anj rian ango ni ngüi. Daj si gui'yaj ni sij si huin ruhua Yan'anj. ⁴⁴Ni huéj huin yej daj. Ni sisí ganatu 'ngo ngüi rian yej daj, ni garan' ni sij, gui'yā. Ni sisí guinij yej daj rian 'ngo ni ngüi, ni guixitin' ni sij, gui'yā nej aj. —Daj gataj Jesús gunun ni sij.

⁴⁵Ni ngaa gunun ni chrej a'nin' nga ni tsínj fariseo cuento ganani Jesús, ni xacaj ni sij cuenta sisí a'mi sí' xi'i man'an ni sij. ⁴⁶Ni huin ruhua ni sij guida'a ni sij sí!. Sani xu'ui' ni sij ni'yaj ni sij rian ni ngüi. Daj si ani ruhua ni ngüi sisí tsínj a'mi si-nuguan' Yan'anj huin Jesús, ruhua ni sij aj.

Parábola de la fiesta de bodas

22 Ngaa ni ga'mi ruhua' yún Jesús nani sij cuento. Ni gataj sij:

²—Daj rún' gui'yaj 'ngo rey ngaa gui'yaj sij gui'yanj xi'i si xacaj da'níj sij yun'unj xana, ni da'ng'a' daj huin rian nicaj sun Yan'anj. ³Ni ga'níj rey daj si-moso sij gan'anj gaquinj ni ngüi sisí ga'na' ni sij xá ni sij rian gahuin gui'yanj ducuá sij. Sani nun ga'uej ruhua ni sij ga'na' ni sij. ⁴Ngaa ni ga'níj ruhua' yún sij ango ni moso daj gan'anj ni sí!. Ni gataj sij gunun ni sí!: "Gataj ni é re' rian ni ngüi ga'na' daj sisí hua chrún nia' yā. Ni hua dagahui' ni sij ni dānj sicuj nga ni xucu namij nej aj. Ni hua chrún daran'anj. Ngaa ni ga'na' á re' xá á re' nga da'ní. Daj si xacaj sij yun'unj xana." Gataj rey daj gunun ni sij.

⁵'Sani nun xacaj ni ngüi daj cuenta nga nuguan' gataj ni sij

mánj. Gan'anj gui'yaj sun 'ngo tsínj daj do'ój sij. Ni₁ gan'anj angó sij, gan'anj gudu'ue sij rasun rian ni ngüi. ⁶Ni₁ guida'a angó ni sij ni simoso rey daj. Ni₁ gui'yaj xi'i ni sij nga ni sí!. Ni₁ dagahui' ni sij ni sí! nej.

⁷Ngaa ni₁ ngaa gunun rey daj, ni₁ nin' ruhua ga'man ruhua sij. Ni₁ ga'níj sij si-snado sij gan'anj dagahui' ni tsínj dagahui' ni si-moso sij daj. Ni₁ gari yan'ān ni sí! xánj ni tsínj daj. Ni₁ gaca xuman' daj.

⁸Ngaa ni₁ gataj rey daj gunun simoso sij: "Daran'anj hua chrun sisí ga'na' ni ngüi xá ni sij rian gahuin gui'yanj xacaj da'ní yun'unj xána. Saní nitaj si ní'yanj ni ngüi gaquín ga'na' da mánj. ⁹Ngaa ni₁ gan'anj ni é re₁ rian nacaj dugüi' ni chrej. Ni₁ gaquinj ni é re₁ un ngüi gahuin ga'na' ni sij gui'yanj ruhuāj aj." Gataj rey daj.

¹⁰Ngaa ni₁ gahu ni moso daj gan'anj ni sij chruhua ni chrej. Ni₁ gui'yaj ni sij sisí nahuin chre' daran' ni ngüi ganacaj dugüi' nga ni sij. Ni₁ ga'na' ni ngüi sa' nga ni ngüi nitaj si hua sa' gui'yanj daj. Ni₁ gara chruhua hue' rian gahuin gui'yanj xacaj da'níj rey daj yun'unj xána, gui'yaj ni ngüi.

¹¹Ni₁ ngaa gatúj rey rian mān ni ngüi huaj gui'yanj daj, ni₁ guini'i sij 'ngo tsínj nitaj nun sij 'ngo atsij nun ni tsínj rara'a. ¹²Ngaa ni₁ gataj sij: "Amigo, un sin 'yáj re₁ nan, ni₁ nitaj 'ngo atsij nanun so' rara'a so' únj." Daj gataj rey daj. Saní nun guiri' ruhua tsínj daj si ga'mi sí!. Ni₁ dínj nne sí!. ¹³Ngaa ni₁ gataj rey gunun ni tsínj 'yaj sun rian mesa: "Numi ni é re₁ dacój sij nga ra'a sij. Ni₁ guere'ej a ni é re₁ sij rian rumi!"

hua ne₁ xe₁ rian gunun sij gaco sij nga rian xá ruj yan' sij." Daj gataj rey daj. ¹⁴Daj si nico ni ngüi aquín Yan'anj, saní doj ni sij huin si nacui Yan'anj anj. —Daj gataj Jesús.

La cuestión del tributo

¹⁵Ngaa ni₁ gan'anj diga'mi dugüi' ni tsínj fariseo daj ga'ue ga'ui' ni sij gaquin' rian xi'l Jesús xi'l 'ngo nuguan' ga'mi sí!. ¹⁶Ngaa ni₁ ga'níj ni sij ni tsínj nico' ni sij nga ni tsínj herodista nej, gan'anj ni sí! rian Jesús. Ni₁ gataj ni sí! gunun Jesús:

—Maestro, ni₁' ni únj sisí a'mi xánga' man'án re₁!. Ni₁ digyán xánga' re₁ si-chrej Yan'anj. Ni₁ nitaj si gui'yáj re₁ un sin huin ni tsínj a'mi mánj. Daj si nitaj si ni'yáj re₁ daj hua ni tsínj mánj. ¹⁷Hué dan ni un sin huin ani ruhuá re₁. Sa₁ huin sisí ga'ui' né! san'anj a'nej rey César, ruhuá re₁. Ga'ui' né! ní!. Así si ga'ui' né! ní!. —Daj gataj ni sij.

¹⁸Saní guini'i Jesús sisí ani quij ruhua ni sij. Ngaa ni₁ gataj sí! gunun ni sij:

—Ni₁ un sin huin ni ruhua ni é re₁ gui'yáj re₁ xi' ngáj únj. Tsínj digya' yun'unj huin ni é re₁. ¹⁹Digyán ni é re₁ riānj 'ngo san'anj naru'ue ni ngüi rian rey daj. —Daj gataj Jesús.

Ngaa ni₁ nicaj ni sij 'ngo san'anj denario ga'na' ni sij rian sí!

²⁰Ngaa ni₁ nachínj snan'anj Jesús ni sij. Ni₁ gataj sí!:

—Ni₁ un tsínj rjan huin san'anj nan únj. Ni₁ un tsínj si-xugüi huin nan, ni₁ hua nica nin' huaj únj. —Daj gataj Jesús.

²¹Ngaa ni:

—Hué rian César nga si-xugüi sí! huin. —Gataj ni sij.

Ngaa ni gataj Jesús:

—Ngaa ni ga'ui' ni é re' si'yaj rey César daj rian César aj. Ni ga'ui' ni é re' si'yaj Yan'anj rian Yan'anj anj.

—Daj gataj Jesús.

²²Ni ngaa gunun ni sij nuguan' ga'mi Jesús, ni garáj yan'anj ruhua ni sij. Ni dunáj ni sij sí'. Ni gan'anj ni sij.

La pregunta sobre la resurrección

²³Ni hué güi daj ni ga'na' doj ni tsínj saduceo rian Jesús. Ni ataj ni tsínj daj sisí nitaj si gana'nij ni níman mánj. Ni nachínj snan'anj ni sij Jesús. ²⁴Ni gataj ni sij:

—Maestro, gataj Moisés: “Sisi gahui' 'ngo tsínj nitaj da'níj, ngaa ni nacaj jnánj sij nica sij. Ni da'nga' daj gu'i'yaj sí' ga'ui' sí' si ga'nga 'ngo lij nagane yan du'ua chre.” Daj gataj Moisés. ²⁵Hué dan ni gane ichij jnánj 'ngo tsínj daj scanij né!. Ni xacaj tsínj xahua' nica sij. Ni gahui' sij. Ni nitaj da'níj sij nga ún!. Ni gunáj nica sij rian jnánj sij xacaj sí' xaco' sí'. ²⁶Sani gahui' tsínj nico' rucu tsínj xahua' daj. Ni xacaj ango jnánj sí' yun'unj xána daj. Ni da'nga' daj xacaj ni ichij jnánj tsínj yun'unj xána daj. ²⁷Da' guisíj daj gahui' man'an yun'unj daj nej aj. ²⁸Hué dan ni ngaa gana'nij ni níman ngaa guiman ruhua' yún ichij jnánj sij, ni daj hua yya tsínj gahuin nica yun'unj xána daj, ruhuá re' únj. Daj si daran' ni sij xacaj ún' nánj. —Daj gataj ni tsínj saduceo gunun Jesús.

²⁹Ngaa ni gataj Jesús:

—Nun nari' ni é re' si nun ni'lí ni é re' daj gataj si-nuguan' Yan'anj mánj. Ni nun ni'lí ni é re' daj nucuaj Yan'anj nej mánj. ³⁰Daj si ngaa

gana'nij ni níman, ni si xacaj ni tsínj ni yun'unj xána mánj. Ni daj ni si xacaj ni yun'unj xána tsínj sno'o mánj. Daj si daj rún' nne ni ángel xata', da'nga' daj gane ni sij aj. ³¹Ngaa ni gatá gunun a ni é re' daj guini'i a ni é re' sisí gana'nij ni níman. Achin si gaya ni é re' rian si-nuguan' Yan'anj ga' di ní!. ³²Daj si gataj Yan'anj: “Huéj huin Dan'anj tsínj gu'naj Abraham nga tsínj gu'naj Isaac nga tsínj gu'naj Jacob nej aj.” Daj gataj Yan'anj asij ná. Hué dan ni sé níman huin ni tsínj guinico' Yan'anj asij ná mánj. Hua ni'na' ni sij nánj. —Daj gataj Jesús gunun ni tsínj saduceo.

³³Ni ngaa gunun ni ngüi si gataj Jesús, ni garáj yan'anj ruhua ni sij nga nuguan' digyán sij rian ni ngüi.

El gran mandamiento

³⁴Ni ngaa gunun ni tsínj fariseo sisí dínj gahuin du'ua ni tsínj saduceo, gu'i'yaj Jesús, ngaa ni nahuin yu' ni sij. ³⁵Ni 'ngo ni sij huin 'ngo tsínj digyán ley rian ni ngüi. Ni huin ruhua sí' xacaj sí' cuenta daj nata' Jesús.

³⁶Ngaa ni nachínj snan'anj sí' Jesús. Ni gataj sí':

—Maestro, un sin huin nuguan' nico doj rian daran' nuguan' a'nin' Yan'anj sun riun' únj. —Daj gataj tsínj daj.

³⁷Ngaa ni gataj Jesús:

—“Gahuin 'i ruhuá re' ni'yaj re' Señor huin Dan'ánj re' ngá níman re' nej, nin' sta'ngá' re' nej.” ³⁸Hué nan huin nuguan' huin achij nga nuguan' sini rian daran' ni nuguan' a'nin' Yan'anj sun rian ni ngüi aj. ³⁹Ni daj rún' hua nuguan' nan, ni

hua ango nuguan' a'nin' Yan'anj sun rián re' nej. Ni nuguan' nan huin: "Gahuin 'i ruhuá re' ni'yáj re' dugüí' re' rún' 'i ruhuá re' ni'yaj re' man'án re' aj." ⁴⁰Ngaa ni daran' si-ley Yan'anj ngā daran' si ga'mi ni tsínj ga'mi si-nuguan' Yan'anj asij ná, ni 'na'q' daran' ni nuguan' daj rian nungüej nuguan' huin achij nan. —Daj gataj Jesús.

¿De quién es hijo el Cristo?

⁴¹Ngaa ni ngaa nahuin yu' ni tsínj fariseo, ni nachínj snan'anj Jesús ni sij.

⁴²Ni gataj Jesús:

—Ni un sin huin ani ruhua ni é re' xi'lí Cristo únj. Ni un sin da'nij huin sí', ruhua ni é re' únj. —Daj gataj Jesús.

Ngaa ni:

—Da'nij David huin sí!. —Gataj ni sij.

⁴³Ngaa ni gataj Jesús:

—Ngaa ni sisi Cristo huin da'nij David, ni un sin huin, ni gataj David sisi Cristo huin Señor rian sij únij. Daj si hua 'ngo nuguan' gataj David, gui'yaj Espíritu Santo:

⁴⁴"Yan'anj gataj gunun Señor nicaj sun riänj sisi gane sí' chrej ra'a sa' Yan'anj da' guisij guí'yaj gana Yan'anj rian daran' ni tsínj unun' ngā Señor nicaj sun riänj." Daj gataj Yan'anj gunun Señor, gataj xí' David. ⁴⁵Asa' ga'ue gahuin Cristo da'nij David sisi dugu'naj sí' Señor man'an Cristo únj. —Daj gataj Jesús.

⁴⁶Ni nun ri' ruhua ni tsínj fariseo si ga'mi ni sij. Ni asij güi daj, ni nun guisij ruhua ni sij nəchín' snan'anj ni sij Jesús ga mánj.

Jesús acusa a los escribas y los fariseos

23 Ngaa guisij ni ga'mi Jesús rian ni ngüi ngā rian ni tsínj nico' sí!. ²Ni gataj sij:

—Nicaj sun ni tsínj digyán ley nga ni tsínj fariseo daj rún' guinicaj sun Moisés. ³Yu'uj daj ni dagahuin ni é re' rian ni sij. Ni gui'yaj ni é re' si ataj ni sij. Sani si gachej ni é re' chrej chéj ni sij. Daj si ataj ni sij 'ngo nuguan', ni 'yaj ni sij ango nuguan!.

⁴Ni daj rún' 'yaj 'ngo tsínj ngaa ya'lí 'ngo carga gata 'ngo dugüí' sí!, 'yaj sí!, ni da'nga' daj 'yaj ni sij. Daj si 'yaj ni sij sisi gata ni ngüi carga ya'lí huin ni nuguan' a'nin' ni sij sun rian ni sí!. Ni uta' ni sij carga daj dacan xicój ni sí!. Sani a doj na'uej ruhua ni sij chracuij ni sij chra'ra'a ni sij ngā carga daj. ⁵Ni daran' si 'yaj ni sij, ni da'nga' daj 'yaj ni sij sisi guinil'i ni ngüi. Ni nagui'yaj gara' ni sij rian nūn si-nuguan' Yan'anj nūn yo ni sij. Ni hué daj nagui'yaj xe'e ni sij yu'uej nico' du'ua si-gan' ni sij nej. ⁶Ni nana'ui' ni sij 'ngo yu'uj sa' gane ni sij rian 'yaj ni sij 'ngo gui'yanj. Ni hué daj nana'ui' ni sij sisi gane ni sij chrun xila sa' chruhua si-nuhui ni sij nej.

⁷Ni huin ruhua ni sij sisi ga'mi sa' ni ngüi ngā ni sij ngaa chéj ni sij rian yu'ue. Ni hué daj huin ruhua ni sij sisi dugu'naj ni tsínj "maestro" ni sij. ⁸Sí duna ni é re' si gataj ni ngüi sisi "maestro" huin ni é re' mánj. Daj si 'ngo jnaj daran' ni é re'. Ni urin maestro huin Cristo rian ni é re' nej. ⁹Ni si dugu'naj ni é re' "chrej" 'ngo tsínj mān chruhua xungüi mánj. Daj si urin chrej ni é

re' huin Yan'anj x_ang_a' nne xata!
10 Ni si duna ni é re' si gataj ni ngüi sisi nico' ni sij ni é re' mánj. Daj si urin Cristo huin tsínj gujinico' ni é re' aj. **11** Ni tsínj huin achij scanij ni é re', ni da'ui sij gunánj guitsi sij rian ni é re'. **12** Daj si un tsínj huin ruhua gahuin achij, ni gunaj sij ne' rucu. Ni un tsínj huin ruhua gunaj ne' rucu, ni gahuin achij sij.

13 San_i niqui nin' ruhua niman ni é re' huin ni é re' tsínj digyán ley nga ni tsínj fariseo nej. Daj si gahuin ni é re' nico castigo. Tsínj digya' yun'unj huin ni é re'. Daj si ránj ni é re' chrej rian nica sun Yan'anj. Ni na'ue gatu ni ngüi, 'yaj ni é re'. Ni na'uej ruhua ni é re' gatu ni é re'. Ni da'nga' daj huin ruhua ni ngüi gatu, ni na'uej ruhua ni é re' nej.

14 Niqui nin' ruhua niman ni é re' huin ni é re' ni tsínj digyán ley nga ni tsínj fariseo nej. Tsínj digya' yun'unj huin ni é re'. Daj si a'nej ni é re' ducuá ngüi xana mmij. Ngaa ni ná achínj jni'yaj ni é re' rian Yan'anj sisi gan_i ruhua ni ngüi sisi sa' ni é re'. Xilí nuguan' nan, ni gahuin ni é re' nico castigo.

15 Niqui nin' ruhua niman ni é re' huin ni é re' ni tsínj digyán ley nga ni tsínj fariseo nej. Daj si guiran' ni é re' nico castigo. Tsínj digya' yun'unj huin ni é re'. Daj si nin' gachra' achéj ni é re'. Ni da rucu nnee yan'anj huaj ni é re' sisi xacaj urin tsínj si-chrej ni é re', ruhua ni é re'. Ni ngaa guiril' ni é re', ni gahuin quij chruhua niman sí' si quij niman man'an ni é re', 'yaj ni é re'. Ni gutiay diyan sí' gan'anj sí' rian ni é re' gan'anj daran' ni é re' rian yan'an.

16 Niqui nin' ruhua niman ni é re' xilí sayun guiran' ni é re'. Daj si ni tsínj duri digyán chrej rian ni ngüi huin ni é re'. Ni ataj ni é re' sisi guta' nica yya 'ngo tsínj daj rian oro mān chruhua nuhui, ngaa ni ní'yanj si ataj sí'. Ni hua nian guiyaj sí' si gataj sí', ataj ni é re'.

17 Tsínj ni'yun ni tsínj duri huin ni é re' nánj. Daj hua si huin achij, ruhua ni é re' únj. Oro ní', así nuhui 'yaj sisi sa' oro sa'. **18** Ni hué daj ataj ni é re' sisi guta' nica yya 'ngo tsínj daj rian altar sisi hua yya nuguan' ga'mi sí', ni nitaj si ní'yanj si ataj sij mánj. San_i sisi guta' nica yya 'ngo tsínj daj rian ofrenda taj rian altar, ngaa ni ní'yanj si ataj sij, ni hua nian guiyaj sí' si gataj sí', ataj ni é re'. **19** Tsínj ni'yun ni tsínj duri huin ni é re'. Daj hua si huin achij, ruhua ni é re' únj. Ofrenda ní', así altar 'yaj sisi sa' ofrenda daj sa'. **20** Tsínj guta' nica yya rian altar, ni nitaj si guta' nica yya sij rian urin altar, san_i guta' nica yya sij rian daran' si mán rian altar nej. **21** Ni tsínj guta' nica yya rian nuhui, ni sé rian urin nuhui guta' nica yya sij. San_i guta' nica yya sij rian Yan'anj x_ang_a' nne chruhua nuhui nej. **22** Ni tsínj guta' nica yya xata' rian nne chrun xila sa' nne Yan'anj, ni sé urin rian chrun xila sa' nne Yan'anj guta' nica yya sij mánj. San_i hué daj guta' nica yya sij rian man'an Yan'anj si nne rian chrun xila sa' da nej.

23 Ni'n' ruhua niqui niman ni é re' ni tsínj digyán ley nga ni tsínj fariseo. Daj si guiran' a ni é re' nico castigo. Tsínj digya' yun'unj huin ni é re'. Daj si aya ni é re' rumi coj nun stila ngaa coj xugune rian yo'ój

nej nga coj comino nej. Ni₁ ngaa guisij ichi' rumi, ni₁ a'u'i ni é re¹ 'ngo rumi rian Yan'anj. San₁ duna ni é re¹ nuguan' huin rian chruhua si-ley Yan'anj nej. Daj si duna ni é re¹ si gui'yaj nica ni é re¹ rian ni ngüi. Ni₁ duna ni é re¹ si gahuin 'i ruhua ni é re¹ ni₁yaj á re¹ Yan'anj. Ni₁ duna ni é re¹ si guxuman ruhua ni é re¹ ni₁yaj á re¹ Yan'anj. Da'ui ni é re¹ gui'yaj ni é re¹ ni₁ nuguan' nico nan. San₁ si duna ni é re¹ nga angó si 'yaj ni é re¹ da mánj. ²⁴Ni₁ huin ni é re¹ tsínj duri digyán chrej rian ni ngüi. Ni₁ aca ni é re¹ nnee mān xucu xa'u'i sisí náhuin sa¹ nnee daj go'o ni é re¹. San₁ amánj gue é re¹ xucu xachij huin camello.

²⁵'Niqui nin' ruhua niman ni é re¹ huin ni é re¹ ni₁ tsínj digyán ley nga ni₁ tsínj fariseo. Daj si guiran' ni é re¹ nico castigo nej aj. Tsínj digya' yun'unj huin ni é re¹. Daj si 'yaj á re¹ daj rún' 'yaj 'ngo tsínj na'nin' xiráj tasa nga xiráj go'o nej aj. San₁ nun na'nin' sij chruhua tasa nga chruhua go'o mánj. Ni₁ da'nga' daj hua chruhua niman ni é re¹. Ni₁ mān nin' ruhua si quij hua. Daj si 'yaj tu ni é re¹. Ni₁ 'yaj quij ni é re¹ nga ni ngüi nej. ²⁶Tsínj fariseo duri huin ni é re¹. Hua sini na'nin' sa¹ ni é re¹ chruhua tasa nga go'o huin niman án re¹. Asíj ni ga'ue gui'yaj sa¹ ni é re¹ guinili' ni ngüi aj.

²⁷'Niqui niman nin' ruhua ni é re¹ huin ni é re¹ ni₁ tsínj digyán ley nga ni₁ tsínj fariseo. Daj si guiran' ni é re¹ nico sayun. Huin ni é re¹ ni₁ tsínj digya' yun'unj. Daj si daj rún' hua chran gatsi naránj ni sij rian achin' niman, ni₁ da'nga' daj hua ni é re¹. Daj si xanga' ni₁ hua nia¹ xiráj chran

aráj ni sij daj. San₁ ne' chruhua yu'uj ni mān nin' ni cíj níman nga daran' si quij hua. ²⁸Ni₁ da'nga' daj hua á re¹. Daj si rún' hua tsínj 'yaj nica, ni₁ da'nga' daj hua ni é re¹ rian ni ngüi. San₁ chruhua niman ni é re¹, ni mān nin' ruhua nuguan' digya' yun'unj nga ni nuguan' quij aj.

²⁹'Niqui nin' ruhua ni é re¹ huin ni é re¹ ni₁ tsínj digyán ley nga ni₁ tsínj fariseo. Daj si gahuin ni é re¹ castigo nico. Tsínj digya' yun'unj huin ín re¹. Daj si naránj án re¹ chran rian gachin' ni tsínj ga'mi si-nuguan' Yan'anj asij ná. Ni₁ nagui'yaj nia¹ ni é re¹ xiráj chran rian gachin' ni tsínj hua sa¹. ³⁰Ni₁ ataj ni é re¹: "Sisi nun guiman ún asij ngaa guimán ni xí', ni₁ tsínj guimán asij ná, ni₁ si chracuij ún dagahui' ni sij ni tsínj ga'mi si-nuguan' Yan'anj mánj." Da'nga' daj ataj ni é re¹. ³¹San₁ hué ducuánj daj digyán xanga' a ni é re¹ sisí hué ni é re¹ huin yya da'níj ni tsínj dagahui' ni tsínj ga'mi si-nuguan' Yan'anj asij ná. ³²Achin guisij si gui'yaj quij ni xi a ni é re¹. San₁ gui'yaj a ni é re¹ nga si achin daj.

³³'Xucuáj huin ni é re¹. Ni₁ da'níj xucuáj huin ni é re¹ aj. Ni₁ daj gui'yaj ni é re¹ sisí si gahuin ni é re¹ castigo rian yan'anj ún. ³⁴Xí'i daj ni₁ a'lñi ni tsínj a'mi si-nuguan' Yan'anj nga ni tsínj ni'i sa¹ nej, nga ni tsínj digyán si-nuguan' Yan'anj rian ni ngüi. Ni₁ guisij ni sij rian mān ni é re¹ aj. San₁ hua go'ngo ni sij dagahui' ni é re¹ aj. Ni₁ doco' ni é re¹ ni sij rian rugutsi. Ni₁ duguayun ni é re¹ angó ni sij chruhua si-nuhui ni é re¹. Ni₁ guinico' ni é re¹ ni sij

daran' xuman' chrañ' yun'unj ni é re' ni sij nej. ³⁵Ngaa ni xi'l daj da'ui ni é re' si-gaquin' daran' ni tsínj dagahui' ni ngüi hua sa!. Ni asij sini dagahui' tsínj gu'naj Caín jnánj sij Abel. Ni hué sí' gahuin 'ngo tsínj gui'yaj nica. Ni hué daj dagahui' ni xi ni é re' tsínj gu'naj Zacarías huin sí' da'níj Berequías. Ni dagahui' ni sij sí' rian daní altar nga rian nne ducuá Yan'anj. ³⁶Xanga' atáj yyaj gunun a ni é re' sisí guiran' ni dugui' ni é re' castigo xi'l si-gaquin' ni tsínj dagahui' daj. —Daj gataj Jesús rian ni tsínj fariseo nga ni tsínj digyán si-ley Moisés rian ni ngüi.

Lamento de Jesús sobre Jerusalén

³⁷Ngaa ni gataj ruhua' yún Jesús: —Nun nani ducu ruhuáj xi'l ni é re' ni tsínj man' xuman' Jerusalén. Daj si dagahui' ni é re' ni tsínj ga'mi si-nuguan' Yan'anj anj. Ni ga'ui' ni é re' yej ni tsínj nicaj nuguan' huaj rian ni é re' huin ni sij tsínj ga'níj Yan'anj huaj rian a ni é re'. Síj undaj huin ruhuáj nagui'yaj yu'új, ni da'níj man'án re' huin ni tsínj man' xuman' Jerusalén. Ni daj rún' 'yaj 'ngo xuchre ngaa nagui'yaj yu'új xuj da'níj xuj riqui si-gachi xuj, ni da'nga' daj huin ruhuáj guí'yā nga ni da'níj re'. Sani nun garan' ruhua á re' mánj. ³⁸Yyaj ni ni'yaj ni é re'. Guere' xánj ni é re' nga ducuá ni é re' guna yyaj aj. ³⁹Ni ataj snan'án gunun ni é re' sisí si guini'i yún ni é re' yünj da guisij güi gataj ni é re' nuguan' nan: "Hua sá! nín' ruhua tsínj 'na' rian si-xugüi man'an Señor." —Daj gataj Jesús gunun ni ngüi man' xuman' Jerusalén.

Jesús predice la destrucción del templo

24 Ni ngaa gahui Jesús chruhua nuhui nico gan'anj sij, ni gahuin níchrun' ni tsínj nico' sij sisí digyán ni sí' daj hua ni hue' huin nuhui daj rian Jesús. ²Sani gataj Jesús gunun ni sí':

—Guini'yaj sa' ni é re' daran' nan anj. Xanga' atáj gunun a ni é re' sisí hua 'ngo güi, ni si gunáj ni a 'ngo yej rian dugüi' mánj. Duguane nin' ni sij daran' nánj. —Daj gataj Jesús gunun ni sij.

Señales antes del fin

³Ni ngaa gane Jesús dacan gu'naj Olivos, ni ga'na' urin ni tsínj nico' Jesús rian nne sij. Ni gataj ni sí':

—Gataj re' gunun únj aman gahuin yya ni nuguan' nan. Ni gataj re' daj hua 'ngo da'nga' guini'i únj sisí ga'na' ruhua' yún re' ngaa ganahuij xungüi nan. —Daj gataj ni sij.

⁴Ngaa ni gataj Jesús:

—Gá cuidado ni é re' sisí nitaj 'ngo tsínj digya' yun'unj ni é re' aj. ⁵Daj si ga'na' nico ni tsínj rian si-xugüi man'anj anj. Ni gataj ni sij: "Hué man'anj huin Cristo aj." Daj gataj ni sij gunun ni é re'. Ni digya' yun'unj ni sij nico ni ngüi.

⁶'Ni gunun ni é re' nuguan' sisí unun' 'ngo xuman' nga ango xuman', ni huin ruhua 'ngo xuman' daj guda' nga ango xuman'. Sani si guxu'ui' ni é re' mánj. Hua nián si hué daj gahuin. Sani achin ganahuij nin' xungüi aj. ⁷Ni gunun' nungüej xuman' daj. Ni gunun' 'ngo

gobierno da nga angó gobierno. Ni ga'na' xi'i nga xi'ná nej. Ni ga'na' yún go'ngo rian xungüí nej. ⁸Daran' nan ni diaj gaxi'lí guiran' ni ngüí sayun.

⁹Hué dan ni naga'ui' ni sij ni é re' rian ni tsínj nicaj sun. Ni guiran' ni é re' sayun nej. Ni dagahui' ni sij ni é re' nej. Ni si gahuin sa' ruhua daran' ni ngüí guini'yaj ni sij ni é re' xi'i si nicaj dugüí' ni é re' ngaj. ¹⁰Ngaa ni ni güi daj, ni nico ni ngüí duna si-chrej Yan'anj. Ni naga'ui' ni sij dugüí' ni sij rian ni tsínj nicaj sun. Ni si gahuin sa' ruhua ni sij guini'yaj ni sij go'ngo dugüí' ni sij. ¹¹Ni ga'na' nico ni tsínj digya' yun'unj. Ni gataj ni sij sisí a'mi ni sij si-nuguan' Yan'anj. Ni digya' yun'unj ni sij nico ni ngüí. ¹²Ni xi'i si gahuin nico gaquin', ni duna nico ni sij si gahuin 'i ruhua ni sij guini'yaj ni sij ni dugüí' ni sij. ¹³Sani ni ngüí huaj nico' yya nin' si-chrej Yan'anj da güi ganahuij xungüí, ni ganacaj Yan'anj ni sij aj. ¹⁴Ni nin' gachra' xungüí ganata' ni sij nuguan' sa' nan xi'i si nicaj sun Yan'anj. Ni da'nga' daj ganata' ni sij sisí guini'i daran' ni ngüí nga nuguan' sa' nan. Ngaa ni guisij, ni ganahuij daran'anj. —Daj gataj Jesús gunun ni tsínj nico' sij.

¹⁵Hué dan ni un tsínj aya ni nuguan' nan, ni xacaj re' cuenta un sin huin nuguan' nan ruhuaj gata huin nuguan' ga'mi Jesús xi'i si xi'i. Ni gataj Jesús:

—Ni ngaa guini'i ni é re' niquin' si quij hua rian hua sa' nin' ruhua daj rún' gataj tsínj gu'naj Daniel asij ná ¹⁶ni gunánj ni ngüí mán estado Judea gan'anj ni sij riqui quij. Ni

Daniel huin tsínj ga'mi si-nuguan' Yan'anj asij ná. ¹⁷Ni tsínj taj xata' chra' ducuá sij, ni si nanij sij guiri sij 'ngo rasun mān chruhua ducuá sij daj. ¹⁸Ni tsínj mán 'yaj sun riqui quij, ni si nanicaj sij ga'na' naran' sij si-gan' sij ga mánj. ¹⁹Ni niqui niman ni ngüí xana nun riqui lij nga ni ngüí utsi gué da'níj si gahuin ni güi nan anj. ²⁰Gachinj jni'yaj ni é re' rian Yan'anj sisí si ga'na' sayun daj ni yahuí nuhuij nga güi naránj ruhua ni ngüí. ²¹Daj si ngaa daj, ni guiran' ni ngüí sayun nico. Ni asij ngaa gui'yaj Yan'anj xungüí, ni nun guini'i ni ngüí 'ngo sayun daj rún' gahuin ne' rian ni güi gan'anj nan. Ni ne' rian ni güi daj, ni nitaj si ga'na' nico sayun rian ni ngüí daj rún' guiran' ni ngüí ngaa daj. ²²Ni sisí ga nico güi ga sayun daj, ni si gunucuaj ni ngüí mánj. Sani xi'i ni ngüí ganacui Yan'anj, ni ganiquin' da'aj sij si gahuin sayun, gui'yaj Yan'anj.

²³Ni sisí ngaa daj hua 'ngo tsínj gataj: "Ni'yaj re'. Nan niquin' Cristo." Así: "Da' mánj niquin' Cristo aj." Sisi da'nga' daj gataj ni sij, ni si guxuman ruhuá re' mánj. ²⁴Daj si ga'na' ni tsínj gataj sisí hué ni sij huin Cristo, gataj ni sij. Ni ga'na' ni tsínj gataj sisí hué ni sij huin tsínj a'mi si-nuguan' Yan'anj nej. Ni tsínj digya' yun'unj huin ni sij. Ni gui'yaj chre ni sij. Ni gui'yaj ni sij ni rasun nico güenda digya' yun'unj ni sij ni ngüí. Ni sisí ga'ue ni digya' yun'unj ni sij man'an ni ngüí nacui Yan'anj nej. ²⁵Daran'anj hua gataj sinij gunun ni é re' nej aj. ²⁶Ngaa ni sisí gataj ni sij: "Ni'yaj ni é re'. Hué Cristo niquin' quij

gui'yanj naco daj." Sisi da'nga' daj gataj ni sij, ni si gan'anj ni é re' mánj. Ni sisi gataj ni sij: "Hué Cristo nne chruhua hue' daj." Ni sisi da'nga' daj gataj ni sij, ni si guxuman ruhua ni é re' mánj. ²⁷Daj si daj rún' yoo ran 'yaj du'ui ne' sij güi, ni 'ngo xiguín nin' xata', ni da'nga' yoo daj nanicaj da'níj ni ngüi huin man'ānj. ²⁸Rian ngaj níman, ni yu'uj daj nahuin yu' ni xarúj.

La venida del Hijo del Hombre

²⁹'Sani si gachin ni güi guiran' ni ngüi sayun daj, ngaa ni rá'yanj gahuin rümi' rian güi. Ni si guixiguín rian yahui mánj. Ni gayu ni yati' mán xata!. Ni nagunánj ni fuerza mán xata' nej. ³⁰Ngaa ni gurugüi' 'ngo da'nga' gui'yá xata' huinj da'níj ni ngüi. Hué dan ni nin' ruhua ganani ruhua daran' ni xi'nin' huin ni ngüi man' chruhua xungüi. Ni guini'i ni sij ga'na' man'ānj rian ni nga huinj da'níj ni ngüi. Ni ga'naj nga daran' fuerza. Ni nahuin 'ueé nin'inj ga'naj nej aj. ³¹Ni ga'ní ni ángel gan'anj nga trompeta ga'yanj nucuaj. Ni naran' ni ángel daj ni ngüi hua ganacui Yan'anj. Ni ganaran' ni ángel ni ngüi daj mán nin' gachra' da' xi'í nin' xungüi nga xata' nej aj.

³²'Ni gahuin chrun ni é re' xi'í nuguán' huin chrun higuera. Ngaa ganahuin ya'nij ra'a, ni naxira' coj ra'a, hué dan ni ni'i ni é re' si hua guisij gahuin nichrun' yahui gahuin yan'an anj. ³³Ni hué gue ducuánj daj ngaa guini'i ni é re' sisi hua gahuin si atá gunun ni é re' acuan', ngaa ni guini'i ni é re' sisi hua niquin' man'ānj rian

hue' aj. ³⁴Xanga' atá gunun ni é re' sisi si gahui' ni ngüi man yyaj da gahuin yya daran' ni nuguán' nan anj. ³⁵Ga ni'ya xata' nga yo'ój. Saní si-nuguán'ānj nitaj aman ganahuuij mánj.

³⁶'Ni nun ni'i a 'ngo ni ngüi un güi, ni un hora ga'na' man'ānj mánj. Ni nun ni'i ni ángel mán xata' nej. Ni nun ni'i man'ānj huinj da'níj Yan'anj nej. Urin chrē ni'i nánj. ³⁷Ni daj rún' gui'yaj ni ngüi ngaa gane tsínj gu'naj Noé asij ná, ni da'nga' daj gui'yaj ni ngüi ngaa ga'na' da'níj ni ngüi huin man'ānj. ³⁸Daj si asij ngaa nun gara nnee rian yo'ój, ni xa ni sij go'o ni sij. Ni acaj ni sij yun'unj xana. Ni acaj yun'unj xana tsínj sno'o nej. Ni da'nga' daj gui'yaj ni sij da' güi gatúj Noé chruhua río achéj rian nnee. ³⁹Ni nun gara da'nga' ruhua ni sij da gara nnee rian yo'ój gui'yaj gumán huee xxi. Ni nicaj nnee daj daran' ni sij gan'anj-án!. Ni daj rún' gahuin ngaa daj, ni da'nga' daj nun gara da'nga' ruhua ni ngüi da ga'na' ruhua' yünj.

⁴⁰'Ni ngaa guisij güi daj, ni gunun nuguán'an huij tsínj riqui quij. Ni nicá gan'ān 'ngo sij, ni ango sij guna. ⁴¹Ni gunun nuguán'an huij yun'unj xana huáj unj. Ni 'ngo unj nicá gan'ān, ni ango unj guna. ⁴²Xi'í daj guini'yaj sa' ni é re'. Daj si nun ni'i ni é re' un hora ga'na' huinj Señor nicaj sun rian ni é re'. ⁴³Gunun sa' ni é re'. Sisi guini'i 'ngo tsínj ducua daj un hora ne' yan' ga'na' 'ngo tsínj tu, ni gane sij dugumi sij. Ni si ga'nij sij gatu sí' ducua sij, gui'yaj tu sí' mánj. ⁴⁴Hué dan ni ga chrun guiman ni é re' nej. Daj si ga'na' man'ānj hué gue hora

nitaj si ani ruhua ni é re' huīnj da'níj ni ngüi.

⁴⁵'Ngaa ni gahuin ni é re' daj rún' huin 'ngo moso sa'. Ni gui'yaj ni é re' daj rún' 'yaj 'ngo tsínj nicaj yun'unj moso, gui'yaj xuru'ue. Daj si a'ui' sij si xa ni ango moso ngaa ní'yanj ni sí!. ⁴⁶Ni hua 'ueé rian tsínj nicaj yun'unj daj sisí hua gacuít 'yaj sij ngaa hua 'na! níqui tsínj ducua nari' sí!. ⁴⁷Xanga' atá gunun a ni é re' sisí guinicaj tsínj daj sun dugumi sij daran' si'yaj tsínj ducua daj, gui'yaj sí!. ⁴⁸Sani sisí hua xi'i niman tsínj daj, ni gani ruhua sij sisí gahuin ran ga'na' níqui tsínj ducua daj. ⁴⁹Ni gaxí'i sij duguayun sij ango ni moso dugumi sij, ni gaxí'i sij xá nasa' sij, ni go'o sij ngá ni tsínj axini nej. ⁵⁰Ngaa ni ga'na' tsínj ducua daj hué güe güi, ni hué güe hora nitaj si ani ruhua sij si ga'na' sí!. ⁵¹Ni gahuin nico sij castigo gui'yaj tsínj ducua. Ni guiran' sij sayun ngá ni tsínj digya' yun'unj, gui'yaj sí!. Ni hué yu'u' daj gaco sij. Ni da xaruj yan' sij gahuin sij castigo.

Parábola de las diez vírgenes

25 'Ni daj rún' 'yaj ichi' ngüi xána yan, ni da'nga' daj gahuin rian nicaj sun Yan'anj xata!. Daj si nicaj ni unj candilaca gasiti huaj unj nácaj dugüi' unj ngá tsínj xácaj nica. ²Ni un'un' unj huin yun'unj ni'i sa!. Ni yun'un' unj huin yun'unj ni'yun. ³Ni nicaj un'un' ni yun'unj ni'yun nun ni'i daj candil gan'anj unj. Sani nun nicaj unj gasiti gan'anj unj. ⁴Sani ni yun'unj ni'i sa' daj, ni nicaj unj gaga' nun gasiti gan'anj unj. Ni nicaj unj

candil nej aj. ⁵Ni rian gahuin ran tsínj xácaj yun'unj xána, ni gunun nnej rian daran' unj, ni gatoj unj. ⁶Hué dan ni yan' sa', ni gunun unj si gaguáj ni sij. Ni gataj ni sij: "Hua 'na' tsínj xácaj yun'unj xána. Gahui ni é re' gan'anj nácaj ni é re' tsínj daj." Da'nga' daj gaguáj ni sij. ⁷Ngaa ni nachica daran' ni yun'unj xána yan daj. Ni gaxí'i unj gui'yaj xugüi unj si-candil unj. ⁸Ngaa ni gataj anin' yun'unj ni'yun daj rian anin' yun'unj a hua xugüi 'yaj: "Ríqui anin' é re' doj si-gasiti anin' é re' guiri' unj. Daj si ruhua guina'aj si-candil ni unj." Daj gataj unj. ⁹Sani gataj ni yun'unj ni'i sa' daj: "Si guisíj gasiti rian daran' né! sisí ríqui unj rian ni é re'!. Güij ni'yaj naj anin' é re' rian mánj anéj, ni guiran anin' é re' aj." Daj gataj anin' unj. ¹⁰Sani ngaa huaj unj guiran unj gasiti, ni ganasíj tsínj xácaj yun'unj xána daj. Ni gatúj ni yun'unj a hua xugüi daj chruhua hue' ngá tsínj xácaj yun'unj xána daj. Ni naránj ni sij rian hue' daj nánj. ¹¹Da' síj da guinasíj ango da'aj ni yun'unj xána yan daj. Ni gataj unj: "Señor, señor, na'ní re' rian hue' gatu ni unj." Daj gataj unj gunun sí!. ¹²Sani gataj sí!: "Xanga' atá gunun a ni é re' sisí nun ni'línj ni é re' mánj." Daj gataj sí! gunun ni yun'unj ni'yun daj.

¹³'Guini'yaj sa' ni é re' si nun ni'i ni é re' un güi, ni un hora ga'na' da'níj ni ngüi huin man'anj.

Parábola de los talentos

¹⁴'Daj si daj rún' 'yaj 'ngo xuru'ue gan'anj ango yu'u' gan', ni hué daj 'yaj man'anj. Ni gaquínj xuru'ue daj si-moso sij. Ni naga'ui' sij si-

san'anj sij rian ni sí' sisí dugumi ni sí'. ¹⁵Ni ga'ui' sij ɻn'un' san'anj gu'naj talento rian 'ngo si-moso sij. Ni 'ngo talento daj huin ruhuaj gata sisí gui'yaj gana 'ngo tsínj daj ngaa guisij gui'yaj sun sij 'ngo si xinun' yo!. Daj si nin' ruhua du'ue san'anj huin talento daj. Ni ga'ui' sij huij talento rian ango moso daj. Ni ga'ui' sij 'ngo talento rian ango moso daj. Ni ga'ui' sij rian go'ngo ni sij daj rún' ga'ue gui'yaj gana ni sij. Hué dan ni gan'anj gan' sij.

¹⁶'Ngaa ni 'ngo hora gan'anj tsínj nahuin ra'a ɻn'un' talento daj. Ni guiránj sij ni rasun nadu'uej sij. Ni gui'yaj gana sij yun'un' talento nga san'anj daj. ¹⁷Ni da'nga' daj gui'yaj tsínj guiri' huij talento. Ni gui'yaj gana sij yahuij talento. ¹⁸Sani tsínj guiri' 'ngo talento, ni gan'anj sij ganj sij yu'uj. Ni garíj huij sij si-san'anj si-xuru'ue sij.

¹⁹Ni ngaa gachin nico güi, ni nasíj xuru'ue daj. Ni xacaj sij cuenta daj gui'yaj ni moso daj. ²⁰Ni ga'na' tsínj guiri' ɻn'un' talento daj. Ni nuta' sij yun'un' talento gui'yaj gana sij. Ni gataj sij gunun xuru'ue daj: "Señor, riquí re' ɻn'un' talento riānj. Ni gui'yaj ganāj yun'un' talento gahuin si'yáj re'!" Daj gataj tsínj daj gunun xuru'ue daj. ²¹Ngaa ni gataj sí!: "Dugu'naj huaj gui'yáj re' huín re' 'ngo moso gui'yaj sa' sun. Ni huín re' 'ngo tsínj gacuij. Xi'í si gui'yaj 'ueé re' nga doj sun, ngaa ni gui'yá sisi guinicaj re' nico sun. Gahuin niá' ruhuá re' ngāj huinj tsínj nicaj sun rian re'." Daj gataj sij' gunun sij.

²²'Ngaa ni ga'na' tsínj guiri' huij talento daj. Ni gataj sí!: "Señor,

riquí re' huij talento riānj. Ni gui'yaj ganaj yahuij talento gahuin si'yáj re'." Daj gataj sij' gunun sij. ²³Ngaa ni gataj xuru'ue gunun sij: "Dugu'naj huaj gui'yáj re' huín re' moso gui'yaj sa' sun. Ni huín re' 'ngo tsínj gacuij nánj. Xi'í si gui'yaj 'ueé re' nga doj sun, ni gui'yá sisi guinicaj re' nico sun. Gahuin niá' ruhuá re' ngāj huinj tsínj nicaj sun rián re'." Daj gataj sij' gunun sij!

²⁴'Sani ngaa ga'na' tsínj guiri' 'ngo talento daj, ni gataj sij' gunun sij!: "Señor, ni'línj sisí huín re' 'ngo tsínj huee. Ni nacaj re' strigo rian nun güin gunun re'! Ni naran' re' strigo rian nagui'yaj sa' ango ni sij strigo nej. ²⁵Xi'í daj ni guxu'uij. Ni gan'anj gari huij si-san'anj man'án re' riquí yo'ój. Ngaa ni nariquij si'yáj re' nahuin ra'á re'!" Daj gataj tsínj daj gunun xuru'ue. ²⁶Hué dan ni gataj xuru'ue daj gunun sij: "Huín re' 'ngo moso xi'í. Ni rumi re' nej. Ni ni'lí re' sisí nacā rian nun gununj. Ni ni'lí re' sisí ganaran'ānj strigo rian nagui'yaj sa' ango ni sij strigo nej. ²⁷Hué dan ni ɻn sin huin, ni nun nicaj re' si-san'ān gan'anj re' ga'nij re' banco únj. Ngaa ni ngaa nañicā, ni nacā si-san'ān nga san'anj nata' chra banco san'anj ga'nij re' chra nej aj nej." Daj gataj xuru'ue gunun tsínj guiri' 'ngo talento daj.

²⁸'Ngaa ni gataj xuru'ue daj gunun ni tsínj mān yu'uj daj: "Ga'ne ni é re' san'anj ra'a sij. Ni ga'ui' ni é re' ra'a tsínj nicaj chi' talento. ²⁹Daj si tsínj nicaj ni ga'uuj nico ra'a sij. Ni gahuin nico si nicaj sij. Sani tsínj nitaj si nicaj, ni nunj si doj nicaj sij, ni ga'nē si nicaj sij aj. ³⁰Ni moso nitaj si ní'yanj daj, ni guere' ni é

re' ne' chrej xe' rian hua rumi' aj.
Ni hué y'u'uj daj gunun gaco sij. Ni
da xaruj yan' sij gahuin sij castigo."
Daj gataj xuru'ue daj xi'í moso xi'i
daj.

El juicio de las naciones

³¹ 'Ni ngaa ga'na' da'nij ni
ngüi huin man'anj nej, ni ganéj
rian chrun xila hua 'ueé sa' nin'.
Ni ga'naj ngä nin' ruhua fuerza.
³² Ngaa ni nahuin yu' daran' ni
ngüi mán chruhua xungüi riānj. Ni
nari ninij ni sij daj rún' yaj tsínj
dugumi xucu ngaa nari nini sij
dán sij xachij ngä stane. Ni da'nga'
daj gui'yä nari ninij go'ngo ni sij
aj. ³³ Ngaa ni gui'yä sisi guiman
ni xachij ne' chrej ra'a sa'aj. Ni
guiman ni stane ne' chrej ra'a rotsij
aj.

³⁴ 'Ni huéj gahuin rey. Ni gatá
gunun ni ngüi guiman ne' chrej
ra'a sa'aj aj: "Gahuia' ni é re' si hua
gui'yaj sa' chrë ngä ni é re' aj. Ni
huin ruhuaj sisi guinicaj sun ni é
re' rian nicaj sun Yan'anj. Daj si hua
gui'yaj xugüi Yan'anj rian gane ni é
re' asij ngaa gui'yaj Yan'anj xungüi
aj. ³⁵ Daj si ngaa gachin xi'na' riquij,
ni riqui ni é re' xaj. Ni ngaa nago'oj
nnee, ni riqui ni é re' go'oj nej. Ni
ngaa huinj 'ngo tsínj 'na' ango rian
xuman', ni nahuin ra'a á re' yünj aj.
³⁶ Ngaa nitaj si-gan'anj, ni riqui ni
é re' atsij gununj. Ni ngaa ga'nanj,
ni ga'na' ni'yaj á re' yünj. Ni ngaa
gununj ducuaga', ni ga'na' ni'yaj ni
é re' rian gununj anj." Daj gatá rian
ni ngüi guiman ne' chrej ra'a sa'aj.

³⁷ 'Ngaa ni nachinj sman'anj ni ngüi
hua nica niman daj riānj: "Señor,
aman guini'i ni únj sisi achin xi'na'

riquí re', ni riqui ni únj si xá re' únj.
Ni aman guini'i ni únj sisi nago'ó re'
nnee, ni riqui ni únj si go'ó re' únj.
³⁸ Ni aman guini'i ni únj sisi huín
re' 'ngo tsínj 'na' rian ango xuman',
ni nahuin ra'a ni únj man'án re' únj.
Ni aman guini'i ni únj si nitaj si-gán'
re', ni riqui ni únj gunun re' únj.
³⁹ Ni aman guini'i ni únj sisi ga'nan'
re', asi gunun re' ducuaga' nej, ni
ga'na' ni'yaj ni únj únj." Daj gataj ni
ngüi daj gununj aj.

⁴⁰ 'Ngaa ni gatá gunun ni sij:
"Xanga' atā gunun ni é re' sisi daran'
si gui'yaj ni é re' rian ni jnān hua
niqui, ni hué ducuānj daj gui'yaj á
re' riānj nej aj." Daj gatá gunun ni
ngüi 'yaj sa'.

⁴¹ 'Hué dan ni gatá gunun ni ngüi
guiman ne' chrej ra'a rotsij: "Guxun
anéj ni é re' man'án re' riānj. Hua
gataj Yan'anj sisi gan'anj ni é re'
rian yan'an gaca niganj nin' a ni é
re' aj. Ni hua gui'yaj xugüi Yan'anj
yan'an daj sisi gunun sichre ngä ni
ángel nico' man'an sichre daj aj.

⁴² Daj si ngaa gachin xi'na' riquij,
ni nun riqui ni é re' xaj. Ni ngaa
nago'oj nnee, ni nun riqui ni é
re' go'oj. ⁴³ Ni ngaa gahuinj 'ngo
tsínj 'na' ango rian xuman', ni nun
ganahuin ra'a ni é re' yünj mánj. Ni
ngaa nitaj si-gan'anj, ni nun riqui ni
é re' gununj mánj. Ni ngaa ga'nanj,
ni nun ga'na' ni'yaj ni é re' yünj
mánj. Ni ngaa gununj ducuaga',
ni nun ga'na' ni'yaj ni é re' riānj
nünj mánj." Daj gatá gunun ni ngüi
guiman ne' chrej ra'a rotsij daj.

⁴⁴ 'Ngaa ni gataj ni sij riānj: "Señor,
aman guini'i ni únj sisi achin xi'na'
riquí re', ni nago'ó re' nnee únj. Ni
aman gahuín re' 'ngo tsínj 'na' ango

yu'uj únj. Ni aman achin si-gán' re' únj. Ni aman a'nán' re' si gunun re' ducuaga' únj. Ni aman nun chracuji ni únj man'án re' ngaa guirán' re' ni sayun daj únj." Daj gataj ni sij riānj.

⁴⁵"Ni gatā gunun ni sij: "Xāngā" atā gunun a ni é re' sisí ngaa nun chracuji ni é re' rian ni jnān hua niqui, ni da'nga' daj nun chracuji a ni é re' rian man'ānj." Daj gataj gunun ni sij.

⁴⁶"Ni gan'anj ni sij guiran' ni sij castigo niganj nin'. Sani ni ngüi hua nica niman, ni gan'anj gane niganj ni sij ngā Yan'anj. —Daj gataj Jesús gunun ni tsínj nico' sij.

El complot para prender a Jesús

26 Hué dan ni ngaa guisij ga'mi Jesús ni nuguan' daj, ni gataj sij gunun ni tsínj nico' sij:

²—Ni'i ni é re' sisí xiráj huíj güi, ni 'na' gahuin gui'yanj pascua. Ni naga'ui' ni sij man'ānj rian ni tsínj ga'ui' gaquij ra'aj guinicōj rian rugutsi huīnj da'níj ni ngüi. —Daj gataj Jesús.

³Ngaa ni nahuin yu' ni chrej a'nin' ngā ni tsínj digyán ley nej, ngā ni tsínj huin achij scanij ni ngüi nej. Ni nahuin yu' ni sij rian hue' ducuá chrej huin achij nin' gü'naj sí' Caifás.

⁴Ni diga'mi dugüi' ni sij daj ga'ue digya' yun'unj ni sij man'an Jesús, ni guida'a hui ni sij sí!. Daj si daga'hui' ni sij, ruhua ni sij. ⁵Sani gataj ni sij:

—Si guido'ó' sí' güi gahuin gui'yanj nun sa' nun gahuin sayun, gui'yaj ni ngüi mánj. Daj gataj ni sij.

Jesús es ungido en Betania

⁶Ni ngaa gane Jesús xuman' Betania, ni gane sij ducuá 'ngo

tsínj gu'naj Simón tsínj guiran' xi'i lepra. ⁷Ni ngaa nne Jesús rian mesa, ni guisij 'ngo yun'unj xāna rian nne sij. Ni nicaj ún' 'ngo frasco yej gü'naj alabastro nun gasiti guin' daj ruhua-á' nicaj ún' guisij ún!. Ni du'ue nin' ruhua-á'. Ni garíj ún' gasiti daj chra Jesús. ⁸Sani ngaa guini'i ni tsínj nico' Jesús, ni ga'man ruhua ni sij. Ni gataj ni sij:

—Ni un sin huin ni gayanj yun gasiti sa' da únj. ⁹Ga'ue gane' gasiti daj. Ni ga'ue guiri' nico san'anj ga'ui' né' rian ni ngüi niqui. —Daj gataj ni sij.

¹⁰Ni ngaa gunun Jesús, ni gataj sí' gunun ni sij:

—Si chran' yun'unj ni é re' yun'unj xāna nan mánj. Si 'yaj unj nan ngāj, ni dugu'naj huaj, 'yaj unj. ¹¹Ya'yoj nne ni ngüi niqui ngā a re'.

Sani nitaj si gane niganj man'ānj ngā ni é re' mánj. ¹²Garíj ún' gasiti guin' daj nnee cū. Ni da'nga' daj 'yaj xugüi ún' nnee cū. Daj si doj ni guisij güi gachin' ni sij yünj.

¹³Xanga' yya atā gunun ni é re' sisí daran' yu'uj ga'mi ni sij nuguan' sa' rian xi'i, ni hué daj nata' ni sij si gui'yaj yun'unj xāna daj riānj. Ngaa ni nanun ruhua ni ngüi xi'í ún' aj. —Daj gataj Jesús gunun ni sij.

Judas ofrece entregar a Jesús

¹⁴Hué dan ni gan'anj 'ngo ni xuhuīj ni tsínj nico' Jesús rian ni chrej a'nin'. Ni gu'naj sí' Judas Iscariote. ¹⁵Ni gataj sí':

—Ni undaj huin riqui ni é re' riānj, ni digyānj rian nne Jesús, ni guida'a á re' únj. —Daj gataj Judas gunun ni sij. Ngaa ni ga'ui' ni sij ico chi' san'anj plata rian sí!. ¹⁶Ni asij

hora daj, ni gaxi'i sí' nano' sí' 'ngo ducuánj daj naga'ui' sí' Jesús ra'a ni chrej a'nin'.

Institución de la Cena del Señor

¹⁷Ni guisíj güi sini gahuin gui'yanj ngaa gui'yaj ni sij chrachrúnj nitaj si 'nij levadura xa ni sij. Ni ga'na' ni tsínj nico' Jesús. Ni gataj ni sí' gunun sij:
—Ni a huin ruhuá re' si gui'yaj xugüi ni únj xa sti'ní re' pascua únj.
—Daj gataj ni sij.

¹⁸Ngaa ni gataj Jesús:
—Güij gatu ni é re' xuman' rian nne 'ngo tsínj daj. Ni gataj ni é re' gunun sí': “Ataj maestro sisi gahuin nichrun' si guisíj si-hora sij. Ngaa ni gan'anj gui'yaj sij gui'yanj pascua ducuá re' nga ni tsínj nico' man'an sij.” Da'nga' daj gataj ni é re' gunun sí'. —Daj gataj Jesús.

¹⁹Ngaa ni gui'yaj ni sij daj rún' ga'nin' Jesús sun rian ni sij. Ni gui'yaj xugüi ni sij sisí xa sti'ní ni sij xi'lí gui'yanj pascua. ²⁰Ni ngaa guini, ni gan'anj gane Jesús rian mesa nga ni xuhuij ni tsínj nico' sij.
²¹Ni ngaa xa ni sij, ni gataj Jesús gunun ni sí':

—Xanga' atā gunun ni é re' sisi naga'ui' 'ngo ni é re' man'ānj rian ni tsínj ga'na' guida'a yūnj anj. —Daj gataj Jesús.

²²Ngaa ni nin' ruhua ganani ruhua ni sij. Ni gaxi'i ni sij nachínj snan'anj go'ngo ni sij Jesús. Ni gataj ni sij:

—Señor, man'ānj huin ní!. —Gataj go'ngo ni sij.

²³Ngaa ni gataj Jesús:

—Tsínj jniaj nuguán'an chrachrúnj chruhua go'o ngāj, hué

sij huin tsínj naga'ui' man'ānj rian ni tsínj guida'a yūnj. ²⁴Ni yūnj huin da'nij ni ngüi. Ni rún' ataj si-nuguán' Yan'anj rian xi'ij, ni da'nga' daj hua niqan guiran'ānj sayun. Sanj ni qui niman nin' ruhua tsínj naga'ui' man'ānj rian ni tsínj ga'na' guida'a yūnj. Daj si gahuin nico castigo guiran' sí'. Sa huin sisi nun ga'nga man'an sí'. —Daj gataj Jesús.

²⁵Ngaa ni nachínj snan'anj Judas tsínj naga'ui' Jesús rian ni tsínj nicaj sun. Ni gataj sij gunun Jesús:

—Maestro, man'ānj huin ní!. —Daj gataj Judas.

Ngaa ni gataj Jesús:
—Da'nga' daj gataj man'án re'. —Daj gataj Jesús gunun Judas.
²⁶Ni ngaa xa ni sij, ni guida'a Jesús chrachrúnj. Ni naga'ui' sij si guruhua Yan'anj. Asíj ni gura' da'aj sij chrachrúnj daj, ni ga'ui' sij xa ni tsínj nico' sij. Ni gataj sij:

—Guida'a ni é re' xa ni é re'. Chrachrúnj nan huin nnee cū aj. —Daj gataj Jesús.

²⁷Hué dan ni guida'a Jesús tasa. Ni ngaa naga'ui' sij si guruhua Yan'anj, ni ga'ui' sij go'o ni sí'. Ni gataj sij:

—Go'o daran' ni é re'. ²⁸Daj si nnee nan huin si-tun man'ānj. Ni nga tun nan, ni guisíj gahuin yya nuguán' gui'yaj yya Yan'anj nga ni ngüi. Ni xi'lí tun gayanj nan guinicaj Yan'anj niman nico rian si-gaquin' nico ni ngüi. ²⁹Ni atā gunun a ni é re' sisi nitaj si go'o ruhua' yūnj nnee uva nan da' güi go'oj nnee uva naca nga ni é re' rian nicaj sun chrē. —Daj gataj Jesús gunun ni sij.

Jesús anuncia la negación de Pedro

³⁰ Ni ngaa guisíj garáj ni sij chra', ni gahui ni sij gan'anj ni sij dacan gu'naj Olivos.

³¹ Ngaa ni gataj Jesús gunun ni sij: —Duna daran' ni é re' yūnj yan' yyaj. Daj si ataj si-nuguan! Yan'anj: "Ga'ui" Yan'anj tsínj dugumi xachij. Ngaa ni gunánj ni xuj. Ni gaxa'ni ni xuj." Da'nga' daj ataj si-nuguan! Yan'anj. ³²Sani ngaa gana'ní, ngaa ni gan'ān estado Galilea. Asíj ni huaj ni é re' yu'uj da nej. —Daj gataj Jesús.

³³ Ngaa ni gataj Pedro gunun Jesús:

—Nunj si gan'anj daran' ni sij xi'í re', sani nitaj aman dūnaj man'ān man'ān re' mánj. —Daj gataj Pedro gunun Jesús.

³⁴ Ngaa ni gataj Jesús:

—Xanga' atā gunun re' sisi asij nun gaguaj do'loj 'ngo du'ua xú' yan' nan, ni gataj re' hu'a'nij sisi nun ni'í re' man'ān. —Daj gataj Jesús gunun Pedro.

³⁵ Ni gataj Pedro:

—Nunj si hua niān gahuij nga re', sani si gatā sisi nun ni'inj man'ān re' mánj. —Daj gataj Pedro.

Ni da'nga' daj gataj daran' ni tsínj nico' Jesús nej.

Jesús ora en Getsemaní

³⁶ Hué dan ni gan'anj Jesús nga ni tsínj nico' sij 'ngo yu'uj gu'naj Getsemaní. Ni gataj sij gunun ni sí:

—Gane ni é re' nan si gan'ān yu'uj man gachinj jni'yā rian Yan'anj. —Daj gataj sij gunun ni sí.

³⁷ Ni nicaj sij Pedro nga nungüej da'níj Zebedeo gan'anj sij. Ni nin'

ruhua gaxi'i sij ganani ruhua sij. Da' huej ata' niman sij. ³⁸ Ni gataj sij gunun anin' sí:

—Da' ní' ni a gan'anj nimānj ruhuāj, 'yaj si nani ruhuaj. Ni gahuij nga nimānj ruhuāj. Guna anin' é re' nan gunun ruhua á re' ngāj. —Daj gataj Jesús gunun ni sij.

³⁹ Hué dan ni gan'anj Jesús doj ne' chrej rian. Ni ganiquin' ráj dacoj sij ganun rian sij rian yo'ój. Ni gachínj jni'yaj sij rian Yan'anj. Ni gataj sij:

—Tata chré', sisi ga'ue, ni ga'ne re' sayun ran'ānj nan. Sani si gui'yáj re' rún' huin ruhua man'ānj. Maan si gui'yáj re' rún' aran' ruhua man'ān re'. —Daj gataj Jesús gunun man'ān Yan'anj.

⁴⁰ Ngaa ni nanicaj Jesús rian man ni tsínj nico' sij. Ni atoj anin' sí nari' sij. Ngaa ni gataj sij gunun Pedro:

—Ni si ga'ue ni 'ngo hora gunun ruhua anin' é re' ngāj ga mí!. ⁴¹ Ga gunun ruhua anin' é re' gachinj jni'yaj anin' é re' rian Yan'anj sisi si guinij anin' é re' rian gaquin' ngaaa gatsij sichre niman anin' é re'. Huin ruhua nimán re' gui'yaj sa' re'. Sani nun gahuin nucuaj nnee cúj anin' é re' mánj. —Daj gataj Jesús gunun ni hu'a'nij tsínj daj.

⁴² Ngaa ni gan'anj ruhua' yún Jesús. Ni gachínj jni'yaj sij rian Yan'anj. Ni gataj sij:

—Tata chré', sisi si ga'ue ganani rian sayun nan, ngaa ni gui'yáj re' si garan' ruhuá re' ngāj. —Daj gataj Jesús gunun Yan'anj.

⁴³ Ni ngaa nanicaj ruhua' yún sij, ni atoj ruhua' yún anin' sí nari' sij. Daj si a'uij rian anin' sí, gui'yaj nnej.

⁴⁴Ngaa ni gahui sij rian ni sí'. Ni gan'anj gachinj jni'yaj sij rian Yan'anj guisíj huá'nij. Ni hué gue nuguán' daj gataj ruhuá' yún sij rian Yan'anj.

⁴⁵Ngaa ni nanicaj sij rian man ni tsínj nico' sij. Ni gataj sij:

—Ga'ue gatoj anin' é re', ni naaranj ruhua á re' aj. Guisíj hora ga'na' tsínj naga'ui' manl'anj ra'a ni tsínj 'yaj gaquin' huinj da'níj ni ngüi. ⁴⁶Nachica anin' é re' gan'anj né'. Hua gahuin nichrun' tsínj 'na' naga'ui' yünj rian ni tsínj nicaj sun. —Daj gataj Jesús gunun ni sij.

Arresto de Jesús

⁴⁷Da a'mi gué Jesús ngaa guisíj Judas huin sí' 'ngo ni xuhuij ran' ni tsínj nico' sij. Ni nicaj dugüi' sí' nga nico ni tsínj guisíj sí'. Ni ata ni sij espada nej, chrun nej, huaj ni sij. Ni ga'níj ni chrej a'nin' nga ni tsínj huin achij scanij ni ngüi ga'na' ni sij. ⁴⁸Ni hua digyán Judas 'ngo chrej daj guini'i ni sij un tsínj huin guida'a ni sij. Ni gataj sí':

—Tsínj garun du'uaj daj hué sij huin Jesús aj. Guida'a ni é re' sij.

—Daj hua gataj Judas rian ni tsínj nicaj dugüi' nga sí'.

⁴⁹Ngaa ni 'ngo gahuin nichrun' Judas rian niquin' Jesús. Ni:

—Hua sa' nné re', maestro. —Gataj sij gunun Jesús. Ni garun du'ua sij sí'.

⁵⁰Ngaa ni gataj Jesús gunun sí':

—Amigo, un sin huin, ni 'na' re' únj. —Daj gataj Jesús gunun Judas.

Hué dan ni gahuin nichrun' ni sij, ni guida'a ni sij Jesús.

⁵¹Ngaa ni guiri 'ngo tsínj niquin' ngá Jesús si-espada sij. Ni ga'ui' sij

tsínj 'yaj sun rian chrej huin achij nin' daj. Ni güéj nin' chraquij sí', guí'yaj sij. ⁵²Ngaa ni gataj Jesús rian tsínj nicaj espada daj:

—Na'nij re' si-espada re' chruhua pena. Daj si daran' ni tsínj gunun' nga espada, ni gahui' ni sij, guí'yaj espada nej. ⁵³Nun ni'lí re' sisí ga'ue gachinj jni'yá rian chrej, ni ga'nij chrej hué hora nan xuhuij xi'nin' ni ángel ga'na' chracuuij yünj ní!. ⁵⁴Sani sisí da'nga' daj guí'yá, ni na'ue gahuin yya daj rún' ataj si-nuguán' Yan'anj. Daj si ataj si-nuguán' Yan'anj sisí hua nián guiran'ānj sayun nánj. —Daj gataj Jesús.

⁵⁵Ni hora daj ni gataj Jesús gunun ni tsínj 'na' daj:

—Ni un sin huin ni ata á re' espada nga chrun nej 'na' guida'a á re' yünj únj. Huéj huin 'ngo tsínj tu ruhua ni é re' ní'. Ya'yoj ganéj chruhua nuhui digyánj rian ni é re'. Ni nun guida'a ni é re' yünj mánj. ⁵⁶Sani ran'ānj sayun nan sisí gahuin yya daj rún' gataj ni tsínj ga'mi si-nuguán' Yan'anj asij ná. —Daj gataj Jesús.

Ngaa ni dunáj daran' ni tsínj nico' Jesús man'an sij. Ni gunánj ni sí' rian Jesús.

Jesús ante el concilio

⁵⁷Ngaa ni ni tsínj guida'a Jesús, ni nicaj ni sij sí' gan'anj ni sij rian tsínj gu'naj Caifás huin sí' chrej huin achij nin'. Ni yu'uj daj hua nauhin yu' ni tsínj digyán ley ngá ni tsínj huin achij nej. ⁵⁸Ni gan' huaj Pedro nico' sí' huaj rucu Jesús. Ni guisíj sij rian ducuá chrej huin achij daj. Ni rian hua ta rian hue' daj gatúj sij. Ni gan'anj gane sij ngá ni snado

mán yu'uj daj. Daj si huin ruhua sij guini'i sij sisi daj ganahuij daran' ni nuguau' daj.

⁵⁹Ngaa ní nano' ni chrej a'nin' nga ni tsínj 'yaj junta daj nuguau' nne xi'í Jesús sisi da'nga' daj ga'ue dagahui' ni sij Jesús. ⁶⁰Sani_ñ nun nari' ni sij 'ngo nuguau' nne daj. Ní nunj si ga'na' nico ni tsínj ga'mi nne xi'í Jesús, sani nun nari' ni sij 'ngo gaquin' sisi gahui' sí'. Hué dan ní ga'na' huij tsínj daj. ⁶¹Ní gataj nungüej sij:

—Gataj tsínj nan sisi ga'ue duguane sij ducuá Yan'anj. Ní xiráj huá'nij güi, ní nagui'yaj sij ango nuhui. —Daj gataj nungüej tsínj daj.

⁶²Ngaa ní naxuman chrej huin achij nín'. Ní gataj sij gunun Jesús:

—Nitaj 'ngo nuguau' nanicaj re' únj. Ní un sin huin si ataj nungüej tsínj daj xi'í re' únj. —Daj gataj sij gunun Jesús.

⁶³Sani_ñ dínj guiniquin' du'ua Jesús nun ga'mi sij. Ngaa ní gataj chrej huin achij nín' daj gunun Jesús:

—A'nij sun rián re' nga si-xugüi Yan'anj hua ní'na' sisi gataj yyá re' sisi hué re' huin Cristo da'níj Yan'anj. —Daj gataj sij gunun Jesús.

⁶⁴Hué dan ní gataj Jesús:

—Huéj huin daj rún' atáj re' nánj. Ní atá gunun ni é re' sisi huéj huin da'níj ni ngüi. Ní guini'i ni é re' sisi ganéj ne' chrej ra'a sa_ñ Yan'anj nucuaj nín' nne xata!. Ní guini'i ni é re' ga'naj rian nga xata!. —Daj gataj Jesús.

⁶⁵Ngaa ní gutsi' chrej huin achij nín' daj si-gan' sij. Ní gataj sij:

—Ga'mi quij sí' xi'í Yan'anj anj. Nitaj si gui'yó' ni testigo ga mánj. Acuan' gunun ni é re' si ga'mi quij

sij xi'í Yan'anj anj. ⁶⁶Daj gui'yaj né!, ruhua ni é re' únj. —Daj gataj chrej huin achij nín' gunun ni tsínj gan'anj junta daj.

Ní:

—Da'ui sij gaquin', ní hua niñan gahui' yya sij. —Daj gataj ni tsínj daj.

⁶⁷Ngaa ní gara sta'nunj ni sij rian Jesús. Ní ga'ui' ni sij sí' nej. Ní gara'ui ango ni sij rian sí'. ⁶⁸Ní gataj ni sij:

—Gahui chra re' sisi un tsínj ga'uí re' huín re' Cristo. —Daj gataj ni sij ga'mi ducu ni sij rian Jesús.

Pedro niega a Jesús

⁶⁹Ní nne Pedro ne' chrej xe' ta rian ducuá chrej huin achij nín' daj.

Ní gahui nichrun' 'ngo yun'unj xána 'yaj sun hue' daj. Ní gataj ún':

—Hué re' nicaj dugüi' nga Jesús tsínj 'na' estado Galilea aj. —Daj gataj ún' gunun Pedro.

⁷⁰Sani_ñ nun ga'uej Pedro rian daran' ni tsínj mán yu'uj daj. Ní gataj sij:

—Nun ni'ñj un si atáj re' mánj. —Gataj Pedro gunun ún'.

⁷¹Ngaa ní gahui sij ne' chrej xe' ne' rian atúj ni ngüi. Ní guini'i ango yun'unj xána 'yaj sun man'an sij. Ní gataj ún' gunun ni tsínj mán yu'uj daj:

—Hué tsínj nan nicaj dugüi' nga Jesús, tsínj 'na' xuman' Nazaret. —Daj gataj ún' gunun ni sij.

⁷²Sani_ñ nun ga'uej ruhua' yún Pedro. Ní guta' níca yya sij. Ní gataj sij:

—Nun ni'ñj tsínj da mánj. —Daj gataj Pedro gunun ni sij.

⁷³Ngaa ni ango hora le', ní gahui nichrun' ni tsínj mán yu'uj daj. Ní gataj ni sij gunun Pedro:

—Xanga' huín re^l 'ngo ni tsínj daj.
Daj si a'mí re^l daj rún' a'mi ni sij.
Daj gataj ni tsínj daj gunun Pedro.

⁷⁴Hué dan ni gaxi^li sij ga'mi quij
sij. Ni guta' nica yya sij. Ni gataj sij:

—Nun ni'inj tsínj da mánj. —Daj
gataj Pedro gunun ni sij.

Ni hué gue hora daj gaguáj do'loj
'ngo du'ua xú'.

⁷⁵Ngaa ni gananun ruhua Pedro
si gataj Jesús gunun sí: "Asij nun
gaguaj do'loj si 'ngo du'ua xú', ni
gataj re^l si huá'nij si nun ni'l re^l
man'anj mánj." Da'nga' daj hua
gataj Jesús gunun Pedro. Ngaa ni
gahui Pedro gan'anj sij ne' chrej xe'.
Ni gaco nin' ruhua sij.

Jesús ante Pilato

27 Ni ngaa guerenga', ni
diga'mi dugüi' daran' ni
chrej a'nin' ngá ni tsínj huin achij
scanij ni ngüi sisi naga'ui' ni sij Jesús
gahui' sí!. ²Ni gumíj ni sij Jesús. Ni
nicaj ni sij sí' gan'anj ni sij naga'ui' ni
sij sí' ra'a Pilato huin sí' gobernado.

Muerte de Judas

³Ni Judas huin tsínj naga'ui' Jesús
rian ni tsínj nicaj sun. Ni ngaa
guini'i Judas sisi gahui' Jesús,
gui'yaj ni sij, ni ducu ganani ruhua
sij. Ni naga'ui' sij ico chi' san'anj
plata daj rian ni chrej a'nin' ngá ni
tsínj huin achij nej. ⁴Ni gataj sij:

—Da'uij gaquin' xi'í si naga'uij
gahui' 'ngo tsínj nitaj 'ngo gaquin'
gui'yaj. —Daj gataj Judas ngaa nani
ruhua sij.

Sani gataj ni sij:

—Ni un si gui'yaj únj únj. Si-
gaquin' man'án re^l huin nan. —Daj
gataj ni sij gunun Judas.

⁵Ngaa ni dagaman' Judas san'anj
huin plata daj chruhua nuhui.
Ni gan'anj doco' sij man'an sij. Ni
gahui' sij. ⁶Hué dan ni naran' ni
chrej a'nin' san'anj huin plata daj. Ni
gataj ni sij:

—Si ga'ue ga'nij né' san'anj nan
rian Yan'anj gahuin ofrenda xi'í si
du'ue tun 'ngo tsínj mánj. —Daj
gataj ni sij.

⁷Ngaa ni uyan ga'mi ni sij sisi
gui'rān ni sij san'anj daj 'ngo do'ój
'ngo tsínj ri chruj. Ni da'nga' daj
gui'yaj ni sij sisi gui'rī' ni sij 'ngo
yu'uj gachin' ni sij ni ngüi 'na' ango
rian xuman!. ⁸Xi'í daj gu'naj yo'ój
daj da' güi acuan' yo'ój tun. ⁹Hué
daj gahuin yya daj rún' ga'mi
Jeremías tsínj ga'mi si-nuguan'
Yan'anj asij ná. Ni gataj sí: "Nacaj
ni sij ico chi' san'anj plata. Daj si
da'nga' daj huin du'ue 'ngo tsínj daj
daj rún' naru'ue ni tsínj israelita.
¹⁰Ni san'anj daj gui'rānj ni sij do'ój
tsínj ri chruj daj rún' ga'nin' Señor
sun riānj." —Daj gataj Jeremías.

Pilato interroga a Jesús

¹¹Ngaa ni ganiquin' Jesús rian
gobernado. Ni ganachínj snan'anj sí'
Jesús. Ni:

—Hué re^l huin si-rey ni ngüi
israelita ní!. —Gataj gobernado.

Ngaa ni:

—Hué re^l ataj nánj. —Gataj Jesús.

¹²Sani ngaa ga'mi gaquin' ni chrej
a'nin' ngá ni tsínj huin achij, ni nun
danicaj Jesús ni a 'ngo nuguan' rian
ni sij. ¹³Ngaa ni gataj gobernado daj
tsínj gu'naj Pilato gunun Jesús:

—Nunún re^l undaj gaquin' a'mi ni
sij rian xi'í re^l di mí!. —Daj gataj
Pilato gunun Jesús.

14Saní ni a 'ngo nuguan' nun gataj Jesús gunun Pilato. Xi'í daj ni nín' ruhua garáj yan'anj ruhua sij ni'yaj sij Jesús.

Jesús sentenciado a muerte

15Ni da' go'ngo yo', ni hua 'ngo ducuánj nico' Pilato sisí ri sí' 'ngo tsínj nún ducuaga' go'ngo gui'yanj pascua. Tsínj garan' ruhua ni ngüi, ni guiri sij sí' ducuaga!. **16**Ni ngaa daj, ni nún 'ngo tsínj gu'naj Barrabás ducuaga!. Ni ni'l sa' ni ngüi sisí da'ui sij nico gaquin!. **17**Ngaa ni nachínj snan'anj Pilato ni tsínj nahuin yu' daj. Ni gataj sij:

—Ni un tsínj garan' ruhua á ni é re' sisí guirij ducuaga', ruhua á re' únj. Asi guirij Barrabás ní!. Asi guirij tsínj gu'naj Cristo sa!. —Daj gataj Pilato gunun ni sij.

18Daj si xacaj Pilato cuenta sisí naga'ui' ni sij Jesús rian xi'í si xicoj ruhua ni sij ni'yaj ni sij man'an sí'.

19Ni ngaa gane Pilato rian nagui'yaj yya sij ni gaquin', ni ga'níj nica sij 'ngo nuguan' gan'anj rian sij. Ni gataj ún' gunun sij:

—Si diguój re' si-nuguan' tsínj hua nica niman nan mánj. Daj si guiran'anj 'ngo sayun nico xi'í sij yyaj ngaa ga'nij aj. —Daj gataj unj rian sí'.

20Sani gui'yaj fuerza ni chrej a'nin' ngá ni tsínj huin achij sisí gachinj ni ngüi rian Pilato sisí gahui Barrabás ducuaga!. Ni sisí gachinj ni ngüi sisí gahui' Jesús.

21Ngaa ni gataj gobernado gunun ni ngüi:

—Daj hua yya tsínj guirij, ruhua ni é re' únj. —Daj gataj sij gunun ni ngüi.

Ngaa ni:

—Guiri re' Barrabás. —Gataj ni sij.

22Ngaa ni gataj Pilato gunun ni sij:

—Daj huin ruhua ni é re' un sin huin guí'yá ngá Jesús tsínj gu'naj Cristo únj. —Daj gataj sij gunun ni ngüi.

Ngaa ni:

—Gari re' gaquij Jesús guinico' sij rian rugutsi, ruhua únj. —Daj gataj daran' ni ngüi.

23Ngaa ni gataj Pilato gunun ni sij:

—Daj hua gaquin' gui'yaj sij únj. —Daj gataj Pilato.

Sani naanj gaguáj ruhua' yún ni sij:

—Gari re' gaquij Jesús guinico' sij rian rugutsi aj. —Daj gaguáj ni ngüi daj.

24Ni guini'i Pilato sisí na'ue gana'man ruhua ni ngüi. Sani huaj nin' ruhua ga'man ruhua ni sij. Ngaa ni guida'a sij nnee. Ni nania' sij rian ni ngüi. Ni gataj sij:

—Sé xi'ij huin si gahui' tsínj hua nica niman nan mánj. Güenda man'an ni é re' huin nánj. —Daj gataj Pilato.

25Ngaa ni gataj ni ngüi daj:

—Xi'í ni da'nij únj gahui' tsínj nan anj. —Daj gataj ni sij.

26Ngaa ni guiri Pilato Barrabás rian ni ngüi. Ni ga'ui' ni sij nne' xiráj Jesús, gui'yaj Pilato. Hué dan ni naga'ui' Pilato Jesús rian ni sij sisí gari ni sij gaquij sí' guinico' sí' rian rugutsi.

27Ngaa ni nicaj ni si-snado gobernado gan'anj ni sij Jesús ta rian palacio daj. Ni ganahuin yu' daran' ango ni snado rian Jesús,

gui'yaj ni sij. ²⁸Ni guiri ni sij si-gan'sí!. Ni na'níj ni sij 'ngo atsij rian rumí' mare xá Jesús gunun sí!. ²⁹Ni run'un ni sij 'ngo ya'q tanj gui'yaj ni sij 'ngo corona ga'níj ni sij chra Jesús. Ni garíj ni sij 'ngo riuj ra'a sa' sí!. Ngaa ni ganiquin' ráj dacoj ni sij rian sí!. Ni ga'nga' naco ni sij. Ni ga'mi ducu ni sij guini'yaj ni sij Jesús. Ni gataj ni sij:

—Hua 'ueé nin' si-rey ni tsínj israelita. —Daj gaguáj ni sij ga'mi ducu ni sij ni'yaj ni sij Jesús.

³⁰Ni gara sta'nunj ni sij rian Jesús nej. Ni guida'a ni sij riuj daj ga'ui' ni sij chra sí!. ³¹Ni ngaa guisíj gui'yaj ducu ni sij, ni guiri ni sij atsij daj. Ni na'níj ni sij si-gan' Jesús xá sí! ruhua' yún. Hué dan ni guiri ni sij man'an sí! gan'anj sij güenda gari ni sij gaquíj man'an sí! guinico' sí! rian rugutsi.

Crucifixión y muerte de Jesús.

³²Ni ngaa gahui ni sij, ni nacaj dugüi' ni sij nga 'ngo tsínj 'na' xuman' gu'naj Cirene. Ni gu'naj sí! Simón. Ni chran' yun'unj ni sij sisí gata sí! si-rugutsi Jesús. ³³Ngaa ni guisíj ni sij 'ngo dacan gu'naj Gólgota. Ni nuguan' daj gata ruhuaj dacan cúj chra níman. ³⁴Ni ga'ui' ni sij vino go'o Jesús nachej dugüi'-í' nga si-gai' xucu. Sani ngaa go'o Jesús doj, ni nun ga'uej sij go'o sij ga mánj. ³⁵Ni ngaa gari ni sij gaquíj Jesús doco' ni sij sí! rian rugutsi, ni ducu ni snado sisí un tsínj gahui sa' nícaj sij si-gan' sí! gan'anj sij. Ni da'nga' daj gahuin gui'yaj ni sij sisi gahuin yya daj rún' gataj tsínj ga'mi si-nuguan' Yan'anj asij ná. Ni gataj sí!: "Gura! da'aj ni sij

si-gan'anj. Ni ducu ni sij sisí un tsínj gahui sa', ni nícaj sí! si-gan'anj gan'anj." Daj gataj tsínj daj asij ná.

³⁶Ni gan'anj gane ni sij yu'uj daj dugumi ni sij Jesús. ³⁷Ni garun ni sij letra chra si-rugutsi Jesús un si xi'l huin dagahui' ni sij. Ni letra daj ataj: "Nan huin Jesús Si-Rey ni tsínj israelita." Da'nga' daj garun ni sij. ³⁸Ni doco' ni snado yahuíj tsínj tu rian yahuíj rugutsi. Ni nico' 'ngo sij ra'a sa' Jesús, ni ango sij chrej ra'a rotsi sí!.

³⁹Ni ga'mi quij ni ngüi gachin. Ni dugunun ni sij chra ni sij. ⁴⁰Ni gataj ni sij:

—Hué re' huin si duguane nuhui nico, ni hua'nij gue güi na'gui'yaj ruhua' yún re', atáj re' ní!. Ngaa ni ganacaj re' man'án re'. Sisi hué re' huin da'níj Yan'anj, ni guinanij re' rian rugutsi aj. —Hué daj gataj ni ngüi ga'mi ducu ni sij rian Jesús.

⁴¹Ni hué 'ngo nuguan' daj ga'mi ducu ni chrej a'nin' nga ni maestro digyán ley nej, ni tsínj fariseo nej, nga ni tsínj huin achij nej. Ni gataj ni sij:

⁴²—Nacaj sij angó ni ngüi. Sani na'ue ganacaj sij man'an sij. Sisi hué si huin si-rey ni tsínj israelita, ngaa ni nanij sij rian rugutsi aj. Ngaa ni guxuman ró' ni'yó' sij.

⁴³Xuman ruhua sij ni'yaj sij Yan'anj. Ngaa ni sisi 'i ruhua Yan'anj ni'ya sij, ni ga'ue ganacaj Yan'anj sij yyaj. Daj si ataj sij sisi hué sij huin da'níj Yan'anj. —Daj ga'mi quij ni sij rian Jesús. ⁴⁴Ni da nungüej tsínj tu nico' rian rugutsi xi'níj Jesús ga'mi quij nungüej sij rian Jesús nej aj.

⁴⁵Ni ngaa guisíj gaxuj, ni gahuin rumí' rian daran' xungüi. Ni gahuin

rumi' da' ga huanij di'nij. ⁴⁶Ni 'ngo si ga huanij, ni gaguáj nucuaj Jesús. Ni gataj sij:

—Eli, Eli, lama sabactani. —Daj gataj sij gaguáj sij.

Ni snan'anj man'an sij ruhuaj gata: Dan'anj man'anj, Dan'anj man'anj, un sin huin, ni duná ree urinj únij. Daj gataj Jesús gunun Yan'anj.

⁴⁷Ni gunun go'ngo ni tsínj niquin' yu'u j daj si gataj Jesús. Ni gataj ni sij:

—Aquiñj sij ga'na' tsínj gu'naj Elías aj. —Daj gataj ni sij.

⁴⁸Ngaa ni hora gunánj 'ngo ni sij. Ni guida'a sij 'ngo gachij. Ni gutáj sij nnee vino yu rian gachij daj. Ni guta' sij chra 'ngo chrun rianj. Ni dugüin' sij gachij daj du'ua Jesús sisi go'o sij. ⁴⁹Saní gataj ango ni sij:

—Duna re'. Ni guini'lí sisi ga'na' yya tsínj gu'naj Elfás nacaj sij man'an sij. —Daj gataj ni sij.

⁵⁰Ngaa ni gaguáj nucuaj ruhua' yún Jesús. Ni gahui' sij. ⁵¹Ni 'ngo tsitsi' huij dasu atsij nico' chruhua nuhui nico da' chraj ngá da' xi'ij. Nga ni nagunan' yo'ój. Ni guisitsi' huej. ⁵²Ni naxi'nij rian gachin' ni sij níman. Ni ganá'nij nico nnee cúj ni tsínj hua sa' níman gahui'. ⁵³Ni ngaa ganá'nij Jesús, ni gahui ni sij rian achin' níman. Ni gatúj ni sij chruhua xuman' Jerusalén. Ni guini'lí nico ni ngüi ni sij.

⁵⁴Ni guini'lí snado centurión ngá ango ni snado niquin' dugumi Jesús. Ni guini'lí ni sij ga'na' yún nga daran' si gahuin. Ngaa ni nin' ruhua guxu'ui' ni sij. Ni gataj ni sij:

—Xangá', ni hué tsínj nan huin da'nij Yan'anj anj. —Daj gataj ni sij.

⁵⁵Ni gan' mán nico ni yun'unj xana ni'yaj ne Jesús. Ni asij gahui Jesús estado Galilea, ni guinico' ni yun'unj xana daj Jesús. Ni gui'yaj sun ne rian man'an sij! ⁵⁶Ni scanij ne niquin' María Magdalena nga María nni Jacobo nga José nej, nni nungüej da'nij Zebedeo nej.

Jesús es sepultado

⁵⁷Ni ngaa guiní güi daj, ni ga'na' 'ngo tsínj xuru'ue 'na' sij' xuman' gu'naj Arimatea. Ni gu'naj sij' José. Ni hué daj nico' sij' Jesús nej. ⁵⁸Ni gan'anj sij rian nne Pilato gachínj sij níman Jesús. Ngaa ni ga'nin' Pilato sun sisi naga'ui' ni sij níman Jesús rian José. ⁵⁹Ngaa ni nacaj José níman Jesús. Ni chri'yanj sij atsij sa' xiráj níman daj. ⁶⁰Ni gurúj sij níman chruhua 'ngo huej. Ni naca gaya' sij huej daj nne rian do'ój sij. Ni ganaránj sij yej xxi rian huej daj. Ngaa ni gan'anj sij. ⁶¹Ni yu'u j daj gane María Magdalena nga ango María du'ua yu'u j daj.

La guardia ante la tumba

⁶²Ni ango güi ngaa guisij gui'yaj xugüi ni sij güi naránj ruhua ni sij, ni nahuin yu' ni chrej a'nin' ngá ni tsínj fariseo rian Pilato. ⁶³Ni gataj ni sij gunun sij:

—Señor, gananun ruhua únij sisi ngaa ga ni'ná' tsínj digya' yun'unj daj, ni gataj sij sisi chra huanij güi, ni gana'nij sij. ⁶⁴Ngaa ni ga'nin' re' sun sisi gahuin ran rian yu'u j achin' níman daj da guisij ya'nij güi nun sa' nun ga'na' güi'yaj tu ni tsínj nico' sij ne' ni. Ni gataj ni sij rian ni ngüi sisi ganá'nij sij' scanij ni níman. Ni gahuin quij nuguan'

digya' yun'unj daj daj nga nuguan' yyá ga'mi sini yan sij. —Daj gataj ni sij gunun Pilato.

⁶⁵Ngaa ni gataj Pilato gunun ni sij:

—Yu'uj daj mán 'ngo xi'nin' snado. Ganicaj ni é re' gan'anj nagui'yaj ran ni é re' rian yu'uj achin' níman daj. Ni'i a ni é re' daj gui'yaj á re'. —Daj gataj Pilato gunun ni sij.

⁶⁶Ngaa ni gahui ni sij gan'anj nagui'yaj xitinj ni sij rian yu'uj daj. Ni garun ni sij si-sello ni sij rian yej guiránj ni sij. Ni gani ni sij snado dugumi ni sí' rian achin' níman daj.

La resurrección

28 Ni gachin güi naránj ruhua ni sij. Ni ngaa ruhua guerenga' güi gudungu, ni ga'na' María Magdalena nga ango María guiñi'yaj nungüej unj rian huej rian gachin' ni sij níman. ²Ni ga'na' nucuaj 'ngo yún. Daj si ga'na' 'ngo ángel xata' ga'níj Señor. Ni guisíj ángel daj rian yu'uj daj. Ni ga'nej ángel yej xxi hua ránj rian yu'uj gachin' níman daj. Ni gan'anj gane ángel rian yej daj. ³Ni ran ángel daj daj rún' ngaa ran 'yaj du'ui. Ni daj rún' hua gatsi yu'ue!, ni da'nga' daj hua gatsi si-gan' ángel daj. ⁴Ni ducu guxu'ui' ni snado dugumi daj. Ni nagunánj ni sij, gui'yaj si xu'ui' ni sij. Ni guinij rumi' ni sij. Ni rún' hua níman hua ni sij. ⁵Sani gataj ángel gunun nungüej yun'unj xána daj:

—Si guxu'ui' nungüej é re' mánj. Daj si ni'línj sisi nano' nungüej é re' Jesús tsínj guinicó' rian rugutsi. ⁶Nitaj si ngaj sij yu'uj nan ga mánj. Daj si daj rún' gataj sij gunun

ni é re', ni da'nga' daj ganá'nij sij. Gahua' nungüej é re' guiñi'i nungüej é re' rian gachin' ni sij. ⁷Ni güij yoo nungüej é re' gataj snan'anj nungüej é re' rian ni tsínj nico' sij sisi ganá'nij sij scanij ni níman. Ni gataj á re' sisi gan'anj sini sij estado Galilea. Ni yu'uj daj guiñi'i ni é re' man'an sij. Daj gataj snan'anj nungüej é re' gunun ni sij. Ni huéj ataj gunun nungüej é re'. —Daj gataj ángel daj gunun nungüej yun'unj xána daj.

⁸Ngaa ni gunánj yoo nungüej ún' rian yu'uj daj. Ni guxu'ui' nungüej ún'. Sani gahuin niá' ruhua nungüej ún' nej. Ni gunánj nungüej ún' gan'anj nata' ún' nuguan' daj gunun ni tsínj nico' Jesús. ⁹Ni ngaa huaj nungüej ún' chruhua chrej, ni nacaj dugüi' Jesús nga nungüej ún'. Ni gataj sij: Gahuin niá' ruhua nungüej é re'. Gataj sij.

Ngaa ni gahuin nichrun' nungüej ún' rian niquin' Jesús. Ni nanan nungüej ún' dacój Jesús. Ni ga'mi sa' nungüej ún' rian sij. ¹⁰Ngaa ni gataj Jesús gunun nungüej ún':

—Si guxu'ui' nungüej é re' mánj. Maan si gan'anj gataj snan'anj nungüej é re' rian ni jnān sisi gan'anj ni sij estado Galilea. Ni yu'uj daj guiñi'i ni sij man'anj.

El informe de la guardia

¹¹Ni ngaa huaj nungüej ún' chruhua chrej, ni gan'anj go'ngo ni snado dugumi daj xuman' daj. Ni ganata' ni sij daran' si gahuin rian ni chrej a'nin'. ¹²Ngaa ni ganahuin yu' ni tsínj daj nga ni tsínj huin achij sisi uyan ga ruhua daran' ni sij daj gui'yaj ni sij. Ni nico san'anj

ga'ui' ni sij rian ni snado. ¹³Ni gataj ni sij gunun ni sí!:

—Gataj ni é re^l sisi ngaa ne^l ni, ni ga'na^l gui'yaj t^u ni tsínj nico^l Jesús níman daj ngaa atoj ni únj anj. Da'nga^l daj gataj ni é re^l. ¹⁴Ni sisi gunun gobernado si gui'yaj né^l, ngaa ni ga'mi sa^l únj ng^u sí!. Ngaa ni ganacaj únj ni é re^l. —Da'nga^l daj gataj ni chrej a'nin^l rian ni snado.

¹⁵Ngaa ni^l ganacaj ni snado san'anj ga'ui^l ni sij daj. Ni^l gui'yaj ni sij daj rún^l gataj ni chrej a'nin^l gunun ni sij. Ni^l daj rún^l ga'mi yya ni snado daj da'nga^l daj a'mi ni tsínj israelita da^l güi acuan!.

La gran comisión

¹⁶Asíj ni^l gan'anj xan ni tsínj nico^l Jesús estado Galilea rian quij hua gataj Jesús sisi^l gan'anj ni sij. ¹⁷Ni

ngaa guini'i ni sij Jesús, ni ganiquin' ráj d^ucoj ni sij rian sí^l ga'mi sa^l ni sij. San^l gani huij ruhua go'ngo ni sij xi'í Jesús. ¹⁸Ngaa ni^l gahuin nichrun' Jesús, ni^l gataj sij:

—Riqui Yan'anj sisi^l guinicá daran^l sun ne^l xata^l nga chruhua xungüi nej. ¹⁹Xi'í daj, ni^l gan'anj digyán ni é re^l nuguan^l sa^l rian daran^l ni ngüi m^uan chruhua xungüi. Ni^l guinicó^l ni sij man'anj, gui'yaj ni é re^l. Ni^l duguata^l nnee ni é re^l ni sij nga si-xugüi chrē nga si-xugüi man'anj nej, si-xugüi Espíritu Santo nej aj. ²⁰Ni^l digyán ni é re^l rian ni sij sisi^l dagahuin ni sij daran^l ni nuguan^l ga'nij sun rian ni é re^l. Ni^l guini'i ni é re^l sisi^l daran^l ni güi achē nga ni é re^l da^l guisij^l ganahuij xungüi aj. —Daj gataj Jesús gunun ni tsínj nico^l sij.